

**MESYUARAT KEDUA, PENGGAL KEDUA  
PARLIMEN KEEMPAT BELAS**

**2019**

**HARI KHAMIS : 4 JULAI 2019**

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**  
**DARIPADA : YB TUAN WONG CHEN**  
**[SUBANG]**  
**TARIKH : 4 JULAI 2019 (KHAMIS)**  
**MENJAWAB**

**SOALAN NO 1**

Minta **PERDANA MENTERI** menyatakan pendirian Kerajaan dan garis masa terhadap pemindahan kuasa untuk melantik Ketua SPRM kepada Parlimen dengan meminda Akta SPRM 2009 selaras dengan manifesto Pakatan Harapan.

**JAWAPAN:**

Jawapan ini akan dijawab bersekali untuk soalan-soalan berikut:

- (a) Pertanyaan lisan nombor oleh YB Bukit Gantang pada 4 Julai 2019;
- (b) Pertanyaan lisan oleh YB Kuala Krau pada 10 Julai 2019.
- (c) Pertanyaan lisan oleh YB Wangsa Maju pada 16 Julai 2019

Yang Di-Pertua,

1. Untuk makluman ahli Yang Berhormat, pelantikan Ketua Pesuruhjaya SPRM adalah selaras dengan peruntukan Seksyen 5 Akta SPRM 2009 yang menyatakan secara jelas bahawa Yang di-Pertuan Agong hendaklah melantik Ketua Pesuruhjaya SPRM di atas nasihat Perdana Menteri.
2. Pada masa yang sama, Seri Paduka Baginda Yang di-Pertuan Agong, Al-Sultan Abdullah Ri'ayatuddin Al-Mustaffa Billah Shah telah memperkenankan pelantikan Puan Latheefa Koya sebagai Ketua Pesuruhjaya SPRM bagi tempoh dua tahun iaitu mulai 1 Jun 2019 sehingga 31 Mei 2021. Majlis mengangkat sumpah pelantikan tersebut juga telah diadakan di Istana Negara pada 25 Jun 2019.

**NO. SOALAN : 1**

3. Berkenaan dengan isu pemindahan kuasa melantik ketua SPRM kepada Parlimen, saya ingin memaklumkan kepada Dewan ini bahawa sebanyak enam (6) Jawatankuasa Pilihan Khas (*Special Select Committee*) telah ditubuhkan termasuk Jawatankuasa Pilihan Khas Untuk Melantik Jawatan-Jawatan Utama Perkhidmatan Awam sebagai perintis berdasarkan kepentingan dan hala tuju negara yang telah diluluskan oleh Majlis Mesyuarat Dewan Rakyat pada Khamis, 16 Ogos 2018 semasa Mesyuarat Pertama, Penggal Pertama, Parlimen Keempat Belas.
4. Jawatankuasa Pilihan Khas Untuk Melantik Jawatan-Jawatan Utama Perkhidmatan Awam berfungsi untuk meneliti pelantikan jawatan-jawatan penting dalam negara seperti pelantikan ke Suruhanjaya Hak Asasi Manusia, Suruhanjaya Pilihan Raya Malaysia, Suruhanjaya Pencegahan Rasuah Malaysia dan Suruhanjaya Pelantikan Kehakiman Malaysia bagi memastikan ia dilantik berdasarkan merit.
5. Untuk makluman Ahli Yang Berhormat, Jawatankuasa Pilihan Khas ini telah bermesyuarat sebanyak enam (6) kali bagi menjalankan fungsi-fungsinya dan telah menetapkan rangka kerja sepanjang tahun berdasarkan terma rujukan yang telah ditetapkan. Walau

**NO. SOALAN : 1**

bagaimanapun, Jawatankuasa ini mendapati bahawa proses pelantikan jawatan-jawatan utama dalam perkhidmatan awam ini adalah unik dan berbeza bagi setiap jawatan dan agensi. Oleh yang demikian, Jawatankuasa ini sedang mengkaji mekanisme terbaik agar dapat menjalankan fungsi dan peranan yang lebih jelas dalam proses pelantikan jawatan-jawatan utama.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA PENGGAL KEDUA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : DATUK SERI M. SARAVANAN [ TAPAH ]**

**TARIKH : 4 JULAI 2019 (KHAMIS)**

**SOALAN :**

**Datuk Seri M. Saravanan [ Tapah ]** minta **MENTERI WILAYAH PERSEKUTUAN** menyatakan apakah tindakan segera kepada pemilik premis yang meletak halangan pada petak letak kendaraan tanpa kebenaran serta kaedah dan cara mengurangkan pemilikan petak parkir yang melibatkan beberapa petak sewa khas yang diperuntukkan kepada pemilik premis sedia ada.

**JAWAPAN**

Tuan Yang di-Pertua

Untuk makluman Ahli Yang Berhormat Tapah, kemudahan tempat letak kereta di kawasan Kuala Lumpur yang diletakkan di bawah tanggungjawab Dewan Bandaraya Kuala Lumpur melibatkan tempat letak kereta awam dan tidak termasuk tempat letak kereta persendirian. Ini termasuklah tempat letak kereta bermeter bahu jalan yang melibatkan jalan-jalan awam berjumlah lebih kurang 60,471 petak di seluruh Kuala Lumpur.

Untuk makluman Ahli Yang Berhormat Tapah juga, halangan pada petak letak kereta sering kali dilakukan oleh pemilik perniagaan dengan meletakkan halangan seperti kon, papan tanda, kerusi/bangku, water barrier dan sebagainya. Walau bagaimanapun, Dewan Bandaraya Kuala

## **NO. SOALAN : 2**

Lumpur sentiasa menjalankan operasi ke atas kesalahan tersebut dengan melaksanakan tindakan pindah halangan ke atas barang tersebut. Berdasarkan statistik tindakan bagi tahun 2018 sehingga Januari 2019, sebanyak 90 operasi telah dijalankan dengan barang yang dialihkan berjumlah 632. Tindakan ini akan dijalankan secara berterusan bagi memastikan pemilik perniagaan tidak menyalahgunakan petak letak kereta.

Dewan Bandaraya Kuala Lumpur juga memproses permohonan penyewaan petak khas kepada pemilik perniagaan berdasarkan kepada peruntukan Seksyen 15 (1), Perintah Pengangkutan Jalan (Peruntukan Tempat Letak Kereta) Wilayah Persekutuan Kuala Lumpur 2016. Seksyen ini menyatakan bahawa Datuk Bandar boleh menyediakan apa-apa bilangan ruang letak kereta khas dalam tempat letak kereta bermeter. Sehingga kini, Dewan Bandaraya Kuala Lumpur telah meluluskan 3,626 petak khas di seluruh kawasan Kuala Lumpur kepada pemilik perniagaan.

Walau bagaimanapun, bermula November 2018 hingga sekarang, Dewan Bandaraya Kuala Lumpur telah menangguhkan kelulusan baru dan pembaharuan penyewaan petak khas di seluruh kawasan Kuala Lumpur bertujuan untuk menyemak dan mengkaji semula proses permohonan penyewaan petak khas. Dalam hal ini, permohonan baru penyewaan petak khas tidak lagi diproses manakala semua petak khas yang telah tamat tempoh penyewaan tidak lagi dilanjutkan penyewaannya. Tindakan dijalankan ke atas petak khas dengan memadamkan garisan petak khas serta membuka palang besi berdasarkan kepada tamat tempoh penyewaan.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**TARIKH : 4 JULAI 2019 (KHAMIS)**

**DARIPADA : TUAN RAMKARPAL SINGH A/L KARPAL  
SINGH**

**SOALAN : 3**

**Tuan Ramkarpal Singh A/L Karpal Singh [ Bukit Gelugor ]** minta **PERDANA MENTERI** menyatakan secara spesifik berkenaan bilakah penubuhan *“Independent Police Complaints and Misconduct Commission Police (IPCMC)”* akan dilaksanakan.

**JAWAPAN:**

Soalan ini akan dijawab bersekali dengan soalan-soalan berikut:

- a) Pertanyaan lisan oleh YB Kota Bharu pada 4 Julai 2019;
- b) Pertanyaan lisan oleh YB Ayer Hitam pada 4 Julai 2019;
- c) Pertanyaan lisan oleh YB Kuala Krau pada 10 Julai 2019;
- d) Pertanyaan lisan oleh YB Ketereh pada 10 Julai 2019;
- e) Pertanyaan lisan oleh YB Kampar pada 16 Julai 2019;
- f) Pertanyaan lisan oleh YB Cameron Highland pada 16 Julai 2019

Tuan Yang di-Pertua,

1. Untuk makluman Ahli Dewan, IPCMC yang akan ditubuhkan akan memberi perhatian khusus kepada isu salah laku dan integriti anggota dan pegawai PDRM. Bagi menangani masalah rasuah dan salah guna kuasa, IPCMC akan bekerjasama dengan pihak Suruhanjaya Pencegahan Rasuah Malaysia (SPRM). Kerajaan berharap isu-isu salah laku dalam kalangan anggota PDRM dapat diberi perhatian serius sekaligus meningkatkan lagi tahap integriti anggota PDRM dalam menjadikannya sebuah badan bebas yang cekap dan efisien.
2. Untuk makluman semua Ahli Yang Berhormat, pihak Jemaah Menteri telah meluluskan secara dasar penubuhan IPCMC ini dan perbincangan bersama pihak-pihak berkepentingan seperti PDRM dan Badan Peguam Negara masih sedang dijalankan dan akan dimuktamadkan secepat yang mungkin.

**NO. SOALAN: 3**

3. Rang Undang-undang IPCMC pula akan dibentangkan pada sesi persidangan Parlimen kali ini apabila memoradum Jemaah Menteri berkaitan Rang Undang-undang ini dapat diluluskan oleh Jemaah Menteri pada masa yang terdekat.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KE-EMPAT BELAS**

---

**PERTANYAAN : LISAN**

**DARIPADA : TUAN AHMAD MARZUK BIN SHAARY  
[ PENGKALAN CHEPA ]**

**TARIKH : 4 JULAI 2019 (KHAMIS)**

**SOALAN NO. 04**

Minta **MENTERI PENGANGKUTAN** menyatakan:-

- (a) bilakah perkhidmatan tren "Diesel Multiple Units" (DMU) yang dibeli dari China dengan kos RM380 juta untuk perkhidmatan kereta api Pantai Timur (Gemas-Tumpat) dimulakan perkhidmatannya; dan
- (b) bilakah perkhidmatan kereta api ekspres dari Kuala Lumpur ke Tumpat dijangka disambung semula.

**JAWAPAN**

Yang di-Pertua,

- (a) Untuk makluman Ahli Yang Berhormat, pada masa ini KTMB menyediakan 12 perkhidmatan tren Antarabandar yang melalui sektor Pantai Timur antara Gemas dan Tumpat menggunakan stokereta konvensional iaitu lokomotif, koc dan *power generating car*.

Bagi meningkatkan mutu perkhidmatan KTMB di sektor Pantai Timur, Kerajaan telah memperuntukkan sebanyak RM380 juta bagi pembelian 13 set Diesel Multiple Unit (DMU). KTMB merancang untuk memperkenalkan perkhidmatan DMU di sektor Pantai Timur mulai suku ketiga tahun 2019.

Perancangan perkhidmatan ini mengambilkira penerimaan 13 set DMU baharu secara berperingkat mulai bulan Julai 2019 sehingga bulan Disember 2019 serta tempoh masa bagi melaksanakan proses pengujian dan petaulahan sebelum 13 set DMU baharu ini boleh dibenarkan untuk beroperasi.

- b) Untuk makluman Ahli Yang Berhormat juga, buat masa ini Kerajaan sedang memberi keutamaan kepada kerja-kerja menaiktaraf serta membaikpulih kerosakan yang dialami oleh rangkaian keretapi bagi jajaran Gemas – Tumpat termasuk kerosakan akibat bencana banjir pada penghujung tahun 2014.

Banjir yang melanda sektor Pantai Timur pada 22 Disember 2014 telah mengakibatkan kerosakan teruk pada infrastruktur landasan, peralatan persempadanan dan jentera penyelenggara landasan yang telah ditenggelami air. Antara kerosakan infrastruktur landasan yang dialami adalah tanah runtuh, landasan terhakis dan ditenggelami air serta jambatan keretapi yang telah dihanyutkan air. Selain itu, berlaku kerosakan teruk terhadap bangunan pejabat, stesen dan kuarters terutamanya di kawasan Manik Urai, Dabong, Kemubu, Kuala Krai dan Chegar Perah.

Dalam hal ini, Kerajaan telah memperuntukan dana berjumlah RM874.7 juta bagi membaikpulih infrastruktur landasan dan stokereta di sektor Pantai Timur. Peruntukan ini terdiri daripada dana berjumlah RM778.0 juta bagi projek membaikpulih infrastruktur landasan bagi sektor Gemas ke Tumpat dan RM96.7 juta bagi program pemulihan stesen dan lain-lain infrastruktur keretapi yang terjejas akibat musibah banjir besar yang telah melanda negeri di Pantai Timur. Keseluruhan kerja membaikpulih infrastruktur landasan di sektor Pantai Timur ini dijangka akan siap pada penghujung tahun 2019.

Walau bagaimanapun, rakyat masih boleh memilih untuk menggunakan keretapi sebagai pengangkutan daripada Kuala Lumpur ke Tumpat dengan menaiki ETS dari Kuala Lumpur ke Gemas seterusnya menaiki perkhidmatan tren Antarabandar dari Gemas ke Tumpat.

Kerajaan bersedia untuk menimbang pembukaan semula perkhidmatan keretapi ekspress daripada Kuala Lumpur ke Tumpat setelah projek baikpulih dan naiktaraf ini selesai sekiranya terdapat keperluan dan permintaan tinggi serta ketersediaan set-set tren yang boleh beroperasi di sektor tersebut.

Sekian, terima kasih.

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA, PENGGAL KEDUA**  
**PARLIMEN KEEMPAT BELAS**  
**MAJLIS MESYUARAT DEWAN RAKYAT**

**PERTANYAAN : LISAN**

**DARIPADA : PUAN JUNE LEOW HSIAD HUI [HULU SELANGOR]**

**TARIKH : 4 JULAI 2019 (KHAMIS)**

**SOALAN :**

Puan June Leow Hsiad Hui [ Hulu Selangor ] minta **MENTERI INDUSTRI UTAMA** menyatakan usaha Kementerian bagi menggalakkan penggunaan bahan mentah tempatan seperti getah dan kayu-kayan dalam pelbagai aspek pembangunan.

**JAWAPAN:**

Tuan Yang Di-Pertua,

Kementerian sangat menggalakkan penggunaan bahan mentah tempatan seperti getah dan kayu kayan dalam pelbagai aspek termasuk pembangunan. Sehubungan itu, antara langkah-langkah yang dilaksanakan oleh Kementerian bagi meningkatkan penggunaan getah tempatan adalah seperti berikut:

- (a) meningkatkan penggunaan bitumen terubah suai getah bekuan (*Cuplump Modified Bitumen* - CMB) dalam pembinaan dan penyelenggaraan jaringan jalan raya sepanjang 200,000 km di seluruh negara termasuk Jalan Luar Bandar dan Jalan Perhubungan Desa;
- (b) mempergiat kegiatan promosi produk-produk berasaskan getah Malaysia di peringkat antarabangsa oleh Majlis Promosi Eksport Getah Malaysia (MREPC). Ini termasuk kategori barang guna habis untuk perubatan (*medical consumables*) yang mempunyai potensi pasaran yang baik di negara-negara yang mempunyai populasi penduduk yang tinggi seperti Amerika Syarikat dan Jerman; dan
- (c) meningkatkan penggunaan getah dalam negara melalui penghasilan produk-produk baharu dan bernilai tambah berasaskan getah seperti *seismic bearing*, sarung tangan perubatan dan industri, kateter (tiub getah untuk pengaliran urin), galas getah utk keretapi dan jambatan dan lain-lain. Rundingan juga sedang dilaksanakan untuk mempromosi potensi penggunaan komponen-komponen berasaskan getah bagi projek mega seperti *East Coast Rail Link* (ECRL).

Tuan Yang di-Pertua,

Antara usaha Kementerian dalam meningkatkan penggunaan kayu-kayan tempatan adalah seperti berikut:

- (a) menggalakkan penggunaan skim verifikasi kayu (TVS) dalam meningkatkan keyakinan pengguna terhadap produk kayu-kayan tempatan dalam industri pembinaan. Dalam hal ini, sebuah an-

## **SOALAN NO : 5**

syarikat telah ditubuhkan iaitu CTCS Worldwide Sdn Bhd (CWSB) bagi menggalas tanggungjawab berkenaan;

- (b) menjalankan kajian bersama Jabatan Kerja Raya (JKR) dan Lembaga Pembangunan Industri Pembinaan Malaysia (CIDB) bagi perolehan data teknikal penggunaan kayu bagi struktur bangunan. Kajian ini adalah bagi menyokong penggunaan kayu-kayan tempatan melalui data-data teknikal yang diperolehi;
- (c) melaksanakan aktiviti promosi dan pemasaran produk perkayuan tempatan melalui pameran, karnival dan seminar. Sepanjang tahun 2018, sebanyak 26 pameran dan karnival jualan telah dijalankan dengan menjana hasil jualan sebanyak RM20.69 juta. Bagi tahun 2019 pula, Lembaga Perindustrian Kayu Malaysia (MTIB) menasarkan untuk menganjurkan 22 pameran dan karnival jualan bagi tujuan yang sama; dan
- (d) meneruskan aktiviti penyelidikan dan pembangunan (R&D), inovasi dan pengkomersilan produk-produk perkayuan tempatan bagi memperkuuhkan sumbangan sektor industri perkayuan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI REEZAL MERICAN BIN NAINA  
MERICAN [ KEPALA BATAS ]**

**TARIKH : 4 JULAI 2019 (KHAMIS)**

**SOALAN NO. 6**

Minta **MENTERI HAL EHWAL EKONOMI** menyatakan hasil daripada perbincangan Majlis Tindakan Ekonomi dan apakah langkah drastik yang telah diambil bagi memacu kembali ekonomi negara.

**JAWAPAN**

Tuan Yang di-Pertua,

1. Seperti mana Ahli Yang Berhormat sedia maklum, Kerajaan telah memutuskan untuk menubuhkan Majlis Tindakan Ekonomi (dengan izin *Economic Action Council* atau (EAC)) pada 11 Februari 2019. Matlamat utama EAC adalah untuk merancakkan dan merangsang pertumbuhan ekonomi yang mampan, memasti pengagihan kekayaan yang saksama dan seterusnya meningkatkan kesejahteraan rakyat. EAC akan memberi tumpuan khusus kepada isu-isu kritikal seperti mengurangkan kos sara hidup, mewujudkan peluang pekerjaan dan meningkatkan pendapatan rakyat. EAC adalah suatu badan yang bersifat *action-oriented* dalam menyelesaikan isu tersebut.

2. Sejak ditubuhkan, EAC telah mengadakan mesyuarat sebanyak tiga kali. Mesyuarat seterusnya dijadualkan pada 8 Julai 2019. Antara langkah yang telah diputuskan bagi pelaksanaan segera untuk merancakkan pertumbuhan ekonomi negara dan meningkatkan kesejahteraan rakyat adalah:

- i. Bagi mengurangkan kos menjalankan perniagaan dan merancakkan pelaburaran swasta khususnya dalam industri pembinaan, EAC memutuskan supaya proses permohonan dan kelulusan permit pembinaan sedia ada dikaji semula. Sehubungan ini, Ketua Setiausaha Negara (KSN) dan Perbadanan Produktiviti Malaysia (MPC) telah mengadakan perbincangan dengan semua pihak yang berkepentingan termasuk Pihak Berkuasa Tempatan (PBT) dan agensi teknikal yang berkaitan bagi menambahbaik proses urusan mendapat permit pembinaan. Sasaran Kerajaan adalah untuk memendekkan tempoh proses urusan mendapatkan permit pembinaan dari 390 hari kepada 90 hari.
- ii. Bagi memacu agenda produktiviti negara secara menyeluruh dalam usaha meningkatkan daya saing Malaysia, EAC bersetuju supaya Majlis Produktiviti Negara atau *National Productivity Council* (NPC) diaktifkan semula. Ini adalah selari dengan Blueprint Produktiviti Malaysia atau *Malaysia Productivity Blueprint* (MPB). EAC juga memutuskan keahlian baharu NPC dilantik daripada wakil industri yang berpengalaman dan berkepakaran bagi meningkatkan produktiviti di semua peringkat. Keahlian baharu NPC akan diumumkan setelah dipersetujui oleh YAB Perdana Menteri, selaku penggerusi NPC.
- iii. EAC telah memutuskan supaya pendapatan pesawah ditingkatkan. Dalam hubungan ini, langkah segera dilaksanakan selaras dengan hala tuju baharu industri padi dan beras di bawah Kementerian Pertanian dan Industri Asas Tani (MOA). Langkah-langkah tersebut adalah seperti berikut:
  - a. Melaksana program dan model penyatuan tanah yang mensasarkan pembangunan kawasan jelapang padi yang

## **NO. SOALAN : 6**

berproduktiviti rendah. Ini bagi memastikan hasil padi dapat ditingkatkan;

- b. Menggalakkan penanaman varieti padi baharu dan bernilai tinggi seperti padi wangi dan padi pulut; dan
  - c. Melaksana program tanaman selingan atau alternatif di bawah projek Pembangunan Pertanian Bersepadu (IADA) dan projek-projek di bawah Jabatan Pertanian dengan memberi tumpuan kepada tanaman yang boleh menjana pendapatan pesawah dalam masa yang singkat (*cash crop*).
3. Kerajaan yakin pelaksanaan langkah-langkah segera ini dapat merancakkan lagi pertumbuhan ekonomi negara. EAC juga mengalukan input dan cadangan daripada semua pihak untuk dipertimbangkan dalam usaha Kerajaan meningkatkan kesejahteraan rakyat demi kemakmuran bersama.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN VIVIAN WONG SHIR YEE [ SANDAKAN ]**

**TARIKH : 4 JULAI 2019 (KHAMIS)**

**SOALAN NO. 7**

Minta **MENTERI PENGANGKUTAN** menyatakan :-

- (a) berapa efektif langkah penerbangan tambahan bagi menurunkan tambang udara domestik semasa musim perayaan yang diumumkan pada Ogos 2018 dengan statistik terkini; dan
- (b) apakah pelan lain untuk terus mengurangkan tambang udara domestik yang tinggi berterusan pada musim puncak.

**JAWAPAN**

Yang di-Pertua,

1. Langkah untuk mewujudkan penerbangan tambahan bagi menurunkan tambang udara domestik semasa musim perayaan seperti mana yang diumumkan oleh YB Menteri pada tahun lalu telah berjaya mengatasi masalah kenaikan yang melampau harga tambang terutama pada musim perayaan.
2. Kementerian Pengangkutan telah mendapatkan komitmen syarikat-syarikat penerbangan untuk menambah jumlah penerbangan semasa Tahun Baru Cina tahun ini dan telah memperluaskan perlaksanaannya sempena sambutan Hari Raya Aidilfitri, Hari Gawai dan Pesta Keamatan baru-baru ini.

3. Semasa perayaan Tahun Baru Cina tahun ini, jumlah penerbangan berjadual tambahan yang telah diluluskan oleh Suruhanjaya Penerbangan Awam Malaysia (MAVCOM) adalah sebanyak 376, menjadikan jumlah keseluruhan penerbangan sebanyak 2,050 berbanding tahun lepas iaitu sebanyak 1,674. Susulan daripada penambahan penerbangan ini, harga tiket penerbangan secara puratanya telah menurun di antara 19.8% sehingga 57% berbanding tempoh musim perayaan yang sama pada tahun 2018, bergantung kepada waktu tempahan tiket dibuat.
4. Manakala, semasa Pesta Kaamatan, Hari Gawai dan Hari Raya Aidilfitri baru-baru ini, jumlah penerbangan berjadual telah meningkat sebanyak 864 menjadikan jumlah keseluruhan sebanyak 5,240 berbanding tahun lepas iaitu sebanyak 4,376. Susulan daripada penambahan penerbangan tersebut, harga tiket penerbangan bagi 7 daripada 10 laluan yang dipantau oleh MAVCOM secara puratanya telah menurun di antara 12.7% sehingga 74.9% berbanding tempoh musim perayaan yang sama pada tahun 2018, bergantung kepada waktu tempahan tiket dibuat.
5. Walau bagaimanapun, terdapat 3 laluan yang menunjukkan kenaikan harga tambang semasa Pesta Kaamatan, Hari Gawai dan Hari Raya Aidilfitri baru-baru ini, berbanding tempoh yang sama tahun 2018. Laluan-laluan tersebut adalah, Kuala Lumpur – Sandakan, Kuala Lumpur – Tawau dan Johor Bharu – Sibu masing-masing dengan purata kenaikan sebanyak 10.48%, 57.6% dan 21.78%.
6. Berdasarkan pemantauan oleh MAVCOM, harga tambang penerbangan yang ditawarkan adalah lebih rendah bagi laluan Kuala Lumpur – Sandakan dan Johor Bharu – Sibu sekiranya tiket tersebut dibeli dalam tempoh antara sebulan dan dua bulan lebih awal.
7. Situasi ini berlaku mungkin disebabkan oleh faktor ketidakseimbangan antara penawaran dan permintaan terhadap perkhidmatan penerbangan yang disediakan. Sehubungan itu, pada musim perayaan yang akan datang, syarikat penerbangan akan diminta supaya menambah kekerapan penerbangan bagi laluan-laluan

berkenaan. Secara amnya, tawaran harga tiket penerbangan akan lebih murah sekiranya ia ditempah lebih awal.

8. Memandangkan langkah untuk mewujudkan penerbangan tambahan didapati berjaya mengurangkan harga tiket penerbangan khususnya pada musim perayaan, maka Kerajaan akan terus mengguna pakai kaedah ini pada masa hadapan. Pihak Kementerian hanya akan mempertimbangkan semula cadangan untuk menetapkan harga siling dan harga lantai bagi tambang tiket penerbangan domestik sekiranya kaedah untuk menambah penerbangan tambahan tidak berjaya menyelesaikan masalah kenaikan harga tambang sempena musim perayaan.

9. Sehubungan ini, pihak Kerajaan akan terus menggalakkan dan memudahcara semua syarikat penerbangan termasuk Malaysia Airlines Berhad (MAB), MalindoAir dan AirAsia untuk menambah bilangan penerbangan sempena musim perayaan. Dengan mengambil pendekatan untuk menambah bekalan (*supply*) kepada para pengguna, maka permintaan (*demand*) yang besar dapat dipenuhi dan harga tambang dapat dikawal tanpa perlu campur tangan Kerajaan untuk menetapkan harga siling dan harga lantai dalam bentuk peraturan atau arahan.

10. Dalam hubungan ini, Kerajaan akan terus memantau harga tiket kapal terbang dan sekiranya terdapat unsur manipulasi harga atau penetapan harga yang melampau oleh syarikat penerbangan, maka Kementerian Pengangkutan melalui agensi penguatkuasaanya, MAVCOM, akan menyiasat dan mengambil tindakan sewajarnya untuk melindungi pengguna serta memastikan wujudnya persaingan yang sihat di kalangan pemain industri penerbangan dalam negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**  
**MESYUARAT KEDUA PENGGAL KEDUA,**  
**PARLIMEN KEEMPAT BELAS**

**PERTANYAAN : LISAN**

**DARIPADA : YB DATO' SRI DR. HAJI ISMAIL BIN HAJI  
ABD. MUTTALIB [ MARAN ]**

**TARIKH : 04 JULAI 2019 (KHAMIS)**

**SOALAN NO. 8**

Minta **MENTERI SUMBER MANUSIA** menyatakan berapa jumlah tenaga kerja negara yang terkini dan jumlah tenaga kerja asing mengikut sektor serta berapakah jumlah yang telah dihantar pulang pada tahun 2018 dan 2019.

PR-1422-L04799

**JAWAPAN**

Tuan Yang di-Pertua,

1. Berdasarkan kepada Laporan Penyiasatan Tenaga Buruh oleh Jabatan Perangkaan Malaysia, jumlah tenaga kerja negara sehingga suku tahun pertama 2019 adalah seramai 15.010 juta orang.
2. Penggajian pekerja asing di negara kita diluluskan untuk pekerjaan tertentu dalam enam (6) sektor iaitu sektor Pembinaan, Pertanian, Perladangan, Perkilangan, Perkhidmatan dan Pembantu Rumah Asing (PRA). Kerajaan juga menetapkan hanya Negara tertentu sahaja yang boleh dijadikan Negara sumber untuk mendapatkan pekerja asing di mana terdapat 13 negara yang dibenarkan iaitu Bangladesh, Cambodia, China, Filipina, India, Indonesia, Laos, Myanmar, Nepal, Pakistan, Sri Lanka, Thailand dan Vietnam.
3. Berdasarkan Laporan Penyiasatan Tenaga Buruh oleh Jabatan Perangkaan Malaysia bagi suku tahun pertama 2019, lima (5) negara dengan jumlah tenaga kerja asing tertinggi di Malaysia adalah seperti berikut:

## SOALAN NO : 8

### Jumlah Tenaga Kerja Asing Di-Malaysia

BIL.	WARGANEGARA	SEKTOR						JUMLAH BESAR
		PERKILANGAN	PEMBINAAN	PERLADANGAN	PERKHIDMATAN	PERTANIAN	PRA	
1.	INDONESIA	137,733	159,609	203,309	43,718	75,190	92,675	712,234
2.	BANGLADESH	209,164	212,580	34,885	91,025	19,668	125	567,447
3.	NEPAL	240,534	7,403	2,870	71,462	9,393	62	331,724
4.	MYANMAR	84,505	13,359	921	17,534	4,064	63	120,446
5.	INDIA	2,957	10,142	27,699	51,030	25,654	1,132	118,614
<b>JUMLAH</b>		<b>674,893</b>	<b>403,093</b>	<b>269,684</b>	<b>274,769</b>	<b>133,969</b>	<b>9,4057</b>	<b>1,850,465</b>

Sumber : Laporan Penyiasatan Tenaga Buruh oleh Jabatan Perangkaan Malaysia bagi suku tahun pertama 2019,

Tuan Yang di-Pertua,

4. Untuk makluman Dewan Yang Mulia ini, setiap pekerja asing yang ingin pulang ke negara asal perlu mendapatkan Memo Periksa Keluar (*Check Out Memo – COM*). Dalam hal ini, majikan bertanggungjawab untuk menguruskan permohonan COM pekerja asing dan hendaklah memastikan pekerja asing pulang pada tarikh yang ditetapkan dalam COM melalui Pintu Keluar yang dipohon. Sekiranya majikan tidak memohon COM bagi pekerja asing yang diantar pulang ke negara asal, pekerja tersebut dianggap masih bekerja dan berada di bawah tanggungjawab majikan tersebut. Berdasarkan rekod Jabatan Imigresen Malaysia (JIM), sejumlah 255,160 *check out memo* (COM) telah dikeluarkan untuk penghantaran pulang pekerja asing ke negara asal bagi tahun 2018 dan 101,925 COM daripada 1 Januari 2019 hingga 31 Mei 2019.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK WIRA HAJAH MAS ERMIEYATI BINTI SAMSUDIN [MASJID TANAH - PPBM]**

**TARIKH : 4 JULAI 2019 (KHAMIS)**

**SOALAN NO. 9**

Minta **MENTERI BELIA DAN SUKAN** menyatakan status terkini tentang prestasi atlet wanita yang melibatkan sukan secara berkumpulan seperti Bola Sepak, Takraw dan Bola Keranjang adakah seimbang dengan pasukan lelaki.

**JAWAPAN**

Tuan Yang di-Pertua,

1. Untuk makluman Ahli Yang Berhormat, sumbangan wanita kepada negara dapat dilihat dalam pelbagai bidang termasuklah arena sukan negara.
2. Selain atlet perseorangan wanita yang masyhur seperti Dato' Nicol Ann David, Pandelela Rinong, Siti Zalina Ahmad, Farah Ann Abdul Hadi dan sebagainya, atlet-atlet wanita secara berkumpulan juga turut mempamerkan prestasi cemerlang di persada antarabangsa. Pasukan Sepak Takraw wanita diletakkan di bawah Program Podium kendalian MSN dengan kerjasama Persatuan Sepaktakraw Malaysia (PSM). Pasukan ini telah menunjukkan pencapaian-pencapaian yang membanggakan di kejohanan-kejohanan seperti :

## SOALAN NO : 9

No	Kejohanan	Acara	Pencapaian
1.	ASTAF Asia Championship 2019, Kunming, China (Divisyen 2)	Regu 'Double'	Perak Perak
2.	Road to Asian Games 2018 – Test Match	'Double' Berpasukan Quadrant	Perak Perak
3.	Temasya Sukan SEA 2017, Kuala Lumpur	Regu 'Double'	Perak Gangsa
4.	ISTA World Cup Hyderabad 2017	Regu	Gangsa

3. Pasukan Bola Keranjang Wanita juga mengikuti latihan di bawah Program Podium bagi menghadapi Temasya Sukan SEA 2019. Pasukan ini berjaya meraih pingat emas untuk kontinjen negara di Temasya Sukan SEA Kuala Lumpur, 2017 dan juga Sukan SEA Singapura 2015. Pada tahun 2017, pasukan wanita ini menunjukkan prestasi yang cemerlang dengan menjadi naib johan di Kejohanan FIBA 3x3 Asia Cup 2017 di Mongolia.

4. Bagi sukan bola sepak wanita, pasukan ini dikendalikan sepenuhnya oleh Persatuan Bola Sepak Malaysia (FAM). Pasukan ini telah menyertai Kejohanan Piala AFF Women Championship 2016 di Myanmar namun tidak melepassi peringkat kalah mati (*knock out stage*). Bagi penyertaan di temasya pula, pasukan negara pernah menyertai temasya Sukan SEA 2013 di Myanmar dan menamatkan saingannya di tempat ke-empat.

5. Skuad Hoki Wanita negara juga mempamerkan aksi yang cemerlang setelah mengakhiri kempen Kejohanan Siri Final Wanita FIH 2019, Ireland di tempat ketiga. Bagi penyertaan di temasya pula, pasukan wanita ini juga merupakan penyumbang pingat emas yang konsisten di Temasya Sukan SEA. Pasukan ini juga masih mempunyai peluang untuk memburu tempat ke kelayakan akhir Sukan Olimpik Tokyo 2020.

## **SOALAN NO : 9**

6. Secara keseluruhannya, tumpuan yang diberikan kepada pasukan lelaki dan wanita adalah berdasarkan kepada prestasi dan pencapaian sukan tersebut. Kementerian melalui Majlis Sukan Negara (MSN) memberi penekanan kepada prestasi atlet (*performance based*) berdasarkan sasaran pingat di temasya Sukan Olimpik, Sukan Komanwel, Sukan Asia dan Sukan SEA. Manakala, bagi sukan-sukan yang tidak dipertandingkan di peringkat Olimpik pula, Kementerian akan memberi perhatian kepada kejohanan-kejohanan berprestij di peringkat antarabangsa.
7. Malah, Kementerian juga dalam perancangan menyediakan Garis Panduan Mengarusperdanakan Gender (*Gender Mainstreaming*) dalam sukan bertujuan memperkasa dan menggalakkan lebih ramai wanita menceburi bidang sukan sekaligus mencapai kejayaan di arena ini.

Sekian, terima kasih.

**NO. SOALAN : 10**

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN CHE ALIAS BIN HAMID (KEMAMAN)**

**TARIKH : 4 JULAI 2019**

**SOALAN NO. 10**

**Tuan Che Alias bin Hamid [ Kemaman ]** minta **MENTERI AIR, TANAH DAN SUMBER ASLI** menyatakan sejauh mana penguatkuasaan dan pemantauan perlombongan haram atau tamat tempoh permit seperti bijih timah, bauksit, emas dan lain-lain di Malaysia.

**JAWAPAN**

Tuan Yang di-Pertua,

- i) Bagi perlombongan haram di atas tanah kerajaan dan tanah milik (selain Pajakan Melombong dan Lesen Melombong Tuan Punya) adalah di bawah bidang kuasa Kerajaan Negeri di mana aktiviti tersebut tertakluk kepada tindakan di bawah Enakmen Mineral Negeri yang **dikuatkuasakan** oleh Pejabat Pengarah Tanah Dan Galian Negeri (PTG).
- ii) Jika disabitkan kesalahan di bawah enakmen negeri kerana melombong tanpa lesen atau pajakan, pesalah boleh dihukum denda tidak melebihi RM500,000 atau dipenjarakan selama tempoh tidak melebihi 10 tahun atau kedua-duanya sekali.
- iii) Namun, Kementerian melalui Jabatan Mineral dan Geosains Malaysia (JMG) akan membantu pihak Kerajaan Negeri menjalankan **penguatkuasaan** dan **pengesahan** aktiviti perlombongan tersebut. Tindakan perundangan selanjutnya akan dijalankan oleh Pihak Berkuasa Kerajaan Negeri (PBN).
- iv) Manakala perlombongan di atas Pajakan Melombong dan Lesen Melombong Tuan Punya adalah tertakluk kepada kelulusan Skim **Pengendalian** Melombong (Operational Mining Scheme) yang diluluskan di bawah Akta Pembangunan Mineral (APM) 1994 oleh Jabatan Mineral dan Geosains Malaysia (JMG).

- v) Bagi mana-mana aktiviti perlombongan di atas Pajakan Melombong dan Lesen Melombong Tuan Punya tanpa kelulusan *Operational Mining Scheme* yang boleh diambil tindakan oleh JMG di bawah APM 1994 dan jika disabitkan kesalahan, boleh didenda di bawah Seksyen 40, akta yang sama, yang membawa hukuman denda RM100,000 atau penjara tidak melebihi 5 tahun atau kedua-duanya sekali.
- vi) Pihak JMG dari semasa ke semasa mengemaskini senarai lombong aktif dan senarai Pajakan Melombong dan Lesen Melombong Tuan Punya di setiap negeri untuk tujuan pemantauan dan penguatkuasaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SYED IBRAHIM BIN SYED NOH**

**KAWASAN : [LEDANG]**

**TARIKH : 4 JULAI 2019 (KHAMIS)**

**SOALAN NO. 11**

minta **PERDANA MENTERI** menyatakan apakah peranan Majlis Konsultasi Perpaduan Negara untuk meningkatkan perpaduan di kalangan rakyat Malaysia dan bagaimanakah Majlis Konsultasi Perpaduan Negara berjaya mengurangkan isu-isu perkauman dan agama.

**JAWAPAN**

Yang di-Pertua,

Sejarah membuktikan bahawa Malaysia dapat mengatasi sebarang cabaran jika rakyatnya bersatu padu dan sanggup melalui kesukaran bersama. Malah, kepelbagaian rakyat Malaysia adalah kekuatan kita. Ia tidak sepatutnya menjadi punca konflik, tetapi perlu menjadi resipi untuk mencapai kejayaan dalam pembangunan dan kemajuan sosio-ekonomi.

Perpaduan nasional bukanlah satu anugerah semata-mata, malah ia harus dibina, diurus dan diselenggara dengan baik agar kestabilan dan keharmonian negara dapat dikekalkan. Ikhtibarnya, kita semua perlu berganding bahu dan bersatu tenaga bersama-sama kerajaan mengambil langkah-langkah yang positif dan membina bagi memastikan perpaduan dan keharmonian di negara ini akan terus kekal dan terpelihara.

Majlis Konsultasi Perpaduan Negara telah ditubuhkan pada bulan September 2013 sebagai usaha Kerajaan ke arah penyatuan nasional (*national reconciliation*) bagi mengurangkan polarisasi kaum dan membina bangsa Malaysia yang bersatu padu. Penubuhannya menjadi platform untuk membincangkan isu-isu sukar dan kompleks dalam kalangan masyarakat Malaysia serta merintis jalan penyelesaian ke arah merapatkan jurang yang menghalang perpaduan. MKPN telah ditunjangi oleh Ahli-Ahli Majlis yang mempunyai kredibiliti, bersifat terbuka, neutral dan mempunyai pandangan konstruktif berhubung dengan hal-ehwal perpaduan.

Pelantikan Ahli-Ahli MKPN bagi sesi pertama adalah pada 25 November 2013 dan telah tamat tempohnya pada 21 Oktober 2015. Kejayaan utama MKPN adalah penghasilan satu *Blueprint* iaitu Pelan Perpaduan, Kesepaduan dan Penyatupaduan Malaysia (PPKPM) yang telah dipersetujui di dalam Mesyuarat Jemaah Menteri pada 12 Ogos 2015. *Blueprint* PPKPM telah dirangka berdasarkan input dan maklum balas yang telah diterima melalui 18 Dialog Rakyat yang telah diadakan di seluruh negara dan melibatkan penyertaan seramai 5,530 orang mewakili pelbagai pihak berkepentingan dan sektor masyarakat.

Selaras dengan Janji 56 dalam manifesto kerajaan yang menekankan bahawa perpaduan nasional tetap dan sentiasa menjadi agenda utama kerajaan, Jabatan Perpaduan Negara dan Integrasi Nasional (PERPADUAN) telah mengambil langkah menjenamakan semula Majlis Konsultasi Perpaduan Negara (MKPN) kepada Majlis Perundingan Keharmonian Rakyat (MPKR) dan telah diluluskan oleh Kabinet pada 12 Jun 2019. MPKR sebagai kesinambungan kepada MKPN akan meneruskan usaha-usaha memelihara dan meningkatkan perpaduan nasional di samping akan mempromosikan Malaysia di peringkat global sebagai model negara moderat yang berjaya menjaga keharmonian antara kaum dan agama dan berfungsi sebagai platform untuk percambahan fikiran dan rekonsiliasi antara kaum dan agama sebagai usaha ke arah penyatuan nasional (*national reconciliation*).

Tambahan pula, MPKR juga akan bertanggungjawab untuk memantau dan memastikan perancangan inisiatif dan strategi di bawah Pelan Tindakan Perpaduan Negara (PTPN) yang inklusif dan merentasi semua Kementerian dan Agensi Kerajaan dapat direalisasikan apabila pelan ini diluluskan oleh Kabinet kelak melalui pelaksanaan program-program yang spesifik dan konkret untuk menyemarakkan perpaduan, kesepadan dan penyatupaduan rakyat Malaysia. Manakala, pemilihan ahli-ahli yang akan menganggotai MPKR adalah dalam kalangan individu yang berpengalaman serta komited terhadap perpaduan negara dan kesejahteraan sosial rakyat, mempunyai kredibiliti, bersifat inklusif, terbuka, neutral dan mempunyai pandangan konstruktif serta mewakili semua lapisan masyarakat.

Penjenamaan semula MKPN kepada MPKR merupakan suatu langkah terbaik Kerajaan kerana ia mampu menjadi tulang belakang Kerajaan dalam hal ehwal perpaduan dan kesejahteraan sosial. Sebagai sebuah badan bebas, MPKR akan bergerak membawa misi perpaduan di bawah pucuk pimpinan kerajaan semasa untuk rakyat dan negara Malaysia.

Sekian, terima kasih.

Disediakan oleh : Bahagian Dasar dan Perancangan

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN HAJI AWANG BIN HASHIM [PENDANG]**

**TARIKH : 4 JULAI 2019 (KHAMIS)**

**SOALAN NO. 12**

Minta **MENTERI HAL EHWAL EKONOMI** menyatakan pemilikan Bumiputera dalam aset bukan kewangan seperti harta tanah komersial, industri dan kediaman di lokasi utama dan strategik.

**JAWAPAN**

Tuan Yang di-Pertua,

1. Untuk makluman Ahli Yang Berhormat, pemilikan Bumiputera dalam aset bukan kewangan seperti harta tanah boleh digambarkan berdasarkan transaksi harta tanah dalam pasaran primer dan sekunder. Data berkaitan ini dikeluarkan oleh Pusat Maklumat Harta Tanah Negara (NAPIC) di bawah Kementerian Kewangan pada setiap tahun.

2. Pada tahun 2018, peratusan dan nilai transaksi harta tanah kediaman, komersial dan industri melibatkan Bumiputera dalam pasaran primer adalah seperti berikut:

- i. transaksi harta tanah kediaman adalah sebanyak 46.5 peratus iaitu bersamaan RM6.2 bilion;
- ii. transaksi harta tanah komersial adalah sebanyak 8.2 peratus iaitu bersamaan RM160 juta; dan

- iii. transaksi harta tanah industri adalah sebanyak 1.2 peratus iaitu bersamaan RM8.43 juta.
3. Manakala, bagi pasaran sekunder, peratusan dan nilai transaksi harta tanah kediaman, komersial dan industri melibatkan Bumiputera adalah seperti berikut:
- i. transaksi harta tanah kediaman adalah sebanyak 30.41 peratus iaitu bersamaan RM16.85 bilion;
  - ii. transaksi harta tanah komersial adalah sebanyak 3.84 peratus iaitu bersamaan RM1.06 billion; dan
  - iii. transaksi harta tanah industri adalah sebanyak 0.67 peratus iaitu bersamaan RM100 juta.

Sekian, terima kasih.

**NO. SOALAN : 13**

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK DR. HASAN BIN BAHROM [TAMPIN]**

**TARIKH : 4 JULAI 2019 (KHAMIS)**

**SOALAN NO. 13**

**Datuk Dr. Hasan bin Bahrom [ Tampin ]** minta **MENTERI AIR, TANAH DAN SUMBER ASLI** menyatakan apakah inisiatif yang dijalankan oleh Jabatan PERHILITAN bagi usaha pemeliharaan dan pemuliharaan hidupan liar bagi mengelakkan ancaman kepupusan seperti yang sedang dihadapi baka badak sumbu Sumatera.

## **NO. SOALAN : 13**

### **JAWAPAN**

Tuan Yang di-Pertua,

Kementerian Air, Tanah dan Sumber Asli (KATS) melalui Jabatan Perlindungan Hidupan Liar dan Taman Negara (PERHILITAN) sentiasa komited dalam usaha konservasi hidupan liar di Semenanjung Malaysia dengan melaksanakan usaha-usaha berikut:

(i) Menguruskan kawasan perlindungan seperti:

- 1) Taman Negara Pahang;
- 2) Taman Negara Terengganu;
- 3) Taman Negara Kelantan;
- 4) Taman Negara Pulau Pinang; dan
- 5) rezab-rezab hidupan liar yang lain;

supaya hidupan liar dapat berkeliaran bebas (*roaming*) dalam kawasan habitat semula jadi.

(ii) Meminda Akta Pemuliharaan Hidupan Liar 2010 [Akta 716] bagi mengenakan hukuman yang lebih berat untuk:

- 1) kesalahan menceroboh kawasan-kawasan rizab;
- 2) kezaliman terhadap hidupan liar;
- 3) hukuman berat terhadap orang yang membuat aktiviti pengiklanan atau perdagangan hidupan liar secara atas talian (*online*); dan

- 4) *Wildlife Impact Assessment* (WIA) bagi aktiviti pembangunan yang ditetapkan.
- (iii) Melaksanakan program penguatkuasaan seperti **Ops Belang** dan **Ops Khazanah** secara berterusan bagi membanteras pencerobohan dan pemburuan **haram** hidupan liar;
- (iv) Melaksanakan Pelan Tindakan Konservasi Spesies-Spesies Hidupan Liar Terancam seperti:
  - 1) Pelan Konservasi Gajah Kebangsaan 2013-2022 (NECAP); dan
  - 2) Pelan Tindakan Pemuliharaan Harimau Kebangsaan 2008-2020 (NTCAP).
- (v) Menjalankan program konservasi hidupan liar secara *ex-situ*:
  - iaitu melalui pembiakan di dalam kurungan untuk menyedia serta menambahkan hidupan liar bagi program pelepasan semula ke habitat semula jadi;
- (vi) Membangunkan Pusat Konservasi Harimau Kebangsaan (NTCC) seluar 80 hektar di Lanchang, Pahang bagi tujuan meliaraskan semula (*rewilding*) harimau sebelum pelepasan di hutan-hutan terpilih;

- (vii) Bekerjasama dengan Kerajaan Negeri Johor untuk membangunkan Pusat Pentadbiran Santuari Gajah Johor (*Johor Elephant Sanctuary*) yang mempunyai keluasan padang ragut gajah seluas 72.9 hektar dan 466 hektar;

dan

- (viii) Melaksanakan program Komunikasi, Pendidikan dan Kesedaran Awam (CEPA: *Communication, Education and Public Awareness*) secara berterusan seperti Program Pendidikan Biodiversiti, pameran, ceramah dan program bersama masyarakat setempat, pelajar sekolah, pelajar institusi pengajian tinggi dan orang awam.

Tuan Yang di-Pertua,

Bagi baka badak Sumatera, antara faktor yang menyumbang kepada kepupusannya adalah seperti berikut:

- (i) Pemburuan haram berikutan nilainya yang tinggi di pasaran Asia dan Timur Tengah;
- (ii) Kehilangan dan gangguan habitat akibat pembangunan;
- (iii) Fragmantasi populasi akibat penumpuan sektor perladangan dan pertanian; dan
- (iv) Populasi yang kecil sejak sekian lama.

Antara usaha-usaha yang dilaksanakan Kerajaan bagi menghalang berlakunya kepupusan spesies Badak Sumatera ini adalah seperti berikut:

- (i) Kerjasama antara Kerajaan Persekutuan dan Kerajaan Negeri untuk menjalankan dan meningkatkan usaha-usaha konservasi spesies-spesies hidupan liar yang terancam;
- (ii) Penggunaan Teknologi Reproduktif Termaju (*Advanced Reproductive Technology* - ART) sebagai kaedah untuk menghalang kepupusan Badak Sumatera (*Dicerorhinus sumatrensis*) dan spesies-spesies hidupan liar lain yang mengalami ancaman kepupusan pada ketika ini; dan
- (iii) Kerjasama antara Kerajaan Malaysia dan Kerajaan Indonesia dalam menjalankan usaha-usaha konservasi Badak Sumatera.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**  
**MESYUARAT KEDUA PENGGAL KEDUA,**  
**PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATUK SERI DR. ADHAM BIN BABA  
[ TENGGARA ]**

**TARIKH : 04 JULAI 2019 (ISNIN)**

**SOALAN NO. 14**

Minta **MENTERI SUMBER MANUSIA** menyatakan adakah terdapat dapatan dari mana-mana kajian keperluan menetapkan kadar gaji yang berbeza-beza antara urban, sub-urban dan rural. Sekiranya ada, apakah penambahbaikan yang telah dilakukan oleh Kerajaan untuk diperkenalkan.

PR-1422-L04629

**JAWAPAN**

Tuan Yang di-Pertua,

1. Untuk makluman Dewan Yang Mulia ini, Kerajaan telah melaksanakan gaji minimum seragam seluruh negara pada kadar RM1,100 sebulan berkuat kuasa 1 Januari 2019. Kadar tersebut adalah kadar untuk semua kawasan dan negeri di Malaysia dan terpakai kepada seluruh pekerja sektor swasta.
2. Berkenaan dengan cadangan keperluan menetapkan kadar gaji minimum yang berbeza-beza antara *urban*, *sub-urban* dan *rural*, Kerajaan berpendirian cadangan ini perlu dikaji secara teliti mengenai kesesuaiannya sebelum dilaksanakan.
3. Kerajaan telah memutuskan pembayaran gaji minimum baharu yang seragam di seluruh negara adalah selaras dengan hasrat dan komitmen Kerajaan yang bertujuan untuk memastikan rakyat mendapat hak yang sama rata dari aspek gaji tanpa mengira wilayah atau lokasi.
4. Asas pendirian Kerajaan untuk melaksanakan gaji minimum seragam seluruh negara selepas mengambil kira sebab-sebab seperti berikut:
  - (a) kos sara hidup untuk barang asas adalah sama di seluruh negara;
  - (b) bagi memastikan aktiviti penguatkuasaan dan pemantauan yang berkesan agar objektif asas dasar gaji minimum dapat dicapai;
  - (c) tujuan pelaksanaan gaji minimum adalah untuk melindungi pekerja dalam *vulnerable group* (pekerja-pekerja asas yang mempunyai tahap akademik dan kemahiran rendah atau kurang berpengalaman) yang mana mereka majoritinya banyak bekerja di Perusahaan Kecil dan Sederhana (PKS); dan

**SOALAN NO: 14**

(d) boleh menyebabkan perpindahan (mobilasi) pekerja dari luar bandar ke bandar kerana gaji minimum yang diberikan di bandar adalah lebih tinggi. Keadaan ini secara tidak langsung mewujudkan keadaan yang tidak seimbang dari aspek penawaran tenaga kerja antara luar bandar dan bandar.

5. Kesimpulannya, asas utama Kerajaan pada kali ini adalah untuk menyeragamkan kadar gaji minimum seluruh negara bagi menghapuskan diskriminasi dalam pembayaran gaji minimum. Langkah ini juga sekali gus memberikan manfaat yang menyeluruh kepada rakyat dan memastikan ekonomi negara kekal berdaya saing.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATUK HAJI SHABUDIN YAHAYA  
[TASEK GELUGOR - PPBM]**

**TARIKH : 4 JULAI 2019 (KHAMIS)**

**SOALAN**

Minta **MENTERI BELIA DAN SUKAN** menyatakan apakah pihak Kementerian bersetuju untuk meneruskan cadangan bagi membina sebuah stadium mini di Desa Puri dalam kawasan Parlimen Tasek Gelugor.

**JAWAPAN**

Yang Di Pertua,

Untuk makluman Ahli Yang Berhormat, pembinaan sebuah stadium mini di kawasan Parlimen Tasek Gelugor ditangguhkan dengan kajian semula diadakan ke atas skop dan lokasi pembinaan bagi projek ini. Kajian ini mengambil kira keluasan tapak cadangan pembinaan seluas 8 ekar yang mengandungi skop pembinaan seperti trek larian, astaka penonton dengan kapasiti seramai 300-500 orang penonton, sebuah padang bola sepak yang dilengkapi dengan kemudahan lampu limpah dan tempat letak kenderaan. Projek ini dijangka akan dilaksanakan dalam Rancangan Malaysia ke Dua Belas (RMK-12).

Sekian, terima kasih.

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA, PENGGAL KEDUA**  
**PARLIMEN KEEMPAT BELAS**  
**MAJLIS MESYUARAT DEWAN RAKYAT**

**PERTANYAAN : LISAN**

**DARIPADA : DATUK SERI HAJI AHMAD BIN HAMZAH [ JASIN ]**

**TARIKH : 4 JULAI 2019 (KHAMIS)**

**SOALAN :**

**Datuk Seri Haji Ahmad bin Hamzah [ Jasin ]** minta **MENTERI INDUSTRI UTAMA** menyatakan apakah langkah-langkah yang diambil oleh Kementerian untuk menangani isu kejatuhan harga sawit daripada ladang dan langkah-langkah lain untuk meningkatkan pendapatan pekebun kecil selain dari kebergantungan kepada hasil sawit.

**JAWAPAN :**

Tuan Yang Di-Pertua,

Kerajaan sedang berusaha mengambil beberapa langkah drastik untuk membantu menstabilkan harga minyak sawit mentah tersebut. Antara usaha yang telah mula menampakkan hasil adalah dengan langkah peningkatan adunan biobahan api sawit dengan diesel petroleum Program Biodiesel B10 (adunan 10% biodiesel sawit dan 90% diesel petroleum) yang telah dilaksanakan secara mandatori pada 1 Februari 2019 yang lalu bagi sektor pengangkutan. Implementasi program ini telah benar-benar membantu meningkatkan penggunaan minyak sawit domestik dalam negara dengan anggaran peningkatan jumlah sebanyak 767,000 tan. Perlaksanaan program B7 bagi sektor industri pula akan bermula pada 1 Julai 2019. Ini akan meneruskan lagi impak positif tersebut terhadap industri sawit negara.

## **SOALAN NO : 16**

Selain itu, Kerajaan akan terus menjalankan misi-misi ekonomi dan lawatan teknikal bagi mengukuhkan hubungan dengan negara-negara pengimpor utama produk-produk sawit Malaysia. Kerajaan berkeyakinan melalui pendekatan hubungan mesra dan akrab dengan negara-negara luar, ianya akan memudahkan produk-produk sawit mendapat akses pasaran yang lebih meluas di negara-negara tersebut.

Untuk makluman Ahli Yang Berhormat, Malaysia pada tahun ini juga sedang mengetuai satu gabungan kerjasama bersama Indonesia menerusi Majlis Negara-Negara Pengeluar Minyak Sawit (*Council of Palm Oil Producing Countries* atau CPOPC). Kerjasama ini adalah untuk memantapkan lagi amalan persekitaran mampan, pengurusan bekalan, aktiviti promosi dan pembangunan pekebun-pekebun kecil. Dalam hal ini, Kerajaan telah merangka beberapa strategi bersama dengan Indonesia untuk mencari kaedah-kaedah yang bersesuaian untuk isu-isu semasa mengenai industri sawit.

Dalam masa yang sama, Kementerian juga akan meneruskan strategi-strategi jangka masa panjang bagi mengukuhkan harga sawit yang merangkumi tindakan-tindakan berikut:

- (i) memperkuuhkan pasaran eksport utama sedia ada terutamanya negara China, India, Pakistan, dan Amerika Syarikat serta mempromosi produk-produk sawit dengan lebih agresif bagi menembusi pasaran-pasaran baharu seperti di benua Afrika ;
- (ii) meningkatkan aktiviti penyelidikan dan pembangunan (R&D) dalam penghasilan produk-produk baharu serta memberi nilai tambah kepada produk hiliran komoditi;
- (iii) meningkatkan akses pasaran yang lebih baik melalui perundingan perjanjian perdagangan bebas (FTA) dua hala dan perundingan pelbagai hala atau serantau.

Sekian terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN SIVAKUMAR VARATHARAJU  
NAIDU  
[BATU GAJAH]**

**TARIKH : 4 JULAI 2019**

**SOALAN NO. 17**

Minta **PERDANA MENTERI** menyatakan statistik berkaitan dengan hutang isi rumah dan jumlah orang muflis mengikut kategori umur di negara kita. Apakah usaha-usaha Kerajaan untuk mengurangkan hutang isi rumah dan kadar muflis yang kian meningkat.

**JAWAPAN:**

**Yang di-Pertua,**

Untuk makluman Ahli Yang Berhormat, berdasarkan rekod Jabatan Insolvensi Malaysia (Mdl), statistik terkini sejak tahun 2015 hingga bulan April tahun 2019 menunjukkan seramai **76,698** pengutang telah diisyiharkan bankrap. Golongan umur yang mencatatkan jumlah kebankrapan yang tertinggi ialah antara 35 hingga 44 tahun pada tahun 2016 iaitu seramai **6,601** orang. Tiada rekod Jabatan ini yang mencatatkan statistik hutang isi rumah. Statistik terperinci jumlah orang muflis mengikut kategori umur tahun 2015 hingga bulan April 2019 sebagaimana dalam Jadual 1.

**Jadual 1**

**Jumlah Kes Kebankrapan Mengikut Golongan Umur Dari Tahun 2015 Hingga Bulan April 2019**

Golongan Umur	Tahun					Jumlah	Peratus
	2015	2016	2017	2018	2019		
Di bawah umur 25	122	91	80	139	24	456	<b>0.59</b>
25-34	4,648	5,183	4,785	4,139	890	19,645	<b>25.61</b>
35-44	6,507	6,601	6,241	5,958	1,508	26,815	<b>34.96</b>
45-54	4,744	4,967	4,628	4,022	967	19,328	<b>25.20</b>
55 dan ke atas	2,299	2,536	2,354	2,106	544	9,839	<b>12.83</b>
Tiada maklumat	137	210	139	118	11	615	<b>0.80</b>
<b>JUMLAH</b>	<b>18,457</b>	<b>19,588</b>	<b>18,227</b>	<b>16,482</b>	<b>3,944</b>	<b>76,698</b>	<b>100.00</b>

*Catatan : Bagi golongan umur “Tiada Maklumat”, bankrap tidak pernah hadir ke Mdl. Dokumen petisyen tidak mengandungi butiran usia bankrap (Pengenalan Polis / Tentera).*

Kerajaan pada masa kini telah mengambil beberapa langkah dan usaha bagi mengurangkan kadar muflis di Malaysia. Kerajaan juga memandang serius terhadap fenomena ini yang berpunca daripada perancangan kewangan yang lemah dan kurangnya pengetahuan mengenai pengurusan kewangan yang berhemah.

Oleh yang demikian, bagi membendung masalah ini, Mdl telah melaksanakan pelbagai program bagi mewujudkan kesedaran masyarakat tentang isu muflis dengan melaksanakan program bersama masyarakat (*outreach programme*) serta Mdl Prihatin. Program ini bertujuan untuk menyampaikan maklumat, memberikan pendidikan dan mewujudkan kesedaran kepada orang awam khususnya di kalangan anak muda termasuklah taklimat dan ceramah kesedaran mengenai isu muflis kepada agensi-agensi awam, swasta, orang awam dan pelajar-pelajar institusi pengajian tinggi awam dan swasta bagi menerangkan kesan dan akibat daripada perintah kebankrapan.

Agensi Kaunseling dan Pengurusan Kredit (AKPK) iaitu sebuah agensi di bawah Bank Negara Malaysia juga telah mengambil inisiatif dengan mengadakan program-program untuk memberi kesedaran tentang isu muflis. Program ini juga melibatkan perancangan kewangan kepada semua golongan supaya dapat menangani masalah pengurusan kewangan di peringkat pra kebankrapan. Pengurusan kewangan yang berhemah akan menjamin kedudukan kewangan di tahap yang terbaik.

Selain daripada itu, pendidikan kewangan dalam kurikulum pendidikan serta peringkat komuniti bagi meningkatkan pengetahuan pengurusan kewangan boleh diterapkan. Melalui pendidikan ini akan dapat membantu golongan belia khususnya untuk berbelanja secara berhemah dan bijak dalam pengurusan kewangan bagi mengelakkan kemuflisan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**  
**MESYUARAT KEDUA PENGGAL KEDUA,**  
**PARLIMEN KEEMPAT BELAS**

**PERTANYAAN : LISAN**

**DARIPADA : YB TUAN ABDUL LATIFF BIN ABDUL RAHMAN [ KUALA KRAI ]**

**TARIKH : 04 JULAI 2019 (ISNIN)**

**SOALAN NO. 18**

Minta **MENTERI SUMBER MANUSIA** menyatakan:-

- (a) apakah pihak Kementerian telah melaksanakan sepenuhnya gaji minima termasuk dalam sektor swasta; dan
- (b) apakah kesan pelaksanaan gaji minima ini untuk syarikat-syarikat baru dan kecil yang terpaksa membayar gaji minima dan adakah terdapat syarikat-syarikat baru dan kecil ini telah didenda dan disabitkan kes.

**JAWAPAN**

Tuan Yang di-Pertua,

1. Untuk makluman Dewan Yang Mulia ini, Kerajaan telah melaksanakan gaji minimum seragam seluruh negara pada kadar RM1,100 sebulan berkuat kuasa 1 Januari 2019. Kadar tersebut adalah terpakai kepada seluruh pekerja sektor swasta. Kementerian Sumber Manusia, melalui Jawatankuasa Teknikal Perundingan Gaji Negara (JTPGN) iaitu salah satu jawatankuasa di bawah Majlis Perundingan Gaji Negara (MPGN) sedang menjalankan Kajian Impak Pelaksanaan Gaji Minimum terhadap Perusahaan Kecil dan

## **SOALAN NO: 18**

Sederhana (PKS). Kajian ini dijangka akan selesai pada bulan September 2019 dan hasil kajian ini kelak akan dijadikan panduan kepada MPGN dan kerajaan dalam membuat keputusan berkenaan hala tuju dasar gaji minimum.

2. Bagi memastikan pelaksanaan dasar gaji minimum dipatuhi oleh semua majikan di negara ini, Akta Majlis Perundingan Gaji Negara 2011 (Akta 732) telah memberikan kuasa kepada Jabatan Tenaga Kerja Semenanjung Malaysia, Jabatan Tenaga Kerja Sabah dan Jabatan Tenaga Kerja Sarawak (JTK) untuk menjalankan penguatkuasaan dan penyiasatan berhubung pelaksanaan gaji minimum. Antara aktiviti yang dijalankan oleh Jabatan tersebut ialah pemeriksaan berkanun, aduan, kes buruh dan pendakwaan.
  
3. Dasar gaji minimum telah dikuatkuasakan sepenuhnya mulai 1 Januari 2014. Mulai dari tarikh tersebut sehingga 31 Mei 2019, sebanyak 717 kes pendakwaan telah dijalankan ke atas majikan yang tidak mematuhi gaji minimum di seluruh negara. Daripada jumlah kes pendakwaan tersebut, sebanyak 507 kes pendakwaan melibatkan majikan di Semenanjung Malaysia, 129 kes pendakwaan melibatkan majikan di Sabah dan 81 kes pendakwaan majikan di Sarawak. Jumlah denda yang telah dikenakan bagi semua kes pendakwaan yang telah selesai di seluruh negara adalah sebanyak RM1,029,150.00.
  
4. Kesimpulannya, Kerajaan melalui JTK sentiasa memantau aspek pematuhan undang-undang gaji minimum. Jika mana-mana pihak pekerja mendapati gaji minimum tidak dipatuhi oleh majikan mereka, adalah disyorkan supaya aduan dibuat di pejabat JTK yang berdekatan.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN HASSAN BIN ABDUL KARIM  
[ PASIR GUDANG ]**

**TARIKH : 4 JULAI 2019 [ KHAMIS ]**

**SOALAN NO. 19**

Minta **MENTERI HAL EHWAL EKONOMI** menyatakan apakah Kementerian ada cadangan untuk meminda Akta Tanah (Kawasan Penempatan Berkelompok) 1960 (GSA) untuk tujuan memudahkan urusan permohonan pindah milik harta tanah FELDA dari Generasi Pertama ke Generasi Kedua.

**JAWAPAN**

Tuan Yang di-Pertua,

1. Untuk makluman Ahli Yang Berhormat, Akta Tanah (Kawasan Penempatan Berkelompok) 1960 (Akta GSA) dibentangkan dalam sidang Parlimen pada 27 April 1960. Akta ini bertujuan untuk membuka kawasan penempatan berkelompok bagi membasmi kemiskinan, menyusun semula masyarakat dan membentuk keseragaman undang-undang serta polisi berkaitan pembangunan kawasan penempatan berkelompok. Ianya merangkumi syarat-syarat pemilikan dan serah hak ke atas tanah di kawasan tersebut.
  
2. Akta ini telah mengalami beberapa pindaan dalam beberapa peraturan dan sekatan-sekatan untuk disesuaikan dengan suasana perkembangan semasa yang berlaku. Kesan daripada perkembangan ekonomi dan sosio-politik semasa terhadap masyarakat di tanah-tanah

rancangan FELDA, Kerajaan telah mengambil langkah-langkah yang bersesuaian supaya Akta ini kekal relevan. Di antara pindaan Akta ini adalah:-

- i) Pindaan pada tahun 1965, antara lain melibatkan perjanjian antara agensi-agensi pembangunan tanah dengan Pihak Kerajaan Negeri, pengisytiharan kawasan penempatan berkelompok dan pembangunan tanah oleh koperasi yang dikelolakan oleh agensi pelaksana.
- ii) Pindaan pada tahun 1982, antaranya adalah berkaitan penyerahan hak pendudukan dalam kawasan menunggu hak milik dan penamatan atau pembatalan kawasan-kawasan penempatan berkelompok.
- iii) Pindaan pada tahun 2002, antaranya melibatkan Seksyen 12, 14 dan 15 yang membolehkan pegangan desa diberi milik dan boleh dimiliki secara bersama yang tidak boleh melebihi dua orang pemilik. Pindaan ini dibuat supaya isteri, bekas isteri atau waris kadim boleh didaftarkan nama secara bersama dengan peneroka dalam hak milik yang dikeluarkan atau yang masih menunggu hak milik.

3. Umumnya beberapa sekatan dalam akta berkenaan telah diwujudkan seperti Kawasan Pembangunan Persekutuan, Kuasa-kuasa FELDA, Pemberimilikan, Pegangan Desa Dengan Bayaran Tahunan Disatukan dan Pegangan Bandar bagi mengekalkannya sebagai tanah pertanian yang ekonomik, berskala besar dan berdaya saing serta membolehkan pemberian milikan tanah kepada penduduk luar bandar.

4. Walau bagaimanapun, sekatan-sekatan dalam Akta ini telah menimbulkan pelbagai isu berkaitan pewarisan dan pindah milik peneroka dan generasi baharu. Berdasarkan Akta ini, dalam apa jua keadaan, tanah FELDA hanya boleh dimiliki oleh seorang atau dua orang waris sahaja (Seksyen 14). Oleh yang demikian, apabila peneroka meninggal dunia, akan berlaku kekeliruan di kalangan ahli waris tentang pengurusan

harta pusaka, di mana mereka akan mempertikaikan siapa yang paling berhak ke atas tanah ini.

5. Sehubungan itu, FELDA telah mengambil inisiatif dengan menubuhkan jawatankuasa khas bagi meneliti semula kandungan akta berkenaan. Jawatankuasa tersebut telah mengenal pasti klausa-klausa yang berkaitan Pemilikan Tanah, Urus Niaga Tanah, Hak Milik Berangkai dan Hak Milik Bersama untuk dipertimbangkan pindaan.

6. Sebelum sebarang pindaan dibuat, FELDA perlu menjalankan kajian yang komprehensif dan mengadakan sesi libat urus dengan pemegang taruh terutamanya peneroka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN HAJAH SITI ZAILAH BINTI MOHD YUSOFF  
[ RANTAU PANJANG ]**

**TARIKH : 4 JULAI 2019 (ISNIN)**

**SOALAN NO. 20**

**Puan Hajah Siti Zailah binti Mohd Yusoff [ Rantau Panjang ]** minta **MENTERI AIR, TANAH DAN SUMBER ASLI** menyatakan bilakah projek tebatan banjir di Rantau Panjang akan bermula dan apakah langkah persediaan menghadapi limpahan air banjir kesan daripada siapnya projek tebatan banjir di sebelah negara Thailand.

**JAWAPAN**

Tuan Yang di-Pertua,

- i) Kerajaan telah meluluskan Projek Pembangunan Lembangan Sungai Bersepadu (PLSB) Sungai Golok (KESBAN) Fasa 1 untuk dilaksanakan oleh Kementerian Air, Tanah dan Sumber Air (KATS) melalui Jabatan Pengairan dan Saliran (JPS) dalam Rancangan Malaysia Ke-11 (RMKe-11) dengan siling kos projek sebanyak RM300 Juta. Projek PLSB Sungai Golok (KESBAN) Fasa 1 ini telah bermula pada 23 April 2018 dan dijangka siap pada tahun 2022 yang melibatkan Jajahan Tumpat dan Jajahan Pasir Mas. Pelaksanaan kerja-kerja di tapak adalah sebanyak 6% di mana kerja-kerja pembinaan gate di Kuala Jambu sedang dilaksanakan.
- ii) Bagi kawasan Rantau Panjang, pelaksanaan projek dijangka akan dilaksanakan dalam fasa PLSB Sungai Golok yang seterusnya (Fasa 2 / Fasa 3) sekiranya diluluskan di bawah Rancangan Malaysia Ke-12 (RMKe-12) dan Rancangan Malaysia Ke-13 (RMKe-13).
- iii) Kawasan Rantau Panjang tidak dapat dilaksanakan di dalam Fasa 1 disebabkan oleh kekangan peruntukan yang diluluskan serta keutamaan untuk mengatasi masalah banjir di kawasan Tumpat dan Pasir Mas.
- iv) Langkah persediaan bagi menghadapi limpahan air sungai adalah dengan memberi lebih perhatian terhadap pemantauan aras air sungai supaya amaran banjir dapat diberikan lebih awal bagi mengurangkan kerosakan dan kerugian akibat daripada kejadian banjir kepada penduduk.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**  
**MESYUARAT KEDUA PENGGAL KEDUA,**  
**PARLIMEN KEEMPAT BELAS**

**PERTANYAAN : LISAN**

**DARIPADA : YB TUAN WILLIAM LEONG JEE KEEN  
[ SELAYANG ]**

**TARIKH : 04 JULAI 2019 (KHAMIS)**

**SOALAN NO. 21**

Minta **MENTERI SUMBER MANUSIA** menyatakan alasan untuk pembukaan semula dasar penggantian pekerja asing melalui Memo Periksa Keluar (*Check Out Memo-COM*) dan syarat-syarat utama serta mekanisme majikan dapat penggantian pekerja asing dan pendirian terhadap cadangan perubahan dan reform oleh MTUC.

**JAWAPAN**

Tuan Yang di-Pertua,

1. Untuk makluman Yang Berhormat, Kerajaan pada 29 Mei 2019 telah bersetuju dengan pembukaan semula dasar penggantian pekerja asing melalui *Check Out Memo (COM)*. Pembukaan semula dasar ini akan membolehkan majikan mendapat gantian pekerja asing yang telah pulang ke negara asal tanpa perlu melalui proses permohonan pekerja asing yang baharu.
2. Alasan pembukaan semula dasar ini adalah mengambil kira faktor-faktor kepentingan dan daya saing industri dalam memastikan operasi perniagaan berjalan lancar dan pencapaian eksport negara

## **SOALAN NO : 21**

tidak terjejas akibat kekurangan tenaga kerja. Selain itu, dasar ini juga akan membantu mengurangkan beban pihak industri dari segi masa dalam membuat permohonan pekerja asing serta menjimatkan kos dalam membawa masuk pekerja asing baharu. Pendekatan ini tidak akan melibatkan pertambahan pekerja asing sedia ada sebaliknya mengekalkan jumlah pekerja asing yang telah diluluskan kepada majikan sebelum ini.

3. Berhubung dengan syarat-syarat pelaksanaan dasar ini, Kerajaan melalui Kementerian-kementerian berkaitan sedang membangunkan mekanisme berkaitan dan akan diwar-warkan kepada pihak industri sejurus selepas dimuktamadkan. Untuk makluman Yang Berhormat, kelulusan penggantian pekerja asing melalui dasar ini akan tetap mengambil kira keperluan sebenar majikan. Kerajaan juga menjangkakan pelaksanaan dasar ini berkuatkuasa pada 1 Julai 2019.
4. Berkenaan dengan cadangan perubahan dan *reform* oleh MTUC, Kerajaan sentiasa menghargai pandangan pihak-pihak berkepentingan dan sentiasa akan dipertimbangkan dalam membangunkan mekanisme pengurusan pekerja asing supaya lebih sistematik dan berintegriti.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN YAMANI HAFEZ BIN MUSA  
[SIPITANG]**

**TARIKH : 4 JULAI 2019**

**SOALAN NO. 22**

Minta **PERDANA MENTERI** menyatakan sejauh mana perkembangan kajian mengenai persempadanan kawasan pilihan raya oleh pihak Suruhanjaya Pilihan Raya (SPR) untuk menambah bilangan kerusi Parlimen.

**JAWAPAN:**

Yang di-Pertua,

Sepertimana Ahli-Ahli Yang Berhormat sedia maklum, urusan Kajian Semula Persempadanan bagi Negeri-Negeri Tanah Melayu telah selesai dijalankan pada tahun 2018 manakala bagi Negeri Sarawak dan Sabah pula adalah pada tahun 2015 dan 2017 masing-masing.

Untuk makluman Ahli Yang Berhormat, Perkara 113 Perlembagaan Persekutuan memperuntukkan bahawa kajian semula persempadanan hanya boleh dilaksanakan melalui dua kaedah iaitu, pertama melalui pindaan undang-undang ke atas komposisi bilangan keanggotaan Ahli Dewan Rakyat atau Ahli Dewan Undangan Negeri. Manakala, kaedah yang kedua pula adalah apabila tamat lat tempoh sekurang-kurangnya 8 tahun daripada tarikh siap kajian semula persempadanan sebelumnya. Dalam hal ini, lat tempoh 8 tahun bagi Kajian Semula Persempadanan bagi Negeri Sarawak akan berakhir pada tahun 2023, Negeri Sabah pada tahun 2025 manakala Negeri-Negeri Tanah Melayu pula pada tahun 2026.

Oleh yang demikian, sekiranya kajian semula persempadanan hendak dilaksanakan, Kerajaan perlu meminda peruntukan Perkara 113 Perlembagaan Persekutuan berkaitan dengan lat tempoh minimum suatu kajian semula persempadanan atau meminda peruntukan Perkara 46 Perlembagaan Persekutuan berkaitan komposisi Ahli Dewan Rakyat. Kedua-dua pindaan undang-undang ini perlu mendapat persetujuan 2/3 daripada jumlah Ahli Dewan Rakyat. Oleh itu, pihak Kerajaan akan meneliti opsyen yang terbaik berhubung perkara ini.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN RAMKARPAL SINGH A/L KARPAL SINGH  
[BUKIT GELUGOR - DAP]**

**TARIKH : 4 JULAI 2019 ( KHAMIS)**

**SOALAN NO. 23**

Minta **MENTERI BELIA DAN SUKAN** menyatakan secara terperinci berkenan langkah-langkah yang telah diambil oleh kerajaan untuk membangunkan skim perlindungan atlet dan bekas atlet termasuk memperkenalkan skema pencen untuk bekas atlet negara dan negeri untuk mengiktiraf sumbangan mereka kepada sukan negara.

**JAWAPAN**

Tuan Yang di-Pertua,

1. Untuk makluman Ahli Yang Berhormat, Kerajaan sentiasa menghargai jasa dan pengorbanan atlet-atlet negara yang sentiasa bekerja keras bagi mengharumkan nama negara di persada antarabangsa. Kementerian melalui Majlis Sukan Negara (MSN) menyediakan Skim Perlindungan Kemalangan Diri Berkelompok dan Skim Kebajikan Atlet Kebangsaan (SKAK) untuk atlet-atlet di bawah Program MSN.
2. **Skim Perlindungan Kemalangan Diri Berkelompok** ini meliputi perlindungan seperti bayaran bil hospital, khairat kematian, hilang upaya kekal, hilang upaya sementara, perbelanjaan perubatan, kos penghantaran balik mayat dari luar negeri, perbelanjaan pengkebumian serta kos ambulan.
3. MSN juga mengambil inisiatifnya tersendiri dengan mewujudkan **Skim Kebajikan Atlet Kebangsaan** (SKAK) untuk menjaga kebajikan atlet semasa dalam skala yang kecil. Skim ini memberi manfaat seperti khairat kematian, hilang punca pendapatan, bencana alam dan rawatan penyakit seperti penyakit kanser, serangan jantung, buah pinggang, angin ahmar, lumpuh dan kencing manis. Selain itu, SKAK ini turut memberi bantuan berupa khairat kematian kepada ahli keluarga terdekat atlet iaitu ibu, bapa, suami, isteri dan anak.
4. Untuk makluman Ahli Yang Berhormat, Skim Hadiah Kemenangan Sukan (SHAKAM) telah diperkenalkan sejak tahun 1986 bagi memberi dorongan kepada para atlet untuk meningkatkan prestasi masing-masing di peringkat antarabangsa, khususnya di temasya Sukan Olimpik, Sukan Komanwel, Sukan Asia dan Sukan SEA serta kejohanan-kejohanan individu di peringkat Asia, Komanwel dan Dunia.
5. Bagi atlet Sukan Olimpik, Skim Imbuhan Tetap Olimpik (SITO) telah diperkenalkan pada tahun 2006 bagi menghargai pengorbanan atlet-atlet negara. Pemenang-pemenang pingat di temasya Sukan Olimpik dan Paralimpik akan menerima elauan bulanan sepanjang hayat

## **SOALAN NO. 23**

mereka. Pemenang pingat emas akan menerima elauan RM5,000, pingat perak RM3,000 dan pingat gangsa RM2,000 bagi setiap bulan.

6. Yayasan Kebajikan Atlet Kebangsaan (YAKEB) ditubuhkan untuk memastikan hal-ehwal kebajikan bekas-bekas atlet dijaga dengan sebaiknya. YAKEB menyediakan skim bantuan khas seperti bantuan tunai bencana, melangsungkan perkahwinan, bantuan alatan seperti alat tiruan atau alat sokongan perubatan, pampasan kematian untuk ahli, rawatan perubatan hospital (*inpatient* dan *outpatient*) serta bantuan melanjutkan pelajaran di peringkat sijil, diploma dan ijazah. Pemegang kad *privilege* YAKEB boleh mendapatkan diskaun bagi panel-panel yang telah dilantik seperti perhotelan, restoran, pelancongan dan sebagainya.

7. Pada 27 Februari 2019, kerajaan telah bersetuju untuk memberikan suntikan dana kewangan sebanyak RM3 juta kepada YAKEB untuk memastikan hal-ehwal kebajikan bekas-bekas atlet dijaga dengan sebaiknya. Kerajaan bersetuju untuk memberikan kemudahan perubatan dan kesihatan kepada atlet dan juga bekas atlet kebangsaan seperti mana dinikmati oleh penjawat-penjawat awam. Skim Kemudahan Perubatan dan Kesihatan yang telah diperkenalkan ini akan memberikan rawatan setaraf kakitangan kerajaan bagi membela wira sukan negara. Skim ini akan membabitkan rawatan pesakit luar dan dalam hospital setaraf dengan kakitangan B kerajaan kepada 3,000 bekas atlet negara.

8. Manakala bagi atlet negeri pula, skim perlindungan dan kebajikan adalah di bawah budi bicara kerajaan negeri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN RAMLI BIN DATO' MOHD NOR,  
(CAMERON HIGHLANDS)**

**TARIKH : 4 JULAI 2019**

**SOALAN NO. 24**

**Tuan Ramli bin Dato' Mohd Nor [ Cameron Highlands ]** minta **MENTERI AIR, TANAH DAN SUMBER ASLI** menyatakan apakah tindakan yang diambil terhadap syarikat perlombongan yang menjalankan operasi perlombongan di kawasan penduduk Orang Asli Kuala Koh Gua Musang Kelantan yang tamat tempoh lesen operasinya pada tahun 2017 (beroperasi secara haram), aktiviti perlombongan haram ini secara langsung mencemarkan air yang digunakan oleh masyarakat Orang Asli setempat mengakibat risiko jangkitan penyakit dan kematian pada mereka.

**JAWAPAN**

Tuan Yang di-Pertua,

1. Pemegang pajakan melombong (ML 3/2015, Lot 14810, Mukim Relai, Daerah Chiku) bagi kawasan perlombongan tersebut adalah Cemara Desa Sdn. Bhd. dan diusahakan oleh Syabas Tiara Sdn. Bhd. bagi perlombongan bijih mangan (manganese) dengan keluasan 99.33 hektar. Kawasan pajakan melombong ini diluluskan kali pertama bagi tempoh 17 Mac 2015 sehingga 16 Mac 2018 dan telah diperbaharui bagi kali kedua bermula 17 Mac 2018 sehingga 16 Mac 2023.
2. Pada peringkat awal, kelulusan pajakan melombong kawasan ini tidak tertakluk kepada keperluan *Environmental Impact Assessment* (EIA) kerana tidak memenuhi syarat minima keluasan iaitu 250 hektar. Namun begitu, setelah pindaan ke atas Akta Kualiti Alam Sekeliling dibuat pada tahun 2015 (tarikh pindaan berkuatkuasa pada 28 Ogos 2015), kawasan ini adalah tertakluk kepada keperluan EIA.
3. Surat Kelulusan Skim Pengendalian Melombong (SKSPM) telah dikeluarkan kepada Syarikat Cemara Desa Sdn. Bhd. bermula 11 Oktober 2016 sehingga 10 Oktober 2017.

4. Pada 22 Disember 2018, lawatan oleh pihak Kementerian mendapati tiada sebarang operasi perlombongan dijalankan dan semasa pemeriksaan JMG Kelantan pada bulan Februari dan Mac 2019 juga mendapati tiada sebarang operasi perlombongan di kawasan tersebut. Namun, hasil siasatan pada 9 Jun 2019 mendapati lombong ini beroperasi tanpa kelulusan SKSPM.
5. Oleh itu, pemajak telah melanggar peruntukan di bawah Seksyen 10 Akta Pembangunan Mineral 1994 (APM). Oleh yang demikian, JMG telah mengeluarkan *stop work order* pada 10 Jun 2019 kepada Cemara Desa Sdn. Bhd. sehingga SKSPM tersebut diluluskan oleh JMG.
6. Susulan itu, satu serbuan telah dijalankan oleh pihak Kementerian melalui JMG Negeri Kelantan ke atas tapak perlombongan tersebut pada 11 Jun 2019 dan 12 Jun 2019. Pemeriksaan telah dijalankan ke atas kawasan pajakan melombong berkenaan dan telah merekodkan senarai jentera-jentera dan fasiliti lombong yang berada di tapak perlombongan berkenaan bagi tujuan siasatan lanjut.
7. Seterusnya, penyiasatan telah dibuat bagi mengenalpasti aktiviti-aktiviti berkaitan operasi perlombongan dan pemprosesan mineral serta lain-lain kerja yang telah dijalankan di tapak perlombongan tersebut. Beberapa jentera yang berada di tapak perlombongan juga telah disita dan satu rakaman keterangan saksi juga telah dibuat pada hari berkenaan.

Tuan Yang di-Pertua,

8. Berkaitan dakwaan aktiviti perlombongan telah mencemarkan sumber air yang digunakan oleh masyarakat Orang Asli (OA) sehingga mengakibatkan kematian, dakwaan tersebut setakat ini tidak dapat dibuktikan kebenarannya kerana aliran sungai yang digunakan oleh masyarakat Orang Asli dan kolam takungan yang ada di tapak perlombongan tersebut tidak bercantum antara satu sama lain iaitu berada dalam kawasan tадahan (*catchment area*) yang berbeza.
9. Selain itu, hasil keputusan analisis sampel air yang telah dijalankan oleh JMG Negeri Kelantan, Jabatan Alam Sekitar Negeri Kelantan, Jabatan Kimia dan beberapa agensi teknikal yang lain mendapati sumber air yang digunakan oleh masyarakat Orang Asli tersebut memenuhi Standard Kualiti Air Minuman Kebangsaan bagi air mentah dan bebas daripada pencemaran logam berat.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEDUA  
PARLIMEN KE-EMPAT BELAS**

**PERTANYAAN : LISAN**

**DARIPADA : TUAN WONG HON WAI [BUKIT BENDERA]**

**TARIKH : 04 JULAI 2019 (KHAMIS)**

**SOALAN NO. 25**

Minta **MENTERI PENGANGKUTAN** menyatakan berapa jumlah Lesen Kenderaan Pengangkutan Awam (*Public Service Vehicle-PSV*) yang dikeluarkan kepada pemandu-pemandu e-Hailing setakat ini dan berikan butiran mengikut negeri dan sama ada Kementerian berhasrat untuk melanjutkan tempoh untuk pendaftaran PSV untuk kenderaan e-Hailing.

**JAWAPAN**

Yang di-Pertua,

1. Untuk makluman Yang Berhormat, sehingga kini, terdapat dua puluh enam (26) syarikat e-hailing yang telah memohon lesen dan dua puluh tiga (23) telah diberikan kelulusan lesen oleh APAD untuk menjalankan perkhidmatan e-hailing. Jumlah keseluruhan kuota kenderaan e-hailing yang dipohon untuk kesemua syarikat e-hailing tersebut adalah sebanyak 165,370 kenderaan. Selanjutnya sehingga 17 Jun 2019, jumlah pemandu yang telah berdaftar di pusat latihan memandu (Institut Memandu dan e-hailing operator) adalah berjumlah 23,968 orang. Manakala yang telah lulus ujian PSV dan diberikan lesen memandu vokasional PSV adalah seramai 10,151 orang.
  
2. Untuk makluman ahli Dewan yang mulia ini, pada bulan Julai 2018, YB Menteri Pengangkutan telah memberikan tempoh moratorium selama satu (1) tahun kepada syarikat e-hailing dan pemandu e-hailing untuk membuat persediaan dan persiapan sebelum penguatkuasaan sepenuhnya pada 12 Julai 2019. Tempoh moratorium ini ada untuk memberi masa dan ruang kepada mereka yang terlibat untuk memohon lesen perniagaan pengantara (e-hailing), lesen memandu vokasional (PSV), pendaftaran kenderaan, membeli insurans tambahan dan sebagainya. Dengan itu, semua yang terlibat harus memastikan semua keperluan yang dikehendaki diselesaikan sepanjang tempoh moratorium. Buat masa ini pihak kementerian dan JPJ tidak berhasrat untuk melanjutkan tempoh moratorium yang telah ditetapkan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK HAJI AHMAD JAZLAN BIN YAAKUB  
[BN-MACHANG]**

**TARIKH : 4 JULAI 2019**

**SOALAN : 26**

**Datuk Haji Ahmad Jazlan bin Yaakub [Machang]** minta **PERDANA MENTERI** menyatakan status dan rasionalnya Kerajaan Malaysia melupuskan 16% daripada pegangan dalam IHH Healthcare oleh Syarikat Khazanah Nasional Berhad dengan jumlah RM8.42 bilion seperti yang diumumkan pada laman sesawang Khazanah pada 29 November 2018 sedangkan ianya mendatangkan keuntungan kepada pelaburan Khazanah dan negara.

**JAWAPAN: YB DATUK WIRA DR. MD FARID BIN MD RAFIK  
TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman, Ahli Yang Berhormat, pada 29 November 2018, Khazanah Nasional Bhd (Khazanah) telah mengumumkan bahawa ia telah menandatangani perjanjian dengan Mitsui & Co., Ltd. (Mitsui) untuk melupuskan 1,403,087,400 saham dalam IHH Healthcare Berhad (IHH) pada harga RM6.00 setiap saham, dengan jumlah tunai keseluruhan bernilai kira-kira RM8.42 bilion. Harga jualan tersebut adalah 20% lebih tinggi (20% premium) berbanding harga pasaran IHH Healthcare pada ketika itu. Pelupusan tersebut mewakili kira-kira 16% daripada keseluruhan saham IHH dan seterusnya mengurangkan pegangan

## **SOALAN NO. 26**

Khazanah dalam IHH kepada 26.05%. Transkasi tersebut telah berjaya dimuktamadkan pada 22 Mac 2019.

Kini, Khazanah masih memegang sebanyak 26% saham dalam IHH dan tetap merupakan antara pemegang saham terbesar dalam IHH. Sekiranya disatukan semua pegangan saham Syarikat-syarikat Pelaburan Berkaitan Kerajaan (GLIC) seperti Kumpulan Wang Simpanan Pekerja dan Kumpulan Wang Persaraan (Diperbadankan) dalam IHH, penguasaan GLIC dalam syarikat pengendali hospital tersebut melebihi 35%, mengatasi pengangan saham milik Mitsui yang berjumlah 32%.

IHH (dahulunya dikenali sebagai Integrated Healthcare Holdings Sdn Bhd) lahir daripada usaha Khazanah untuk membangunkan pelaburannya dalam sektor penjagaan kesihatan yang bermula pada tahun 2005. Pada tahun 2011, Mitsui muncul sebagai rakan strategik dengan memegang 30% saham dalam IHH. Bermula daripada itu, IHH terus berkembang maju sehingga menjadi antara syarikat pengendali hospital terbesar di dunia berdasarkan permodalan pasaran dengan operasi di beberapa buah negara termasuk Singapura, India dan Turki.

Selari dengan perkembangan operasi serta kejayaan yang dilakar, Khazanah menerima manfaat daripada pelaburannya dalam IHH menerusi peningkatan nilai syarikat berkenaan yang sekali gus menyumbang kepada pertambahan Nilai Aset Boleh Direalisasikan (NWA) Khazanah serta hasil dividen yang diterimanya setiap tahun daripada IHH.

Namun, seperti pelaburannya yang lain, hasil sebenar daripada pelaburan dalam IHH hanya dapat direalisasikan apabila Khazanah melupus atau menjual saham-saham yang dipegangnya, seperti yang dilaksanakan baru-baru ini.

Urusniaga ini adalah penting kerana ia merupakan sebahagian daripada usaha penstrukturkan semula portfolio Khazanah, seperti yang diumumkan oleh Pengarah Urusan Khazanah semasa Ulasan Tahunan Khazanah pada 5 Mac 2019. Hasil daripada pelupusan ini akan seterusnya digunakan untuk membiayai pelaburan baharu serta memenuhi keperluan

## **SOALAN NO. 26**

permodalan Khazanah, termasuk mengurangkan hutang dan pembayaran dividen kepada Kerajaan.

Hasil yang direalisasikan daripada pelupusan sebahagian pegangan Khazanah dalam IHH ini juga dijangka akan dapat menyumbang ke arah mengembalikan Khazanah ke landasan keberuntungan pada tahun kewangan 2019 selepas ia mencatatkan kerugian pada tahun kewangan 2018.

Selain IHH, pada tahun kewangan semasa, Khazanah terus mempertimbangkan peluang pelupusan aset lain yang bersesuaian sebaik sahaja aset tersebut mencapai objektif pelaburan dan pulangan sasarannya. Senarai penuh aset yang dilupuskan akan dimaklumkan semasa Ulasan Tahunan Khazanah 2019 pada suku pertama tahun 2020.

Tambahan pula, setelah peruntukan sepenuhnya bagi rosot nilai beberapa aset utama milik Khazanah seperti Malaysia Airlines Berhad dilaksanakan pada tahun 2018, yang memberikan kesan yang ketara kepada keberuntungan Khazanah pada tahun lepas, Khazanah menjangkakan akan kembali mencatatkan kentungan pada tahun 2019.

Sekian, terima kasih.

**PEMBERITAHUAN PERTANYAAN BAGI JAWAPAN LISAN**  
**MESYUARAT PERTAMA, PENGGAL KEDUA**  
**PARLIMEN KEEMPAT BELAS**

**PERTANYAAN : LISAN**

**DARIPADA : DATUK DR. JEFFREY GAPARI KITINGAN  
[ KENINGAU ]**

**TARIKH : 4 JULAI 2019 (KHAMIS)**

**SOALAN :**

**Datuk Dr. Jeffrey Gapari Kitingan [ Keningau ] minta MENTERI INDUSTRI UTAMA menyatakan :-**

- (a) apakah rancangan Kementerian untuk memperkenalkan dan menggalakkan penanaman kenaf di Sabah memandangkan kenaf boleh ditanam di sawah-sawah padi di Sabah sebagai tanaman bergiliran dengan padi; dan
- (b) apakah insentif dan bantuan Kerajaan untuk penanam-penanam kenaf dan pengusaha-pengusaha industri kenaf di Sabah dan apakah insentif dan bantuan Kerajaan untuk penanam-penanam tembakau di Sabah memandangkan masih ramai penanam tembakau di Sabah khasnya di khalayak orang asal di luar bandar.

**JAWAPAN :**

Tuan Yang Di-Pertua,

- (a) Untuk makluman, kawasan penanaman padi yang ditanam dengan kenaf secara besar-besaran adalah di negeri Pahang, Kelantan dan Perlis. Pada tahun 2018, keluasan kawasan yang terlibat adalah seluas 713 hektar. Kenaf yang dibangunkan di kawasan ini telah berjaya meningkatkan hasil pengeluaran bukan sahaja tanaman kenaf tetapi juga padi. Selain meningkatkan pendapatan, aktiviti penggiliran tanaman kenaf dengan padi juga secara tidak langsung dapat mengurangkan kos kawalan penyakit kepada pekebun kecil. Kementerian melalui LKTN akan berkerjasama dengan Kerajaan Negeri Sabah bagi mengenalpasti kawasan tanaman padi yang sesuai untuk dibangunkan dengan tanaman ini.
- (b) Dalam usaha meningkatkan minat masyarakat untuk mengusahakan tanaman kenaf, Kerajaan menyediakan insentif sebagaimana berikut:
- i. bantuan input pertanian dan perkhidmatan mekanisasi sebanyak RM2,385 sehektar untuk penghasilan fiber;
  - ii. bantuan input pertanian dan perkhidmatan mekanisasi sebanyak RM3,000 sehektar untuk penghasilan benih; dan
  - iii. jaminan belian batang kenaf (kering) pada kadar RM500 setan.

Bagi tanaman tembakau pula, Kerajaan tidak lagi menggalakan tanaman ini dan tiada bantuan/insentif yang diberikan. Perkara ini selaras dengan komitmen Malaysia terhadap WHO *Framework Convention on Tobacco Control* (FCTC).

Sekian terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI HASAN BIN ARIFIN  
[ ROMPIN ]**

**TARIKH : 4 JULAI 2019 [ KHAMIS ]**

**SOALAN NO. 28**

Minta **MENTERI HAL EHWAL EKONOMI** menyatakan adakah Kerajaan berhasrat untuk meminda Akta GSA supaya sesuai dengan keadaan semasa dalam usaha menyelesaikan masalah pengurusan FELDA dan pembahagian harta pusaka di rancangan-rancangan FELDA. Adakah wajar akta ini dilihat semula dan perlu dibuat pindaan yang sewajarnya.

**JAWAPAN**

Tuan Yang di-Pertua,

1. Untuk makluman Ahli Yang Berhormat, Akta Tanah (Kawasan Penempatan Berkelompok) 1960 (Akta GSA) dibentangkan dalam sidang Parlimen pada 27 April 1960. Akta ini bertujuan untuk membuka kawasan penempatan berkelompok bagi membasi kemiskinan, menyusun semula masyarakat dan membentuk keseragaman undang-undang serta polisi berkaitan pembangunan kawasan penempatan berkelompok. Ianya merangkumi syarat-syarat pemilikan dan serah hak ke atas tanah di kawasan tersebut.
  
2. Akta ini telah mengalami beberapa pindaan dalam beberapa peraturan dan sekatan-sekatan untuk disesuaikan dengan suasana

perkembangan semasa yang berlaku. Kesan daripada perkembangan ekonomi dan sosio-politik semasa terhadap masyarakat di tanah-tanah rancangan FELDA, Kerajaan telah mengambil langkah-langkah yang bersesuaian supaya Akta ini kekal relevan. Di antara pindaan Akta ini adalah:-

- i) Pindaan pada tahun 1965, antara lain melibatkan perjanjian antara agensi-agensi pembangunan tanah dengan Pihak Kerajaan Negeri, pengisytiharan kawasan penempatan berkelompok dan pembangunan tanah oleh koperasi yang dikelolakan oleh agensi pelaksana.
- ii) Pindaan pada tahun 1982, antaranya adalah berkaitan penyerahan hak pendudukan dalam kawasan menunggu hak milik dan penamatan atau pembatalan kawasan-kawasan penempatan berkelompok.
- iii) Pindaan pada tahun 2002, antaranya melibatkan Seksyen 12, 14 dan 15 yang membolehkan pegangan desa diberi milik dan boleh dimiliki secara bersama yang tidak boleh melebihi dua orang pemilik. Pindaan ini dibuat supaya isteri, bekas isteri atau waris kadim boleh didaftarkan nama secara bersama dengan peneroka dalam hak milik yang dikeluarkan atau yang masih menunggu hak milik.

3. FELDA telah mengambil inisiatif dengan menujuhkan jawatankuasa khas bagi meneliti semula kandungan akta berkenaan. Jawatankuasa tersebut telah mengenal pasti klausa-klausa yang berkaitan Pemilikan Tanah, Urus Niaga Tanah, Hak Milik Berangkai dan Hak Milik Bersama untuk dipertimbangkan pindaan.

4. Sebelum sebarang pindaan dibuat, FELDA perlu menjalankan kajian yang komprehensif dan mengadakan sesi libat urus dengan pemegang taruh terutamanya peneroka. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA PENGGAL KEDUA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : TUAN TAN KOK WAI [ CHERAS ]**

**TARIKH : 4 JULAI 2019 (KHAMIS)**

**SOALAN :**

**Tuan Tan Kok Wai [ Cheras ]** minta **MENTERI WILAYAH PERSEKUTUAN** menyatakan menyerangkan jumlah bayaran yang telah dibayar kepada Yayasan Wilayah Persekutuan oleh setiap rakan kongsi usahasamanya untuk semua projek usahasama dan usahaniaga dan nyatakan jumlah yang masih belum dibayarkan kepada Yayasan Wilayah Persekutuan.

**JAWAPAN**

**Tuan Yang di-Pertua,**

Untuk makluman Yang Berhormat Cheras, Yayasan Wilayah Persekutuan (YWP) adalah sebuah syarikat amanah berstatus ‘Syarikat Berhad Menurut Jaminan, Tanpa Modal Saham’.

Pecahan jumlah bayaran mengikut projek pembangunan harta tanah kepada Yayasan Wilayah Persekutuan, dari tarikh pemberimilikan tanah sehingga kini adalah seperti berikut:

<u>Telah dibayar</u>	<u>Belum dibayar</u>
RM 118,368,395	RM 63,133,405

Pecahan jumlah bayaran mengikut projek Sistem Tempat Letak Kereta Bermeter Elektronik Bahu Jalan di sekitar Wilayah Persekutuan Kuala Lumpur, dari tarikh pemberian kontrak pada tahun 2015 sehingga kini adalah seperti berikut:

	<u>Telah dibayar</u> kepada Dewan Bandaraya Kuala Lumpur (RM)	<u>Telah dibayar</u> kepada Yayasan Wilayah Persekutuan (RM)	<u>Belum dibayar</u> kepada Yayasan Wilayah Persekutuan (RM)
Sehingga Mac 2019	2,371,579.98	335,258.42	335,258.42
2018	8,839,597.88	1,249,137.25	429,451.87
2017	9,985,377.28	1,411,970.40	468,847.38
2016	7,654,774.08	1,013,330.87	840,000.00
Jul 2015 - Dec 2015	1,956,826.60	270,094.37	233,547.79
<b>JUMLAH</b>	<b>30,808,155.82</b>	<b>4,279,791.31</b>	<b>2,307,105.46</b>

Pecahan jumlah bayaran mengikut projek Pengurusan Pengiklanan Luaran YWP, dari tarikh pemberian projek pada tahun 2016 sehingga kini adalah seperti berikut:

<u>Telah dibayar</u> kepada Yayasan Wilayah Persekutuan	<u>Belum dibayar</u> kepada Yayasan Wilayah Persekutuan
RM3,774,436.00	RM2,677,966.66

**PEMBERITAHUAN PERTANYAAN LISAN DEWAN RAKYAT**

**MESYUARAT KEDUA, PENGGAL KEDUA**

**PARLIMEN KEEMPAT BELAS**

**PERTANYAAN : LISAN**

**DARIPADA : YB DATO' SRI DR. HAJI ISMAIL BIN MOHAMED SAID**

**[KUALA KRAU]**

**TARIKH : 4 JULAI 2019 (KHAMIS)**

**SOALAN NO. 30**

Minta **PERDANA MENTERI** menyatakan sejauh manakah proses penambahbaikan persidangan Dewan Rakyat telah dicapai termasuk menubuhkan beberapa Jawatankuasa. Apakah Jawatankuasa yang telah dipersetujui oleh Kabinet dan berapa Jawatankuasa yang masih dalam pertimbangan Kabinet.

**JAWAPAN:**

Yang di-Pertua,

Untuk makluman Ahli Yang Berhormat, dalam usaha-usaha ke arah mengembalikan wibawa institusi Parlimen, sebanyak enam (6) Jawatankuasa Pilihan Khas (*Special Select Committee*) telah ditubuhkan sebagai perintis berdasarkan kepentingan dan hala tuju Negara yang telah diluluskan oleh Majlis Mesyuarat Dewan Rakyat pada Khamis, 16 Ogos 2018 semasa Mesyuarat Pertama, Penggal Pertama, Parlimen Keempat Belas.

Penubuhan Jawatankuasa-jawatankuasa Pilihan Khas ini adalah supaya wujudnya satu sistem mekanisme semak dan imbang serta pengawasan (*oversight*) yang lebih menyeluruh, di samping memupuk nilai akauntabiliti dalam ketiga-tiga cabang Kerajaan: Eksekutif, Perundangan dan Kehakiman di bawah satu badan yang bebas dan bipartisan yang diletakkan di bawah kawal selia Parlimen Malaysia. Penubuhan Jawatankuasa-jawatankuasa Pilihan Khas ini juga adalah selari dengan amalan Parlimen di negara-negara luar dan sejajar dengan *Recommended Benchmarks for Democratic Legislators, Commonwealth Parliamentary Association (CPA)*.

Terdapat cadangan untuk menubuhkan beberapa Jawatankuasa Pilihan Khas yang akan dibawa ke Jawatankuasa Dewan, Majlis Dewan Rakyat Parlimen Keempat Belas bagi membincangkannya perkara ini.

Sekian, terima kasih

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' ROSOL BIN WAHID  
[ HULU TERENGGANU ]**

**TARIKH : 4 JULAI 2019**

**SOALAN : 31**

**Dato' Rosol bin Wahid [ Hulu Terengganu ]** minta **PERDANA MENTERI** menyatakan langkah-langkah yang diambil Kerajaan bagi merealisasikan cadangan YAB Perdana Menteri memperkenalkan urusan perdagangan menggunakan mata wang emas sebagaimana diucap beliau di Persidangan Antarabangsa mengenai Masa Depan Asia (Nikkei Conference), Tokyo.

**JAWAPAN: YB DATUK WIRA DR. MD FARID BIN MD RAFIK**

**TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman, Ahli Yang Berhormat sistem pertukaran mata wang asing yang diguna pakai pada masa ini terdedah kepada risiko volatiliti, aktiviti spekulatif berlebihan dan kebergantungan terhadap mata wang Amerika Syarikat dolar (USD) dalam pasaran antarabangsa. Menyedari kelemahan-kelemahan ini, konsep sistem mata wang berdasarkan emas dicetuskan sebagai alternatif bagi menanganinya.

Namun begitu, pelaksanaan sistem mata wang berdasarkan emas melibatkan hubungan perdagangan antarabangsa dan memerlukan kerjasama serta persetujuan rakan perdagangan. Sehubungan itu, Kerajaan sedang meneliti dan membuat kajian mendalam berkaitan peluang, manfaat, risiko, prasyarat, kerangka dasar dan kaedah terbaik bagi cadangan tersebut dilaksanakan supaya dapat mengelakkan pelaksanaan polisi yang tidak lengkap dan seterusnya memastikan kejayaannya.

Pada masa ini, negara kita masih menggunakan sistem pertukaran mata wang asing dalam urusan perdagangan. Bagi tujuan memastikan risiko volatiliti, aktiviti spekulatif berlebihan dan kebergantungan terhadap mata wang USD dapat ditangani dengan sebaiknya. Bank Negara Malaysia (BNM) telah pun memperkenalkan beberapa langkah. Antara langkah-langkah yang telah diambil BNM ialah peningkatan penguatkuasaan ke atas peraturan pertukaran asing sedia ada bagi mengekang aktiviti spekulasi, memastikan sistem penyelesaian perdagangan dalam mata wang tempatan serta usaha berterusan daripada BNM untuk mengurus volatiliti yang ketara dan memastikan pasaran pertukaran asing domestik mempunyai kecairan yang mencukupi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' TAKIYUDDIN BIN HASSAN  
[KOTA BHARU]**

**TARIKH : 4 JULAI 2019**

**SOALAN : 32**

**DATO' TAKIYUDDIN BIN HASSAN [KOTA BHARU]** minta **PERDANA MENTERI** menyatakan apakah punca utama berlakunya runtuhan konkrit di tapak pembinaan Terminal Bersepadu Gombak dan apakah bentuk pampasan yang telah diberikan kepada pihak keluarga mangsa.

**JAWAPAN: YB DATUK WIRA DR. MD FARID BIN MD RAFIK  
TIMBALAN MENTERI DI JABATAN PERDANA MENTERI**

Tuan Yang di-Pertua,

Sebagai makluman Ahli Yang Berhormat, kejadian runtuhan tersebut masih dalam siasatan dan penyediaan laporan siasatan oleh pihak berkuasa yang berkaitan. Sebarang tindakan lanjut akan ditentukan setelah laporan berkenaan diterima.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**  
**MESYUARAT KEDUA PENGGAL KEDUA,**  
**PARLIMEN KEEMPAT BELAS**

**PERTANYAAN : LISAN**

**DARIPADA : YB TUAN AKMAL NASRULLAH BIN MOHD. NASIR [ JOHOR BAHRU ]**

**TARIKH : 04 JULAI 2019 (KHAMIS)**

**SOALAN NO. 33**

Minta **MENTERI SUMBER MANUSIA** menyatakan usaha-usaha yang telah dijalankan bagi mengurangkan kebergantungan industri terhadap pekerja asing khususnya dalam sektor pertanian dan pembinaan.

**JAWAPAN**

Tuan Yang di-Pertua,

1. Untuk makluman Yang Berhormat, Kerajaan sentiasa proaktif dalam mengambil langkah mengurangkan kebergantungan terhadap pekerja asing serta memberi keutamaan kepada pencari kerja tempatan dalam pasaran pekerjaan negara. Berbalik kepada soalan Yang Berhormat, antara inisiatif-inisiatif yang telah dijalankan oleh Kerajaan secara menyeluruh untuk mengurangkan pekerja asing khususnya di sektor pertanian dan pembinaan adalah seperti berikut:

- (a) hanya majikan berkeupayaan (*genuine*) dan mematuhi standard perburuhan seperti pematuhan gaji minimum, menyediakan kemudahan kediaman beserta kemudahan asas dan tiada rekod pelanggaran kes buruh sahaja

## **SOALAN NO: 33**

dipertimbangkan memohon pekerja asing. Keupayaan majikan ditentukan melalui proses saringan dan pemeriksaan JTK;

(b) menetapkan *ratio* pekerja warganegara dan pekerja asing bagi menjamin peluang pekerjaan kepada rakyat Malaysia;

(c) akan melaksanakan kadar baharu bayaran levi secara progresif mengikut bilangan pekerja asing yang diperlukan oleh majikan dijangka pada tahun 2020. Pelaksanaan mekanisme ini akan mengurangkan kebergantungan industri terhadap pekerja asing ekoran daripada kos pengambilan pekerja asing yang tinggi. Selain itu, pelaksanaan mekanisme ini juga secara langsung akan menggalakkan peralihan industri ke arah mekanisasi dan automasi; dan

(d) pembiayaan latihan di bawah Pembangunan Sumber Manusia Berhad melalui caruman levi majikan untuk melatih semula pekerja bagi meningkatkan kemahiran pekerja terutamanya dalam sektor pembuatan, pembinaan dan perlombongan.

Tuan Yang di-Pertua,

Selain itu, Kerajaan juga melalui Kementerian berkaitan di bawah sektor pembinaan dan pertanian juga mempunyai inisiatif khusus dan spesifik ke arah mengurangkan kebergantungan ini melalui langkah-langkah *exit policy* seperti pelaksanaan pelan latihan kemahiran kepada pekerja warganegara, memberi keutamaan kepada mekanisme *Industrialised Building System* (IBS) dalam sektor pembinaan, peralihan kepada intensif automasi dan mekanisasi, pelaksanaan *MyGaps* iaitu amalan praktis ladang baik di Malaysia.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK SERI HAJI AHMAD BIN HAJI MASLAN  
[PONTIAN]**

**TARIKH : 4 JULAI 2019**

**SOALAN NO. 34**

Minta **PERDANA MENTERI** menyatakan jumlah terkini rakyat yang belum mendaftar mengundi mengikut kaum. Jika tiada data ikut kaum, mengapa? Adakah data itu rahsia dan mengapa, jika rahsia. Berapa peratus dan angka undi popular mengikut parti yang bertanding pada PRU 14. Jika tiada data mengikut parti, mengapa. Adakah data itu rahsia. Mengapa, jika rahsia.

**JAWAPAN:**

Tuan Yang Dipertua,

Untuk makluman Ahli Yang Berhormat, sehingga **31 Mac 2019**, jumlah warganegara yang berumur 21 tahun dan ke atas yang memenuhi syarat kelayakan tetapi belum mendaftar sebagai pemilih adalah seramai **3.99 juta orang**. Berhubung dengan penyediaan maklumat-maklumat peribadi pengundi mengikut kaum dan agama, ia adalah dilarang sama sekali untuk didedahkan kepada umum. Ini adalah selaras dengan Perkara 113 Perlembagaan Persekutuan, Seksyen 9 Akta Suruhanjaya Pilihan Raya (SPR) 1957 [Akta 31] dan Seksyen 4 Akta Perlindungan Data Peribadi 2010 [Akta 709].

Sepertimana Ahli Yang Berhormat sedia maklum, Malaysia menggunakan sistem pilihan raya majoriti mudah atau “**first past the post**” dan tidak melaksanakan sistem yang berkonsepkan undi popular. Ini bermakna mana-mana calon yang memperoleh majoriti akan diisytiharkan pemenang di bahagian pilihan raya yang berkenaan. Justeru, SPR tidak menyediakan apa-apa data berhubung peratus dan angka undi popular mengikut parti bertanding dalam Pilihan Raya Umum Ke-14 (PRU Ke-14) ataupun PRU-PRU sebelum ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN KARUPAIYA A/L MUTUSAMI**

**KAWASAN : [PADANG SERAI]**

**TARIKH : 4 JULAI 2019 (KHAMIS)**

**SOALAN NO. 35**

Minta **PERDANA MENTERI** menyatakan MITRA (Unit Transformasi Masyarakat India Malaysia) merupakan satu unit untuk pembangunan sosioekonomi masyarakat kaum India di negara ini. Apakah dasar dan perancangan MITRA bagi pembangunan masyarakat kaum India di negara ini. Apakah pencapaian oleh MITRA setakat ini terhadap kaum India sejak diambil alih dari Kerajaan dahulu. Mohon beri penjelasan.

**JAWAPAN**

Tuan Yang di-Pertua,

Untuk makluman Ahli Yang Berhormat,

MITRA telah menggariskan satu hala tuju yang komprehensif untuk membina kapasiti dan berusaha ke arah meningkatkan taraf sosioekonomi masyarakat India Malaysia. Hala tuju ini merangkumi pelbagai aspek demi membentuk masyarakat India Malaysia ke arah komuniti yang inklusif dan berdaya saing.

Bagi merealisasikan impian ini, MITRA membuat perancangan yang sewajarnya dan telah mengenalpasti beberapa program pemerkasaan dan pembangunan golongan belia, wanita dan kanak-kanak, pemantapan program pra-sekolah, sekolah rendah, menengah dan tertiar dan turut memberi kepentingan kepada aspek kerohanian dan pembangunan insaniah. Selain itu, hala tuju MITRA juga mengutamakan pewujudan peluang pekerjaan dan peningkatan dalam pendapatan yang akan memberi impak positif kepada status sosioekonomi masyarakat India Malaysia. Segala usaha ini akan membabitkan penglibatan masyarakat India Malaysia yang dikategorikan sebagai B40 dalam agenda pembangunan negara.

Program-program berimpak tinggi yang sedang atau bakal dijalankan akan dilaksanakan secara optimum dari segi kos dalam usaha meningkatkan taraf hidup, status, dan keupayaan masyarakat India secara keseluruhannya.

Pendekatan-pendekatan yang dicadangkan memberi penekanan kepada empat (4) teras sejajar dengan agenda pembangunan masyarakat India Malaysia iaitu:

- (i) Pendidikan dan Latihan
- (ii) Ekonomi dan Kerjaya
- (iii) Kebajikan dan Pembangunan Sosial
- (iv) Identiti dan Keterangkuman

## **SOALAN NO : 35**

Setakat ini, pelbagai program kerjasama bersama NGO dan agensi Kerajaan yang lain telah diwujudkan dan dilaksana sebagai satu jambatan untuk menyalurkan bantuan kepada masyarakat India Malaysia.

Untuk makluman Ahli Yang Berhormat,

Melalui fasa pertama sebanyak 38 program yang bernilai hampir RM 15 juta telah diluluskan. Manakala dalam fasa kedua pula, sebanyak 60 program yang bernilai hampir RM 16 juta telah diluluskan. Jumlah besar peruntukan yang diluluskan setakat ini oleh MITRA hampir mencecah RM 31 juta dan telah memberi peluang kepada lebih kurang 100 NGO's setakat ini untuk mengadakan pelbagai program berimpak tinggi kepada kaum India.

Bagi makluman Ahli Yang Berhormat, maklumat mengenai tahap pencapaian Unit MITRA sejak peralihan kuasa dan anjakan urus tadbir kerajaan telah di jawab pada sidang Parlimen bertarikh 1 Julai 2019 dan pada sesi-sesi mesyuarat sebelum ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN KESAVAN A/L SUBRAMANIAM  
[ SUNGAI SIPUT ]**

**TARIKH : 4 JULAI 2019 (ISNIN)**

**SOALAN . 36**

Minta **PERDANA MENTERI** menyatakan cadangan Kerajaan bagi membina rumah kos rendah untuk masyarakat Orang Asli, Sungai Siput.

**JAWAPAN**

Tuan Yang di-Pertua,

Untuk makluman, Jabatan Kemajuan Orang Asli (JAKOA) komited untuk memastikan kemudahan asas terutama keperluan rumah Orang Asli diberi perhatian sewajarnya. Berdasarkan rekod, sehingga kini sebanyak **99 unit rumah** telah dibina perkampungan Orang Asli Sungai Siput sejak tahun 2013 hingga 2018 untuk memberi keselesaan kepada penduduk Orang Asli Sungai Siput di pelbagai lokasi kampung.

Untuk makluman, peruntukan bagi pembinaan rumah kepada masyarakat Orang Asli diterima melalui peruntukan Program Perumahan Rakyat Termiskin (PPRT) di bawah Kementerian Pembangunan Luar Bandar meliputi pembinaan rumah baru dan baik pulih rumah sedia ada di seluruh perkampungan Orang Asli di seluruh negara. Berdasarkan peruntukan yang telah diluluskan, JAKOA perlu meneliti keperluan rumah mengikut keutamaan agar pembangunan seimbang dapat dilaksanakan dan bukan hanya tertumpu di sesuatu kawasan termasuk di kawasan Sungai Siput. Terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WONG CHEN [ SUBANG ]**

**TARIKH : 4 JULAI 2019**

**SOALAN : 37**

**Tuan Wong Chen [ Subang ]** minta **PERDANA MENTERI** menyatakan komitmen dan mengemukakan garis masa untuk memindahkan kuasa mutlak atas semua urusan berkaitan dengan Petronas kepada Parlimen supaya Petronas boleh menanggung segala akauntabiliti terhadap rakyat selari dengan manifesto Pakatan Harapan.

**JAWAPAN:** **YB DATUK WIRA DR. MD FARID BIN MD RAFIK**  
**TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, PETRONAS diperbadankan di bawah Akta Kemajuan Petroleum 1974 [Akta 144] dan didaftarkan sebagai sebuah syarikat di bawah Akta Syarikat 1965. Sejak penubuhannya sebagai syarikat minyak dan gas nasional, PETRONAS terus memacu kemajuan operasi dalam dan luar negara sehingga mencapai taraf antara syarikat gergasi minyak yang terkemuka dunia. PETRONAS sehingga kini terus kekal sebagai satu-satunya syarikat dari Malaysia yang tersenarai dalam *Fortune Global 500*.

PETRONAS juga sentiasa mengutamakan tadbir urus korporat yang baik. Walaupun bukan merupakan sebuah syarikat yang disenaraikan di pasaran awam, PETRONAS mengambil inisiatif untuk mengumumkan laporan

## **SOALAN NO. 37**

prestasi operasi dan penyata kewangan kumpulan pada setiap suku tahun. Komitmen terhadap ketelusan operasi syarikat telah diperkuuhkan dengan penyenaraian beberapa anak syarikatnya yang penting di Bursa Saham Kuala Lumpur.

Sebagaimana Ahli Yang Berhormat sedia maklum, PETRONAS adalah sebuah syarikat minyak milik negara (national oil company) dan bukannya public listed company. Akta Pembangunan Petroleum 1974 (PDA 1974) merupakan undang-undang yang diguna pakai dan dikuatkuasakan pada masa ini bagi tujuan cari gali petroleum di seluruh Malaysia. PETRONAS diberikan hak milik eksklusif sumber petroleum negara dan diamanahkan untuk mengurus dan memajukan sumber petroleum negara termasuk mengeksplorasi, mengeksploit, mendapatkan dan memperoleh petroleum di seluruh Malaysia. Sebagaimana termaktub dalam PDA 1974, sebagai balasan PETRONAS akan memberikan bayaran tunai (cash payment) atau royalti kepada negeri-negeri pengeluar minyak dan gas berkenaan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS (2019)**

---

**PERTANYAAN : LISAN**

**TARIKH : 04 JULAI 2019 (KHAMIS)**

**DARIPADA : TUAN FONG KUI LUN  
[ BUKIT BINTANG]**

**SOALAN NO. 38**

Minta **PERDANA MENTERI** menyatakan berapakah bilangan jawatan utama perkhidmatan awam yang telah dilantik terus oleh Perdana Menteri sejak Kerajaan Pakatan Harapan mentadbir tanpa merujuk Jawatankuasa Pilihan Khas Parlimen untuk melantik Jawatan Utama Perkhidmatan Awam dan bilakah Perdana Menteri merancang untuk menyerahkan tugas lantikan kepada jawatankuasa tersebut.

**JAWAPAN:**

1. Izinkan saya menjawab pertanyaan berkaitan isu pelantikan Jawatan Utama Perkhidmatan Awam ini, secara bersekali dengan soalan yang diutarakan oleh Ahli Yang Berhormat berikut:
  - i. YB [Ketereh] untuk dijawab pada 4 Julai 2019;
  - ii. YB [Marang] untuk dijawab pada 10 Julai 2019;
  - iii. YB [Beluran] untuk dijawab pada 16 Julai 2019; dan
  - iv. YB [Bukit Gelugor] untuk dijawab pada 16 Julai 2019.
2. Sebagaimana Ahli Yang Berhormat sedia maklum, Buku Harapan iaitu manifesto Pakatan Harapan di bawah Janji 16: Mengembalikan Wibawa Institusi Parlimen tidak menyatakan secara jelas apakah jawatan-jawatan yang diklasifikasikan sebagai Jawatan Utama Perkhidmatan Awam. Malah terma yang digunakan di dalam Buku Harapan berkenaan ialah Jawatan-jawatan penting dalam negara seperti pelantikan ke Suruhanjaya Hak Asasi Manusia, Suruhanjaya Pilihanraya Malaysia, Suruhanjaya Pencegahan Rasuah Malaysia dan Suruhanjaya Pelantikan Kehakiman Malaysia.
3. Dalam konteks ini, bagi menjawab soalan Ahli Yang Berhormat, tiada jawatan yang dilantik terus oleh YAB Perdana Menteri kerana bagi jawatan Pengurus dan ahli-ahli atau Ketua Pesuruhjaya keempat-empat Suruhanjaya yang dinyatakan tersebut, pelantikan dibuat oleh Seri Paduka Baginda Yang di-Pertuan Agong berdasarkan peruntukan Perlembagaan dan Akta masing-masing. YAB Perdana Menteri juga dalam memberi nasihat kepada Seri Paduka Baginda Yang di-Pertuan Agong (yang mana berkenaan) tidak terikat untuk merujuk kepada Jawatankuasa Pilihan Khas Parlimen kerana mekanisme yang sesuai pada masa ini masih dihalusi untuk memberikan peranan semak dan imbang kepada Jawatankuasa Pilihan Khas peringkat Parlimen terhadap pemilihan penyandang jawatan-jawatan penting berkenaan.
4. Sebagai langkah permulaan, seperti mana Ahli Yang Berhormat sedia maklum, sebanyak enam (6) Jawatankuasa Pilihan Khas (Special

Select Committee) termasuk Jawatankuasa Pilihan Khas Untuk Melantik Jawatan-Jawatan Utama Perkhidmatan Awam telah ditubuhkan sebagai perintis berdasarkan kepentingan dan hala tuju Negara yang telah diluluskan oleh Majlis Mesyuarat Dewan Rakyat pada Khamis, 16 Ogos 2018 semasa Mesyuarat Pertama, Penggal Pertama, Parlimen Keempat Belas.

5. Jawatankuasa ini mendapati bahawa proses pelantikan jawatan-jawatan utama dalam perkhidmatan awam ini adalah unik dan berbeza bagi setiap jawatan. Sehubungan itu, Jawatankuasa ini sedang mengenalpasti jawatan-jawatan yang diklasifikasikan sebagai Jawatan-jawatan Utama Perkhidmatan Awam serta mengkaji mekanisme terbaik bagi ia menjalankan fungsinya dan memainkan peranan yang jelas dalam proses pelantikan jawatan-jawatan utama tersebut yang mana dijangka memerlukan pindaan Perlembagaan dan Akta-akta berkaitan. Sehingga mekanisme dan kerangka undang-undang yang baru dibuat, prosedur sedia ada akan terus digunakan bagi memastikan urusan Kerajaan tidak terjejas.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SHAHARIZUKIRNAIN BIN ABD. KADIR  
[ SETIU ]**

**TARIKH : 4 JULAI 2019**

**SOALAN :**

**Tuan Shaharizukirnain bin Abd. Kadir [Setiu] minta PERDANA MENTERI menyatakan adakah Kerajaan berhasrat untuk menyediakan pekeliling melarang ahli politik mengadakan majlis di rumah-rumah ibadat memandangkan wujud bantahan rakyat terhadap majlis penyerahan zakat oleh ahli politik bukan beragama Islam dan penganjuran majlis berbuka puasa di kuil oleh ahli politik beragama Islam.**

**JAWAPAN : (YB DATUK SERI DR. MUJAHID BIN YUSOF,  
MENTERI DI JABATAN PERDANA MENTERI)**

Untuk makluman Ahli Yang Berhormat,

Kerajaan sentiasa peka terhadap isu-isu berbangkit yang menyentuh sensitiviti umat Islam di negara ini. Kerajaan juga sentiasa mengambil langkah-langkah yang proaktif untuk melindungi dan mempertahankan kedudukan serta kesucian Islam sebagai agama bagi Persekutuan disamping berusaha untuk mengekalkan keharmonian antara pengikut agama supaya isu-isu yang timbul tidak dieksplotasi oleh mana-mana pihak.

Sebagaimana Ahli Yang Berhormat sedia maklum, pelaksanaan aktiviti agihan zakat adalah berbeza bagi setiap negeri mengikut dasar dan pertimbangan pihak berkuasa agama Islam negeri masing-masing dan

Kerajaan Persekutuan tidak boleh mencampuri urusannya dalam perkara berkenaan.

Untuk makluman Ahli Yang Berhormat juga, perkara berkaitan penyerahan bantuan zakat oleh individu bukan Islam kepada asnaf yang dibuat oleh pemimpin politik bukan beragama Islam seperti mana yang berlaku di Pulau Pinang tempoh hari, penyerahan bantuan oleh wakil rakyat bukan Islam dilihat hanya sebagai pengantara dalam kapasiti sebagai pemimpin masyarakat semasa penyampaian bantuan tersebut, namun apa yang lebih penting adalah zakat tersebut diserahkan kepada golongan yang layak menerima zakat sebagaimana yang dinyatakan di dalam Al-Quran, dalam surah At-Taubah Ayat 60 telah menjelaskan bahawa zakat hanyalah layak diberi kepada lapan golongan asnaf iaitu fakir, miskin, amil, muallaf, fisabilillah, ibnu sabil, al-gharimin dan ar-riqab.

Kerajaan sebelum ini melalui Jabatan Wakaf, Zakat dan Haji (JAWHAR) telah menerbitkan Manual Pengurusan Agihan Zakat pada tahun 2007. Penyediaan manual ini adalah dengan kerjasama semua Majlis Agama Islam Negeri (MAIN) dan Agensi Mengurus Zakat (AMZ) sebagai panduan dan rujukan MAIN dan AMZ dalam urusan agihan zakat kepada asnaf yang berkelayakan.

Berhubung penganjuran berbuka puasa di kuil, dalam konteks di Malaysia yang merupakan negara Islam, hubungan antara agama kekal berada pada tahap yang baik dengan penganut setiap agama sejak sekian lama saling memahami sensitiviti antara satu sama lain. Ini mungkin berbeza dengan umat Islam yang tinggal di negara bukan Islam di luar negara yang perlu lebih banyak meraikan keadaan sekeliling. Justeru, kerajaan tidak berhasrat untuk mengeluarkan apa-apa pekeliling mengenai isu ini, sebaliknya menasihatkan semua pihak agar sentiasa memelihara dan menghormati sensitiviti setiap penganut agama.

Sekian, terima kasih.

**PEMBERITAHUAN PERTANYAAN BAGI JAWAPAN LISAN**  
**MESYUARAT PERTAMA, PENGGAL KEDUA**  
**PARLIMEN KEEMPAT BELAS**

**PERTANYAAN : LISAN**

**DARIPADA : DATO' NGEH KOO HAM**

**TARIKH : 4 JULAI 2019 (KHAMIS)**

**SOALAN**

**Dato' Ngeh Koo Ham [ Beruas ] minta MENTERI INDUSTRI UTAMA menyatakan berikut :-**

- (a) sama ada pengeluaran balak pokok getah mencukupi untuk permintaan dalam negara dan jika tidak mencukupi, apakah tindakan pihak Kerajaan meningkatkan pengeluaran balak pokok getah ini; dan
- (b) apakah keluasan tanah yang ditanam dengan pokok getah jenis balak (*latex timber clone*) masa kini mengikut setiap negeri.

**JAWAPAN (a):**

Tuan Yang Di-Pertua,

Secara umumnya, pokok getah yang telah ditebang akan menghasilkan kayu balak getah basah (*green logs*) yang akan diproses menjadi kayu getah bergergaji (KGB) bagi bahan mentah dalam penghasilan perabot oleh industri hiliran. Berdasarkan kajian oleh Lembaga Perindustrian Kayu Malaysia (MTIB), penggunaan KGB secara purata oleh industri hiliran dianggarkan sebanyak 600,000 m<sup>3</sup> setahun. Buat masa ini, bekalan kayu getah adalah bergantung kepada penebangan pokok getah di bawah program tanam semula getah yang dilaksanakan oleh Pihak Berkuasa Kemajuan Pekebun Kecil Perusahaan Getah (RISDA).

RISDA menyasarkan aktiviti tanam semula getah pada tahun 2019 di Semenanjung Malaysia seluas 15,520 hektar dengan anggaran hasil bahan mentah KGB sebanyak 560,000 m<sup>3</sup>. Jumlah ini adalah tidak mencukupi bagi kegunaan industri tempatan. Justeru itu, bagi menampung kekurangan KGB ini, pihak industri mengimport bekalan bahan mentah dari luar negara.

Tuan Yang Di-Pertua,

Bagi menjamin bekalan bahan mentah kayu yang mencukupi untuk industri perkayuan tempatan, Kerajaan telah memulakan program pembangunan ladang hutan (PPLH) sejak tahun 2007 dan dijangka mengeluarkan hasil tebangan mulai tahun 2021.

**JAWAPAN (b):**

Tuan Yang DiPertua,

Sehingga Mac 2019, seluas 79,448.50 hektar tanaman getah jenis balak (*latex timber clone*) telah dilaksanakan oleh Kementerian melalui Lembaga Perindustrian Kayu Malaysia (MTIB) di bawah Program Pembangunan Ladang Hutan (PPLH). Pecahan keluasan mengikut negeri adalah seperti berikut:

- i) Kelantan – 36,610.93 hektar;
- ii) Sabah – 23,865.25 hektar;
- iii) Pahang – 7,864.21 hektar;
- iv) Johor – 4,386.93 hektar;
- v) Selangor – 3,680 hektar;
- vi) Perak – 2,223.18 hektar; dan
- vii) Sarawak – 818 hektar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI DR. HAJI ISMAIL BIN  
MOHAMED SAID [ KUALA KRAU ]**

**TARIKH : 4 JULAI 2019**

**SOALAN : 42**

**Dato' Sri Dr. Haji Ismail bin Mohamed Said [ Kuala Krau ]** minta **PERDANA MENTERI** menyatakan kenapakah wujudnya perbezaan skim gaji dan perjawatan para penjawat awam di antara satu Kementerian dengan Kementerian lain.

**JAWAPAN: YB DATUK WIRA DR. MD FARID BIN MD RAFIK  
TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, prinsip pembentukan dan penetapan gaji bagi sesuatu jawatan dalam Perkhidmatan Awam tidak berdasarkan kementerian atau agensi tempat bertugas seseorang penjawat awam tetapi adalah berdasarkan kepada prinsip kadar upah untuk kerja (*rate for the job*), relativiti dan pariti, serta syarat kelayakan masuk dan latihan.

Di bawah Sistem Saran Malaysia (SSM), penentuan gaji penjawat awam adalah berdasarkan kepada skim perkhidmatan tertentu serta kelayakan akademik yang telah ditetapkan sebagai syarat lantikan ke skim perkhidmatan tersebut. Sebagai contoh, gaji bagi skim perkhidmatan

## **SOALAN NO. 42**

Akauntan gred WA41 dengan kelayakan Ijazah Sarjana Muda Perakaunan adalah RM2,820.00 (minimum) hingga RM9,585.00 (maksimum). Gaji ini adalah seragam bagi semua kementerian dan agensi di peringkat Perkhidmatan Awam Persekutuan serta turut diguna pakai oleh Perkhidmatan Awam Negeri, Badan Berkanun Persekutuan (BBP), Badan Berkanun Negeri (BBN) dan juga Pihak Berkuasa Tempatan (PBT).

Gred gaji yang berkuat kuasa pada masa ini adalah berdasarkan Pekeliling Perkhidmatan Bilangan 1 Tahun 2016. Manakala dari segi aspek perjawatan, setiap jawatan diwujudkan berasaskan kepada skop fungsi tugas sesebuah kementerian atau agensi. Faktor lain yang diambil kira dalam pewujudan jawatan adalah beban tugas dan kompleksiti tugas sesuatu jawatan.

Manakala dari segi aspek perjawatan, setiap jawatan diwujudkan berasaskan kepada skop fungsi tugas sesebuah kementerian atau agensi. Faktor lain yang diambil kira dalam pewujudan jawatan adalah beban tugas dan kompleksiti tugas sesuatu jawatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SERI DR. AHMAD ZAHID BIN HAMIDI [ BAGAN DATUK ]**

**TARIKH : 4 JULAI 2019 | KHAMIS**

**SOALAN :**

**Dato' Seri Dr. Ahmad Zahid bin Hamidi [ Bagan Datuk ]** minta **PERDANA MENTERI** menyatakan selepas pengumuman Hibah 2018 yang lalu apakah status pendeposit Tabung Haji. Adakah terdapat sebarang pengeluaran deposit yang luar biasa sehingga Jun 2019.

**JAWAPAN : (MENTERI DI JABATAN PERDANA MENTERI )**

Tuan Yang Di-Pertua,

Untuk makluman Ahli Yang Berhormat, Alhamdulillah, keyakinan pendeposit kepada Tabung Haji terus kekal dan utuh.

Selepas pengumuman Hibah 2018, yang lalu tiada sebarang pengeluaran deposit yang luar biasa sehingga Jun 2019. Keyakinan ini digambarkan melalui pertambahan bilangan pendeposit baharu dan jumlah simpanan yang konsisten.

Pendeposit baharu bagi tempoh Januari 2019 sehingga Mei 2019 adalah sebanyak 133 ribu orang dengan jumlah deposit RM83 juta. Jumlah deposit pada 31 Mei 2019 adalah berjumlah RM71.1 bilion. Sekian. Terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : YB DATO' SERI DR. AHMAD ZAHID BIN  
HAMIDI  
[BAGAN DATUK]**

**TARIKH : 4 JULAI 2019 (KHAMIS)**

**SOALAN : 44**

Minta PERDANA MENTERI menyatakan adakah pihak Kementerian melihat *Parliament Select Committee* yang ada pada ketika ini telah memainkan peranan dan berfungsi sebagaimana objektif penubuhannya.

**JAWAPAN:**

Yang di-Pertua,

Untuk makluman Ahli Yang Berhormat, dalam usaha-usaha ke arah mengembalikan wibawa institusi Parlimen, sebanyak enam (6) Jawatankuasa Pilihan Khas (*Special Select Committee*) telah ditubuhkan sebagai perintis berdasarkan kepentingan dan hala tuju negara yang telah diluluskan oleh Majlis Mesyuarat Dewan Rakyat pada Khamis, 16 Ogos 2018 semasa Mesyuarat Pertama, Penggal Pertama, Parlimen Keempat Belas.

Penubuhan Jawatankuasa-jawatankuasa Pilihan Khas ini adalah supaya wujudnya satu sistem mekanisme semak dan imbang serta pengawasan (*oversight*) yang lebih menyeluruh, di samping memupuk nilai akauntabiliti dalam ketiga-tiga cabang Kerajaan: Eksekutif, Perundangan dan Kehakiman di bawah satu badan yang bebas dan bipartisan yang diletakkan di bawah kawal selia Parlimen Malaysia. Penubuhan Jawatankuasa-jawatankuasa Pilihan Khas ini juga adalah selari dengan amalan Parlimen di negara-negara luar dan sejajar dengan *Recommended Benchmarks for Democratic Legislators, Commonwealth Parliamentary Association (CPA)*.

Peranan Jawatankuasa-jawatankuasa Pilihan Khas ini adalah tertakluk kepada terma rujukan masing-masing yang telah ditetapkan dan secara dasarnya merangkumi tiga aktiviti utama iaitu:

- (i) mengkaji atau mengawasi rang undang-undang (*legislative oversight*);

## **SOALAN NO. 44**

- (ii) pertanyaan (*inquiry*) tentang apa-apa perkara yang bersabit dengan Jawatankuasa itu; dan
- (iii) mengawasi perbelanjaan (*oversight over the finance*)

Sejak penubuhannya, Jawatankuasa-jawatankuasa Pilihan Khas ini kecuali Jawatankuasa Pilihan Khas Menimbang Rang Undang-Undang telah bermesyuarat lebih daripada dua kali bagi menjalankan fungsi-fungsinya tersendiri dan telah menetapkan rangka kerja sepanjang tahun berdasarkan terma rujukan yang telah ditetapkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PERLIMEN KEEMPAT BELAS**

---

**PERTANYAAN : LISAN**

**DARIPADA : TUAN LIM KIT SIANG [ISKANDAR PUTERI]**

**TARIKH : 4 JULAI 2019 (KHAMIS)**

**SOALAN NO. 45**

Minta **PERDANA MENTERI** menyatakan status pelaksanaan terkini secara terperinci, bagi projek menambah baik infrastruktur bekalan air terawat, bekalan elektrik, jalan berturap dan kemudahan telekomunikasi bagi kawasan penempatan Orang Asli mengikut negeri.

**JAWAPAN**

Tuan Yang di-Pertua,

Untuk makluman Yang Berhormat, Kerajaan melalui Jabatan Kemajuan Orang Asli (JAKOA) telah menambah baik infrastruktur bekalan air terawat, bekalan elektrik, jalan berturap dan kemudahan telekomunikasi di perkampungan Orang Asli di seluruh negara melibatkan 853 buah kampung.

JAKOA telah menetapkan sasaran di mana kesemua kampung akan menerima kemudahan asas yang lengkap pada tahun 2023 namun ianya bergantung kepada peruntukan yang diperolehi dan kerjasama daripada agensi dan jabatan peringkat persekutuan dan negeri.

Status kemudahan asas mengikut negeri adalah seperti berikut : -

BIL	NEGERI	JUMLAH KAMPUNG	JUMLAH PENDUDUK	JALAN		BEKALAN AIR		BEKALAN ELEKTRIK		TELE KOMUNIKASI	
				Ada	Tiada	Ada	Tiada	Ada	Tiada	Ada	Tiada
1.	PAHANG	262	67,506	227	35	217	45	206	56	178	84
2.	PERAK	255	53,299	241	14	179	76	212	43	184	71
3.	KELANTAN	118	13,457	55	63	108	10	62	56	76	42
4.	SELANGOR	74	17,587	71	3	73	1	72	2	65	9
5.	N.SEMBILAN	68	10,531	68	-	49	19	67	1	68	-
6.	JOHOR	58	13,139	58	-	54	4	55	3	58	-
7.	MELAKA	14	1,515	14	-	14	-	14	-	14	-
8.	TERENGGA NU	3	893	3	-	3	-	3	-	3	-
9.	KEDAH	1	270	1	-	1	-	1	-	1	-
<b>JUMLAH</b>		<b>853</b>	<b>178,197</b>	<b>738</b>	<b>115</b>	<b>698</b>	<b>155</b>	<b>692</b>	<b>161</b>	<b>647</b>	<b>206</b>

Sekian. Terima kasih

**NO. SOALAN: 46**

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' JOHARI BIN ABDUL  
[ SUNGAI PETANI]**

**TARIKH : 04.07.2019 ( KHAMIS )**

**SOALAN NO. 46**

Minta **PERDANA MENTERI** menyatakan apakah perkembangan terkini terhadap siasatan berhubung penggunaan dana anak yatim YaPEIM pada tahun 2017 berjumlah RM1 juta, bagi membayar yuran guaman peguam bagi membela Pembantu Mantan Perdana Menteri Dato' Seri Najib yang di bawa ke mahkamah.

**JAWAPAN:**

Untuk makluman Yang Berhormat Sungai Petani, SPRM tidak menyiasat berkaitan penggunaan dana anak yatim YaPEIM pada tahun 2017 berjumlah RM1 juta, bagi membayar yuran guaman peguam bagi membela Pembantu Mantan Perdana Menteri yang di bawa ke mahkamah.

Namun begitu, SPRM ada membuat siasatan berkaitan penggunaan wang YaPEIM oleh seorang bekas Ahli Lembaga Pemegang Amanah YaPEIM untuk membayar kos guaman beliau. SPRM mendapati tiada keterangan yang mencukupi untuk diambil tindakan lanjut di bawah Akta SPRM 2009.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**  
**DARIPADA : YB DATO' SRI HAJAH ROHANI BINTI ABDUL KARIM**  
**[BATANG LUPAR]**  
**TARIKH : 4 JULAI 2019**  
**MENJAWAB**  
**SOALAN NO. 47**

Minta **PERDANA MENTERI** menyatakan sama ada Kerajaan telah mengkaji kaitan antara perbuatan mengekori atau menghendap secara berulang dengan perbuatan jenayah serius terutamanya terhadap mangsa wanita yang telah dibunuh.

**JAWAPAN:**

Pada 30 Mei 2019, saya telah mengadakan mesyuarat bagi membincangkan dasar berhubung keperluan bagi menjadikan kesalahan menghendap sebagai suatu jenayah. Mesyuarat tersebut telah dihadiri oleh wakil-wakil daripada Pejabat Peguam Negara, agensi-agensi dan kementerian yang berkaitan serta pertubuhan bukan kerajaan.

Berdasarkan mesyuarat tersebut, satu jawatankuasa khas akan ditubuhkan bagi mengkaji cadangan dan mekanisme untuk menjadikan kesalahan menghendap sebagai suatu jenayah di negara ini. Kajian ini adalah terhad kepada keperluan bagi menjadikan kesalahan menghendap sebagai suatu jenayah dan tidak meliputi kaitan menghendap dengan jenayah lain. Persoalan sama ada hendak dikaitkan atau tidak dengan kesalahan jenayah menghendap dalam sesuatu pertuduhan membunuh adalah bergantung kepada fakta kes.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEDUA  
PARLIMEN KE-EMPAT BELAS**

---

**PERTANYAAN : LISAN**

**DARIPADA : PUAN RUSNAH BT ALUAI**

**TARIKH : 4 JULAI 2019 (KHAMIS)**

**SOALAN NO. 48**

Minta **MENTERI PENGANGKUTAN** menyatakan adakah mempunyai cadangan untuk memastikan bas-bas ekspres berhenti agar penumpang dapat mengerjakan solat dalam perjalanan mereka.

**JAWAPAN**

Yang di-Pertua,

Untuk makluman Ahli Yang Berhormat,

1. Buat masa ini, pihak kerajaan tidak menetapkan syarat untuk mewajibkan kepada semua pengendali bas ekspres berhenti semasa dalam perjalanan bagi membolehkan penumpang mengerjakan solat. Walaubagaimanpun ketika ini majoriti pengendali terutama yang menyediakan perkhidmatan perjalanan pada waktu subuh akan memberhentikan kenderaan mereka apabila tiba waktu mengerjakan solat. Bagi perjalanan yang melangkaui waktu zohor dan asar majoriti kenderaan juga akan memberhentikan kenderaan sekurang-kurangnya sekali sebelum sampai ke destinasi. Penumpang juga dibenarkan untuk meminta kepada pemandu untuk berhenti sebentar di tempat yang selamat dan menyediakan kemudahan seperti di stesen rawat dan rehat (RnR) bagi mengerjakan solat atau untuk ke tandas.

**NO. SOALAN : 48**

2. Selain itu, di bawah Kaedah 10B, Kaedah-Kaedah Lalu Lintas Jalan 1959, pemandu kenderaan perkhidmatan awam seperti bas adalah tidak dibenarkan untuk memandu melebihi empat jam atau melebihi 300 km. Pemandu tersebut hendaklah diganti dengan pemandu kedua. Sehubungan itu, kenderaan dikehendaki berhenti di tempa yang bersesuaian bagi membolehkan penggantian pemandu dilaksanakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN AHMAD FADHLI BIN SHAARI  
[PASIR MAS]**

**TARIKH : 04 JULAI 2019 (KHAMIS)**

**SOALAN :**

Tuan Ahmad Fadhli bin Shaari [Pasir Mas] minta **PERDANA MENTERI** menyatakan adakah Kerajaan bercadang untuk meningkatkan lagi bidang kuasa Mahkamah Syariah supaya dapat menjatuhkan hukuman yang lebih berat ke atas kesalahan qazaf bukan sahaja di Wilayah Persekutuan bahkan di seluruh Malaysia.

**JAWAPAN : (YB DATUK SERI DR. MUJAHID BIN YUSOF,  
MENTERI DI JABATAN PERDANA MENTERI)**

Tuan Yang di-Pertua,

Untuk makluman Ahli Yang Berhormat, Kerajaan komited dalam memperkasa dan meluaskan kuasa Mahkamah Syariah secara menyeluruh dan komprehensif. Dalam hal ini, menaikkan kadar hukuman atau bidangkuasa Mahkamah Syariah dalam bidang jenayah adalah merupakan salah satu aspek penambahbaikan untuk memperkasakan Mahkamah Syariah.

Kerajaan akur bahawa bidangkuasa Mahkamah Syariah adalah terbatas dengan peruntukan di bawah Akta Mahkamah Syariah (Bidang Kuasa

Jenayah) 1965 [Akta 355] dan kadar hukuman yang diperuntukkan di bawah Akta Kesalahan Jenayah Syariah (Wilayah-Wilayah Persekutuan) 1997 [Akta 559] adakalanya tidak setimpal dengan jenis kesalahan yang ditetapkan. Sebagai contoh, kesalahan qazaf di bawah seksyen 41 Akta 559 memperuntukkan bahawa:

*“Kecuali dalam kes li'an, mana-mana orang yang menuduh orang lain melakukan zina tanpa mengemukakan, mengikut Hukum Syarak, empat orang saksi lelaki atau iqrar orang yang dituduh itu adalah melakukan suatu kesalahan dan apabila disabitkan boleh didenda tidak melebihi lima ribu ringgit atau dipenjarakan selama tempoh tidak melebihi tiga tahun atau kedua-duanya”.*

Bagi kesalahan qazaf, pada hari ini, ia adalah terhad kepada tuduhan melakukan zina tanpa mengemukakan empat orang saksi lelaki atau iqrar orang yang dituduh. Oleh itu, untuk memastikan undang-undang sedia ada relevan dengan suasana semasa tanpa mengenepikan kehendak Hukum Syarak dan prinsip-prinsip keadilan, Kerajaan sedang dalam proses untuk menyeragamkan undang-undang kesalahan jenayah syariah negeri-negeri di seluruh Malaysia. Antara pindaan yang akan turut dipertimbangkan ialah memperuntukkan kesalahan menuduh orang melakukan maksiat seperti liwat, persetubuhan luar nikah dan musahaqah.

Selain itu, Kerajaan juga berhasrat untuk meminda Akta 355 bagi memastikan hukuman yang diperuntukkan adalah setimpal dengan kesalahan yang dilakukan. Walau bagaimanapun, ia tidak boleh dilaksanakan secara berasingan kerana aspek pemerkasaan Mahkamah Syariah terutamanya dalam bidang jenayah bukan sahaja tertumpu terhadap isu bidangkuasa atau had hukuman di bawah Akta 355 semata-mata, akan tetapi ia meliputi pelbagai aspek yang lebih penting seperti peningkatan tahap kompetensi Hakim, Pendakwa Syarie dan Pegawai Penguatkuasa Agama, penambahbaikan aspek tadbir urus dan prasarana pihak-pihak yang terlibat, penggubalan dan pindaan undang-undang Syariah sedia ada dan penyeragaman dan penyelarasannya undang-undang

Syariah. Aspek-aspek ini juga adalah penting dalam memperkasa Mahkamah Syariah.

Sehubungan dengan itu, Kerajaan sedang meneliti secara lebih mendalam dan holistik Akta 355 dan undang-undang lain yang berkaitan dengannya sebelum sebarang pindaan dan penambahbaikan dibuat terhadap Akta tersebut dan undang-undang lain yang berkaitan dengannya bagi memastikan aspek pemerkasaan Mahkamah Syariah terutama dalam aspek bidangkuasa tercapai seiring dengan aspek-aspek lain yang perlu diberi penekanan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

**PERTANYAAN : LISAN**

**DARIPADA : YB TUAN LIM KIT SIANG  
[ ISKANDAR PUTERI ]**

**TARIKH : 4 JULAI 2019**

**SOALAN NO. 50**

Minta **PERDANA MENTERI** menyatakan populasi, tahap buta huruf, kadar kelahiran, kadar kematian, kadar kematian bayi, jumlah graduan universiti mengikut tahap pencapaian pendidikan dan jumlah penjawat awam daripada suku kaum Bateq untuk setiap tahun daripada tahun 1998 hingga 2018.

**JAWAPAN**

Tuan Yang di-Pertua,

Untuk makluman Yang Berhormat, berdasarkan rekod Banci Orang Asli 2010, populasi masyarakat Orang Asli dari suku kaum Bateq adalah seramai 1,447 orang.

Tahap pencapaian pendidikan akademik suku kaum Bateq secara keseluruhan dalam tempoh tahun 1998 sehingga 2018 ialah pada tahap lemah dan buta huruf tinggi di mana tiada murid yang cemerlang di peringkat sekolah rendah dan menengah, tiada graduan universiti dan tiada yang bekerja dalam penjawat awam di dalam makluman rekod JAKOA. Manakala, berkenaan dengan rekod kadar kelahiran dan kematian, akan dimaklumkan kelak melalui pihak Kementerian Kesihatan Malaysia (KKM) dan Jabatan Pendaftaran Negara (JPN)

Untuk makluman, masyarakat Suku Bateq Orang Asli adalah masih mengekalkan cara gaya hidup tradisi semi nomad dan tahap kendiri yang sangat rendah (*inferiority complex*).

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB DATUK SERI HAJI AHMAD BIN HAJI  
MASLAN  
[PONTIAN]**

**TARIKH : 4 JULAI 2019 (KHAMIS)**

**SOALAN NO. 51**

Minta **PERDANA MENTERI** menyatakan apakah peranan PSC di Parlimen dan mengapakah pelantikan jawatan Ketua Pesuruhjaya SPRM, Ketua Polis Negara, Suruhanjaya Pilihanraya, Peguam Negara dan lain-lain yang kategori jawatan tertinggi tidak dibawa ke pengetahuan PSC terlebih dahulu. Berapa kes di bawah PSC kini dan bila akan dibawa ke pengetahuan umum.

**JAWAPAN:**

Yang di-Pertua,

Untuk makluman Ahli Yang Berhormat, dalam usaha-usaha ke arah mengembalikan wibawa institusi Parlimen, sebanyak enam (6) Jawatankuasa Pilihan Khas (*Special Select Committee*) telah ditubuhkan termasuk Jawatankuasa Pilihan Khas Untuk Melantik Jawatan-Jawatan Utama Perkhidmatan Awam sebagai perintis berdasarkan kepentingan dan hala tuju negara yang telah diluluskan oleh Majlis Mesyuarat Dewan Rakyat pada Khamis, 16 Ogos 2018 semasa Mesyuarat Pertama, Penggal Pertama, Parlimen Keempat Belas.

Jawatankuasa Pilihan Khas Untuk Melantik Jawatan-Jawatan Utama Perkhidmatan Awam berfungsi untuk meneliti pelantikan jawatan-jawatan penting dalam negara seperti pelantikan ke Suruhanjaya Hak Asasi Manusia, Suruhanjaya Pilihan Raya Malaysia, Suruhanjaya Pencegahan Rasuah Malaysia dan Suruhanjaya Pelantikan Kehakiman Malaysia bagi memastikan ia dilantik berdasarkan merit.

Untuk makluman Ahli Yang Berhormat, Jawatankuasa Pilihan Khas ini telah bermesyuarat sebanyak enam (6) kali bagi menjalankan fungsi-fungsinya dan telah menetapkan rangka kerja sepanjang tahun berdasarkan terma rujukan yang telah ditetapkan. Walau bagaimanapun, Jawatankuasa ini mendapati bahawa proses pelantikan jawatan-jawatan utama dalam perkhidmatan awam ini adalah unik dan berbeza bagi setiap jawatan. Oleh yang demikian, Jawatankuasa ini sedang mengkaji mekanisme terbaik agar dapat menjalankan fungsi dan peranan yang lebih jelas dalam proses pelantikan jawatan-jawatan utama.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SERI MAHDZIR BIN KHALID**

**KAWASAN : [PADANG TERAP]**

**TARIKH : 4 JULAI 2019 (KHAMIS)**

**SOALAN NO. 52**

minta **PERDANA MENTERI** menyatakan apakah usaha Kerajaan bagi memastikan perpaduan di antara kaum di negara ini tidak terjejas disebabkan oleh tindakan individu-individu tidak bertanggungjawab yang dengan sengaja cuba memainkan sentimen perkauman, keagamaan dan hak Bumiputera yang telah termaktub di dalam Perlembagaan negara.

**JAWAPAN**

Yang di-Pertua,

Sebagaimana kita sedia maklum, meskipun Kerajaan baharu telah pun dibentuk melebihi tempoh satu tahun selepas PRU14, masih terdapat desas-desus bahawa Malaysia di bawah pentadbiran Kerajaan Pakatan Harapan mendepani pelbagai isu dan insiden yang sukar dijangka rupa bentuknya terutama di dalam mengurus kerumitan masyarakat pelbagai kaum dan agama. Keadaan ini disebabkan oleh tindakan individu-individu yang tidak bertanggungjawab yang dengan sengaja cuba memainkan sentimen perkauman, keagamaan dan isu diskriminasi sehingga mengakibatkan perpecahan kaum dan menjelaskan keharmonian negara.

Kesatuan dan perpaduan rakyat adalah kepentingan bersama yang mesti dipelihara bersama dalam apa juga situasi yang muncul dan berkembang. Masa depan Malaysia sebagai sebuah negara bangsa yang berjaya bergantung sepenuhnya pada keupayaan masyarakatnya berfikiran terbuka, bersikap saling menghormati dan bersatu padu secara harmoni mendepani cabaran baru kehidupan.

Pelbagai inisiatif untuk mengukuhkan perpaduan nasional melalui perancangan Kerajaan telah dilaksanakan secara berterusan melalui Jabatan Perpaduan Negara dan Integrasi Nasional (PERPADUAN). Jabatan PERPADUAN telah, sedang dan akan meneruskan pelbagai usaha bagi memperkuatkan perpaduan dalam kalangan masyarakat Malaysia menggunakan pendekatan mendamping dan mendidik (*engage and educate*) melalui pelbagai program dan mekanisme seperti berikut:

- (i) Menubuhkan Majlis Perundingan Keharmonian Rakyat (MPKR) bagi memperkuatkan perpaduan dan integrasi nasional. Langkah penubuhan MPKR bertujuan mempromosikan Malaysia di peringkat global sebagai model negara moderat yang berjaya menjaga keharmonian antara kaum dan agama dan berfungsi sebagai platform untuk percambahan fikiran dan rekonsiliasi antara kaum dan agama.

- (ii) Melaksanakan perancangan inisiatif dan strategi di bawah Pelan Tindakan Perpaduan Negara (PTPN) yang inklusif merentasi semua kementerian dan agensi kerajaan dengan menetapkan program-program yang spesifik dan konkret untuk menyemarakkan perpaduan, kesepaduan dan penyatupaduan rakyat Malaysia.
- (iii) Memperkasakan kepimpinan 8,197 Jawatankuasa Rukun Tetangga di seluruh negara agar peka dan sensitif terhadap isu-isu atau gerakan-gerakan yang sengaja mengancam untuk memecahbelahkan perpaduan dan keharmonian rakyat.
- (iv) Melaksanakan program dan aktiviti mempromosikan persefahaman dan keharmonian dalam kalangan penganut pelbagai agama seperti Sambutan World Interfaith Harmony Week, International Day for Tolerance, Dialog Harmoni dan lain-lain melalui Jawatankuasa Mempromosikan Persefahaman dan Keharmonian Antara Penganut Agama (JKMPKA).
- (v) Mencari penyelesaian terhadap isu-isu perkauman dan agama yang boleh menyebabkan perpecahan kaum dan memupuk pendamaian di peringkat akar umbi melalui khidmat 1,130 orang Mediator Komuniti di seluruh negara.
- (vi) Meningkatkan penghayatan dan pengamalan prinsip-prinsip Rukun Negara kepada pelajar-pelajar sekolah di 6,628 Kelab Rukun Negara (KRN) di sekolah rendah dan menengah dan 169 Sekretariat Rukun Negara (SRN) di peringkat institusi pengajian tinggi di seluruh negara.
- (vii) Menggalakkan silang kerjaya dan kefahaman budaya di syarikat-syarikat milik bumiputera dan bukan bumiputera melalui penyertaan mahasiswa bumiputera dan bukan bumiputera melalui Program Latihan Industri Perpaduan (PLIP).
- (viii) Menyemai nilai-nilai murni kepada lebih 35,000 orang kanak-kanak di bawah umur 6 tahun melalui 1,781 buah Tabika Perpaduan di seluruh negara agar mereka dididik mengenai

kepelbagaian yang wujud dalam masyarakat negara ini sejak kecil lagi agar mereka lebih memahami dan menghayatinya apabila dewasa kelak supaya perpaduan masyarakat dan keharmonian negara terus terpelihara.

- (ix) Menyebarluaskan mesej dan slogan perpaduan agar membudayakan perpaduan dan meraikan kepelbagaian melalui penglibatan syarikat-syarikat swasta, GLCs dan badan bukan kerajaan (NGO).
- (x) Menganjurkan program dan aktiviti perpaduan dan kebudayaan pelbagai kaum secara berterusan yang bertujuan membentuk sebuah bangsa Malaysia yang bersatu padu dengan memberi penekanan untuk meningkatkan kesedaran, penghayatan dan amalan nilai-nilai murni kepada kumpulan sasar seperti kanak-kanak, pelajar, belia, wanita dan akhirnya merangkumi semua lapisan masyarakat.

Jabatan PERPADUAN selaku agensi peneraju dalam memelihara keharmonian dan memperkuatkannya perpaduan masyarakat pelbagai kaum di negara ini terus komited melaksanakan pelbagai program yang melibatkan anggota komuniti dari pelbagai peringkat umur di negara ini. Pelaksanaan program-program sedemikian akan membuka ruang yang lebih luas kepada rakyat untuk berinteraksi kerana interaksi adalah asas kepada pembentukan perhubungan manusia yang akhirnya akan melahirkan bibit-bibit perpaduan dan rasa kekitaan. Justeru, adalah menjadi harapan kerajaan agar melalui usaha-usaha di atas, semangat perpaduan dapat dipupuk merentasi segenap lapisan masyarakat dengan menerapkan sikap saling menghormati, bertoleransi dan menerima serta menghargai kepelbagaian yang wujud di negara ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**TARIKH : 4 JULAI 2019 (KHAMIS)**

**DARIPADA : TUAN AHMAD FAHMI BIN MOHAMED FADZIL**

**SOALAN NO. 53**

Minta **PERDANA MENTERI** menyatakan tahap kemajuan langkah-langkah reformasi institusi seperimana yang terkandung di dalam manifesto Pakatan Harapan.

**JAWAPAN:**

Yang di-Pertua,

1. Kerajaan amat komited dalam memacu reformasi melalui pemerkasaan governans, integriti dan antirasuah di semua peringkat bagi mengembalikan keyakinan rakyat terhadap pentadbiran Kerajaan. Justeru, Kerajaan telah menubuhkan Pusat Governans, Integriti dan Anti-Rasuah Nasional (GIACC) yang diberikan mandat untuk menasihati, merancang, menyelaras dan menilai inisiatif-inisiatif berkaitan governans, integriti dan antirasuah. Satu Jawatankuasa Khas Kabinet Mengenai Anti-Rasuah (JKKMAR) yang dipengerusikan oleh YAB Perdana Menteri telah ditubuhkan bagi menyelaras pelaksanaan, memantau dan menilai keberkesanan semua inisiatif berkaitan governans, integriti dan antirasuah di semua sektor sama ada Kerajaan mahupun swasta. Usaha ini memerlukan satu rancangan bersepadu dan menyeluruh. Justeru, Kerajaan telah mewujudkan Pelan Antirasuah Nasional (NACP) 2019 – 2023 bagi menggabungkan semua usaha mengenai governans, integriti dan antirasuah di bawah satu pelan bersepadu.

2. Antara inisiatif yang telah digariskan dalam NACP termasuklah usaha pembaharuan institusi seperti berikut:

- i) Mereformasi sistem perundangan dan pilihanraya;
- ii) Mentransformasikan Suruhanjaya Integriti Agensi Penguatkuasa (SIAP) kepada Suruhanjaya Bebas Aduan dan Salah Laku Polis (IPCMC) bagi menangani isu integriti dan mengekang salah laku anggota Polis Diraja Malaysia;
- iii) Akauntabiliti SPRM kepada Parlimen;
- iv) Menambahbaik keberkesanan institusi sistem perundangan dan kehakiman iaitu memastikan pengasingan kuasa yang jelas dalam memartabatkan keadilan, iaitu kuasa pendakwaraya hendaklah diasingkan daripada kuasa Peguam Negara;
- v) Mereformasi Biro Pengaduan Awam (BPA) kepada Ombudsman Malaysia agar dapat bertindak sebagai *oversight mechanism* yang berkesan; dan
- vi) Penubuhan *National Financial Crimes Centre* (NFCC) yang bertanggungjawab dalam penyiasatan jenayah kewangan terancang serta menguruskan aset sitaan dan lucuthak.

3. Sehubungan itu, kajian terperinci sedang dilaksanakan oleh Kerajaan sebelum sebarang pembaharuan dibuat terhadap beberapa undang-undang sedia ada bagi tujuan pembaharuan institusi di atas bagi memastikan prinsip kedaulatan undang-undang dan mekanisme pelaksanaan institusi yang berkesan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : YB DATO' DR. SHAMSUL ANUAR BIN HAJI NASARAH**  
**[LENGGONG]**

**TARIKH : 4 JULAI 2019**

**MENJAWAB**

**SOALAN NO. 54**

Minta **PERDANA MENTERI** menyatakan adakah Kerajaan akan mengkaji semula undang-undang seksyen 377B dan undang-undang 377C agar hukuman lebih berat diberikan kepada pesalah seks luar tabii agar ianya menjadi pengajaran kepada masyarakat.

**JAWAPAN**

Pada masa ini, tiada cadangan untuk mengkaji peruntukan hukuman bagi kesalahan di bawah seksyen 377B dan seksyen 377C Kanun Keseksaan [Akta 574] kerana hukuman yang diperuntukkan dalam kedua-dua seksyen tersebut adalah mencukupi. Seksyen 377B memperuntukkan hukuman penjara sehingga dua puluh tahun dan juga sebatan. Seksyen 377C pula memperuntukkan hukuman penjara tidak kurang dari lima tahun dan tidak melebihi dua puluh tahun dan juga sebatan.

***Punishment for committing carnal intercourse against the order of nature***

**377B.** *Whoever voluntarily commits carnal intercourse against the order of nature shall be punished with imprisonment for a term which may extend to twenty years, and shall also be punished with whipping.*

***Committing carnal intercourse against the order of nature without consent, etc.***

**377C.** *Whoever voluntarily commits carnal intercourse against the order of nature on another person without the consent, or against the will, of the other person, or by putting the other person in fear of death or hurt to the person or any other person, shall be punished with imprisonment for a term of not less than five years and not more than twenty years, and shall also be punished with whipping.*

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SRI ABDUL AZEEZ BIN ABDUL RAHIM [ BALING ]**

**TARIKH : 4 JULAI 2019 | KHAMIS**

**SOALAN**

**Dato' Sri Abdul Azeez bin Abdul Rahim [ Baling ]** minta **PERDANA MENTERI** menyatakan sejauh manakah status semasa rundingan permohonan mendapatkan kuota tambahan bagi jemaah haji Malaysia untuk menunaikan ibadah haji pada tahun ini.

**JAWAPAN : (MENTERI DI JABATAN PERDANA MENTERI )**

Tuan Yang Di-Pertua,

Untuk makluman Ahli Yang Berhormat, kuota rasmi Malaysia untuk musim haji tahun ini adalah 30,200 orang. Seperti tahun-tahun sebelum ini, Kerajaan Malaysia telah membuat permohonan rasmi kepada Kerajaan Arab Saudi untuk mendapatkan kuota tambahan bagi membolehkan lebih ramai umat Islam Malaysia menunaikan haji.

Permohonan kuota tambahan bagi Musim Haji 1440H/2019M telahpun dibuat dan setakat 3 Julai 2019, keputusannya belum diperolehi daripada Kerajaan Arab Saudi. Apa pun usaha untuk mempertingkatkan lagi jumlah kuota haji semasa, kelulusan kuota haji tahunan daripada Arab Saudi untuk setiap negara termasuk Malaysia adalah terletak kepada kuasa mutlak Raja Arab Saudi. Sekian. Terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SERI HISHAMMUDDIN BIN TUN  
HUSSEIN [ SEMBRONG ]**

**TARIKH : 4 JULAI 2019 [ KHAMIS ]**

**SOALAN NO. 56**

Minta **MENTERI HAL EHWAL EKONOMI** menyatakan apakah langkah Kerajaan untuk memastikan usaha melestarikan FELDA dicapai sepetimana yang terkandung dalam kertas Putih FELDA.

**JAWAPAN**

Tuan Yang di-Pertua,

1. Untuk makluman Ahli Yang Berhormat, Kementerian telah menubuhkan Jawatankuasa Tindakan Pelaksanaan Model FELDA Baharu yang terdiri daripada wakil kementerian dan agensi Kerajaan serta NGO yang berkaitan bagi memastikan usaha melestarikan FELDA seperti yang terkandung dalam Kertas Putih tercapai. Jawatankuasa ini bertanggungjawab untuk menyelaras dan memantau strategi penambahbaikan serta lima (5) program dan projek utama yang dirangka di bawah Model FELDA Baharu berdasarkan peruntukan RM 6.23 bilion yang akan disalurkan secara berperingkat sehingga 2025.

2. Di samping itu, sebuah Jawatankuasa Khas yang dipengerusikan secara bersama oleh Ketua Setiausaha Kementerian Hal Ehwal Ekonomi dan Ketua Setiausaha Kementerian Pertanian dan Industri Asas Tani telah ditubuhkan secara usahasama strategik bagi memastikan objektif Program Pembangunan Peneroka (PPP) Bagi Hasil

## **SOALAN NO : 56**

Baharu tercapai. Melalui kerjasama ini, peneroka digalakkan untuk menceburkan diri dalam aktiviti pertanian dan ternakan yang menggunakan teknologi baharu seperti '*smart farming*' dan '*precision agriculture*'. Strategi ini dijangka dapat mengurangkan kebergantungan peneroka kepada hasil sawit serta meningkatkan pendapatan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KE-EMPAT BELAS**

---

**PERTANYAAN : LISAN**

**DARIPADA : TUAN SYED IBRAHIM BIN SYED NOH  
[ LEDANG ]**

**TARIKH : 4 JULAI 2019 (KHAMIS)**

**SOALAN NO. 57**

Minta **MENTERI PENGANGKUTAN** menyatakan adakah Kementerian akan membantu golongan berpendapatan rendah atau golongan B40 untuk menggalakkan mereka memasang kerusi keselamatan kanak-kanak setelah Kerajaan mewajibkan penggunaan kerusi keselamatan kanak-kanak.

**JAWAPAN**

Yang di-Pertua,

1. Seperti sedia maklum, Pihak Kerajaan akan mewajibkan peraturan pemasangan kerusi keselamatan bayi dalam setiap kereta persendirian pada tahun 2020. Pihak Kementerian Pengangkutan sedang dalam proses meminda perundangan yang berkaitan bagi membolehkan perkara ini dikuatkuasakan.
2. Pihak Kementerian mengambil maklum akan pertanyaan tentang bantuan kepada golongan B40 untuk memperoleh kerusi bayi/ kanak-kanak ini. Dalam hubungan ini, pihak Kementerian Pengangkutan telah pun mengemukakan cadangan kepada Kementerian Kewangan agar tidak mengenakan Cukai Jualan dan Perkhidmatan terhadap pembelian kerusi keselamatan bayi supaya harganya lebih murah bagi diperoleh oleh semua lapisan masyarakat. Pihak Kementerian berharap supaya cadangan ini akan dapat dipertimbangkan oleh Kementerian Kewangan.
3. Namun pihak Kementerian ingin mengingatkan di sini bahawa keselamatan jalan raya adalah tanggungjawab semua pihak termasuk pihak swasta dan orang ramai. Pihak swasta terutamanya pengeluar-pengeluar kenderaan serta NGO-NGO yang berkaitan dipohon untuk turut serta dalam membantu pihak Kerajaan dalam usaha untuk mewajibkan pemasangan kerusi kanak-kanak di dalam kenderaan.
4. Setakat ini, telah terdapat pihak swasta yang telah memberikan subsidi pembelian kerusi kanak-kanak ini kepada golongan yang kurang berkemampuan. Pihak Kementerian berharap supaya usaha ini dapat diperluaskan oleh pihak-pihak lain bagi memastikan jalan raya di Malaysia yang lebih selamat.

Sekian terima kasih.

PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS

---

**PERTANYAAN :** LISAN

**DARIPADA :** DATO' SRI ISMAIL SABRI BIN YAAKOB [ BERA ]

**TARIKH :** 4 JULAI 2019 | KHAMIS

**SOALAN :**

**Dato' Sri Ismail Sabri bin Yaakob [ Bera ]** minta **PERDANA MENTERI** menyatakan secara terperinci syarikat-syarikat Tabung Haji (**TH**) yang mengalami kerugian dan berapakah jumlah kerugian yang dialami.

**JAWAPAN :** (**MENTERI DI JABATAN PERDANA MENTERI**)

Tuan Yang Di-Pertua,

Untuk makluman Ahli Yang Berhormat, pada masa sekarang, Lembaga Tabung Haji (**TH**) mempunyai 16 anak-anak syarikat. Adalah lebih tepat untuk memahami secara menyeluruh dasar pelaburan **TH**. Semua pelaburan yang diceburi oleh **TH** adalah selaras dengan strategi dan dasar pelaburan **TH** iaitu pelaburan yang halal, berdaya saing, dengan risiko terkawal dan berpotensi memberi pulangan yang kompetitif.

Berikut adalah status semasa pretasi kesemua 16 anak-anak syarikat **TH** berdasarkan sektornya yang berikut :

No	Syarikat	Sektor	Prestasi
1	<b>TH</b> Properties Sdn Bhd	Hartanah	Untung
2	LTH Property Holdings Ltd	Hartanah	Untung

## NO. SOALAN: 58

No	Syarikat	Sektor	Prestasi
3	LTH Property Holdings 2 Ltd	Hartanah	Untung
4	BIMB Holdings Berhad	Kewangan	Untung
5	<b>TH</b> Travel & Services Sdn Bhd	Hospitaliti	Untung
6	<b>TH</b> Plantation Berhad	Perladangan	Rugi
7	<b>TH</b> Estates (Holdings) Sdn Bhd	Perladangan	Rugi
8	Deru Semangat Sdn	Perladangan	Rugi
9	LTH Property Investment (L) Inc	Hartanah	Rugi
10	<b>TH</b> Indopalms Sdn Bhd	Perladangan	Rugi
11	<b>TH</b> Indo Industries Sdn Bhd	Perladangan	Rugi
12	Premia Card Sdn Bhd	Kewangan	Rugi
13	<b>TH</b> Hotel & Residence Sdn Bhd	Hospitaliti	Rugi
14	Theta Edge Berhad	Teknologi	Rugi
15	<b>TH</b> Marine Sdn Bhd	Marin	Rugi
16	<b>TH</b> Marine Holdings (L) Inc	Marin	Rugi

Untuk memastikan kedudukan **TH** dan anak-anak syarikat **TH** ini kembali pulih, pihak Kerajaan dan pengurusan **TH** telah mengambil langkah pengukuhan seperti berikut:

**1) Pengukuhan tadbir urus**

- Pengawalseliaan Bank Negara Malaysia bagi memastikan tadbir urus dan pengurusan pelaburan risiko yang lebih berhemat demi kepentingan awam.
- Laporan setiap suku tahun bagi memastikan pendeposit dapat mengikuti prestasi semasa **TH**

**2) Penjanaan Pendapatan yang lebih mampan**

- Pelaksanaan penilaian dan penstrukturran semula semua aset pelaburan, terutamanya anak-anak syarikat **TH**.
- Mewujudkan komposisi Aset Alokasi strategi lebih berhemat dan kenyataan pengambilan risiko (*risk appetite statement*) untuk menjadi panduan pelaburan .

**3) Pengurusan yang lebih berkhemat**

- Mengukuhkan pengurusan risiko serta amalan pelaburan yang lebih berhemat dengan melaksanakan amalan pengurusan risiko terbaik.

**4) Rasionalisasi kos**

- Kajian menyeluruh kos pengurusan dan operasi Haji serta mekanisma terbaik
- Memanfaatkan sinergi diantara anak syarikat **TH** bagi mengawal kos operasi dalam meningkatkan kualiti perkhidmatan

Sekian. Terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI HASAN BIN ARIFIN [ ROMPIN ]**

**TARIKH : 4 JULAI 2019 | KHAMIS**

**SOALAN :**

**Dato' Sri Hasan bin Arifin [ Rompin ]** minta **PERDANA MENTERI** menyatakan dalam menyediakan akaun Tabung Haji bagi tahun 2018, sejumlah 19.9 bilion telah dipindahkan ke Syarikat SPV iaitu UJSB manakala sejumlah 1.507 bilion telah diperuntukkan rosot nilai bagi akaun berakhir 2018. Senarai harta, saham, perniagaan yang telah dirosot nilai.

**JAWAPAN : (MENTERI DI JABATAN PERDANA MENTERI )**

Tuan Yang Di-Pertua,

Untuk makluman Ahli Yang Berhormat, aset-aset **TH** yang mengalami kejatuhan nilai dan memberi pulangan yang rendah berjumlah RM9.7 bilion telah dipindahkan kepada syarikat bertujuan khas (SPV), milik penuh Kerajaan Malaysia dengan nilai pemindahan sebanyak RM19.9 bilion.

**TH** telah membuat peruntukan kerugian rosot nilai termasuk jangkaan kerugian kredit bagi tahun kewangan berakhir 31 Disember 2018 berjumlah RM1.5 bilion melibatkan pelaburan-pelaburan dan sektor perladangan, harta tanah, pembinaan, marin dan gas dan lain-lain, seperti berikut:

Bil.	Sektor	Jumlah Rosot Nilai (RM'Juta)
1.	Perladangan - Trurich Sdn Bhd - Deru Semangat Sdn Bhd - TH Plantations Berhad - TH Indopalms Sdn Bhd	685
2.	Harta tanah & Pembinaan - THCC KLIA Sepang (Movenpick Hotel) - TH Properties Sdn Bhd - Putrajaya Perdana Berhad - LTH Property Holdings - Pelunasan prabayaran harta tanah milik pajak	672
3.	Marin & gas - TH Marine Holdings Sdn. Bhd.	103
4.	Lain-lain	47
	<b>Jumlah</b>	<b>1,507</b>

Sekian. Terima kasih

**PEMBERITAHUAN PERTANYAAN BAGI JAWAPAN LISAN**  
**MESYUARAT PERTAMA, PENGGAL KEDUA**  
**PARLIMEN KEEMPAT BELAS**

**PERTANYAAN** : **LISAN**

**DARIPADA** : **PUAN NOR AZRINA BINTI SURIP**  
**[ MERBOK ]**

**TARIKH** : **4 JULAI 2019 (KHAMIS)**

**SOALAN** :

**Puan Nor Azrina binti Surip [ Merbok ]** minta **MENTERI INDUSTRI UTAMA** menyatakan langkah proaktif Kerajaan untuk membantu pekebun kecil mengeksport lebihan minyak sawit mentah secepat mungkin dalam tempoh pengecualian duti eksport minyak sawit mentah.

**JAWAPAN :**

Tuan yang Dipertua,

Kerajaan telah mengumumkan penangguhan duti eksport minyak sawit mentah sehingga 31 Disember 2019. Penangguhan ini dijangka akan menggalakkan aktiviti eksport minyak sawit mentah ke negara luar dan seterusnya akan merancakkan lagi rantai industri sawit negara terutamanya sektor huluan. Ini secara langsung akan meningkatkan harga minyak sawit mentah dan seterusnya peningkatan harga buah tandan segar (FFB). Langkah proaktif ini dijangka akan memberi kesan kepada pekebun kecil sawit yang bergantung kepada hasil penjualan FFB.

Selain itu, Kerajaan juga telah merealisasikan perjanjian persefahaman (MoU) antara 4 syarikat Malaysia bersama 3 syarikat China bersempena Forum Perniagaan Minyak Sawit Malaysia-China pada 4 Mac 2019. Hasil perjanjian ini akan meningkatkan jumlah pengambilan minyak sawit Malaysia ke China iaitu sebanyak 1,074,000 tan metrik. Kementerian yakin China akan terus mendapatkan lebih banyak minyak sawit dari Malaysia untuk memenuhi permintaan yang semakin meningkat. Ini dibuktikan dengan perjanjian persefahaman (MoU) yang ditandatangani pada 26 April 2019 berkaitan dengan tambahan jumlah pengambilan minyak sawit Malaysia oleh China sebanyak 1.9 juta tan metrik dalam tempoh 5 tahun. MoU tersebut turut disaksikan oleh YAB Perdana Menteri Malaysia bersama Perdana Menteri China, Li Keqiang.

Tuan yang Dipertua,

Kerajaan juga mengambil inisiatif meningkatkan adunan biobahan api sawit dengan diesel petroleum melalui Program Biodiesel B10 (adunan 10% biodiesel sawit dan 90% diesel petroleum) yang telah dilaksanakan secara mandatori pada 1 Februari 2019 bagi sektor pengangkutan dan Program Biodiesel B7 mulai 1 Julai 2019 bagi sektor industri. Program ini membantu meningkatkan penggunaan domestik minyak sawit negara dan seterusnya akan mengukuhkan harga sawit di pasaran.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATO' HAJI MOHD FASIAH BIN HAJI MOHD FAKEH [SABAK BERNAM]**

**TARIKH : 04 JULAI 2019 (KHAMIS)**

**SOALAN :**

**Dato' Haji Mohd Fasiah bin Haji Mohd Fakeh [Sabak Bernam]** minta **PERDANA MENTERI** menyatakan langkah Kerajaan untuk memastikan agama Islam terus dipelihara, dipertahankan dan diperkasakan sebagai agama Persekutuan sebagaimana Perkara 3 Perlembagaan Persekutuan termasuk langkah Kerajaan untuk menyeragamkan undang-undang Islam bagi seluruh negeri-negeri di dalam Persekutuan.

**JAWAPAN: (YB DATUK SERI DR. MUJAHID BIN YUSOF, MENTERI DI JABATAN PERDANA MENTERI)**

Tuan Yang di-Pertua,

Untuk makluman Ahli Yang Berhormat, Perkara 3(1) Perlembagaan Persekutuan telah meletakkan Islam sebagai agama bagi Persekutuan sebagaimana yang berikut :

*“Islam ialah agama bagi Persekutuan; tetapi agama-agama lain boleh diamalkan dengan aman dan damai di mana-mana bahagian Persekutuan.”*

Dalam perkara ini, Kerajaan sentiasa komited untuk mengambil langkah bagi memastikan agama Islam terus terpelihara, dipertahan dan diperkasakan. Salah satu aspek yang diberi penekanan adalah pemerksaan, penyelarasan dan penyeragaman undang-undang syariah.

Sehingga hari ini, terdapat lima (5) undang-undang syariah utama yang telah diseragamkan oleh negeri-negeri di seluruh Malaysia iaitu:

- a) undang-undang pentadbiran agama Islam;
- b) undang-undang keluarga Islam;
- c) undang-undang keterangan mahkamah syariah;
- d) undang-undang tatacara mal mahkamah syariah; dan
- e) undang-undang tatacara jenayah syariah.

Kerajaan juga sentiasa berusaha untuk menggubal draf model undang-undang syariah bagi tujuan penyelarasan dan penyeragaman undang-undang negeri-negeri di seluruh Malaysia. Antaranya, Kerajaan sedang dalam proses untuk menyeragamkan undang-undang kesalahan jenayah syariah negeri-negeri seluruh Malaysia dari segi jenis kesalahan, jenis hukuman dan kadar hukuman.

Selain itu, beberapa penambahan peruntukan yang baharu akan turut dibuat, antaranya peruntukan yang memberikan budi bicara kepada mahkamah syariah untuk membuat perintah-perintah yang bersifat pemulihan (rehabilitative) agar undang-undang kesalahan jenayah syariah negeri-negeri yang seragam kelak tidak dilihat hanya bersifat menghukum (punitive) semata-mata.

Terdapat juga beberapa penambahbaikan lain yang akan turut digubal, antaranya dengan memasukkan atau memperkemaskan elemen-elemen kesalahan bagi kesalahan-kesalahan tertentu. Penambahbaikan tersebut dibuat bagi memudahkan pihak penguatkuasaan mengumpul keterangan dan pihak pendakwaan membuktikan sesuatu kes di mahkamah.

Sekian, terima kasih.

**NO. SOALAN : 62**

**PEMBERITAHUAN PERTANYAAN LISAN DEWAN RAKYAT**

**MESYUARAT KEDUA, PENGGAL KEDUA**

**PARLIMEN KEEMPAT BELAS**

**PERTANYAAN : LISAN**

**DARIPADA : YB TUAN HAJI WAN HASSAN BIN  
MOHD RAMLI**

**[ DUNGUN ]**

**TARIKH : 4 JULAI 2019  
MENJAWAB**

**SOALAN NO. 62**

Minta **PERDANA MENTERI** menyatakan status kes inkues Mohd Adib Bin Abu Kasim setakat ini.

## **JAWAPAN**

1. Kes ini ditetapkan untuk sambung bicara pada 3 hingga 5 Julai 2019 dan 16 hingga 17 Julai 2019.
2. Tiga orang Peguam Kanan Persekutuan daripada Jabatan Peguam Negara akan mewakili Kementerian Perumahan dan Kerajaan Tempatan dan Jabatan Bomba dan Penyelamat Malaysia.
3. Peguam yang mewakili keluarga si mati akan memanggil semula Prof. Dr. Shahrom bin Abd Wahid untuk memberikan keterangan lanjut pada tarikh-tarikh perbicaraan yang telah ditetapkan.
4. Koroner juga telah meminta pihak-pihak untuk menamakan pakar fizik yang akan hadir untuk memberikan keterangan di mahkamah bagi menjelaskan isu pengiraan daya kuasa yang terkena kepada si mati akibat dilanggar oleh van Unit Bantuan Perkhidmatan Kecemasan (EMRS).

Sekian, terima kasih .

**PEMBERITAHUAN PERTANYAAN BAGI JAWAPAN LISAN**  
**MESYUARAT PERTAMA, PENGGAL KEDUA**  
**PARLIMEN KEEMPAT BELAS**

**PERTANYAAN** : **LISAN**

**DARIPADA** : **DATO' MOHD. NIZAR BIN HAJI ZAKARIA [ PARIT ]**

**TARIKH** : **4 JULAI 2019 (KHAMIS)**

**SOALAN** :

**Dato' Mohd. Nizar bin Haji Zakaria [ Parit ]** minta **MENTERI INDUSTRI UTAMA** menyatakan :-

- (a) apakah rasional Kementerian mengehadkan keluasan tanaman sawit negara kepada 6.5 juta hektar menjelang 2023; dan
- (b) adakah tindakan mengehadkan keluasan itu akan menjaskan pendapatan lebih 500,000 pekebun kecil dan ekonomi negara.

**JAWAPAN (a):**

Tuan Yang Di-Pertua,

Aktiviti penanaman sawit negara sering menerima persepsi negatif apabila dikaitkan sebagai salah satu penyumbang terbesar kepada penyahhutanan dan kemasuhan habitat serta biodiversiti negara. Perkaitan ini telah dijadikan asas kepada kempen anti-minyak sawit yang giat dilaksanakan bagi menyekat dan memboikot penggunaan dan kemasukan minyak sawit negara. Langkah yang diambil oleh Eropah ini adalah amat membimbangkan berikutnya pengaruhnya yang kuat kepada negara lain.

Berdasarkan rekod, kawasan penanaman sawit di Malaysia menunjukkan peningkatan sebanyak 11.84% iaitu 5.23 juta hektar pada tahun 2013

kepada 5.85 juta hektar pada tahun 2018. Dalam tempoh tersebut, kadar purata peningkatan kluasan penanaman sawit adalah sebanyak 2.27%. Oleh itu, kluasan tanaman sawit dijangka akan terus meningkat sehingga 6.5 juta hektar pada tahun 2023.

Justeru, selari dengan pendirian Kerajaan yang telah memandatorikan pelaksanaan pensijilan Minyak Sawit Mampan Malaysia atau *Malaysian Sustainable Palm Oil* (MSPO) pada 1 Januari 2020, penetapan had 6.5 juta hektar adalah salah satu usaha Kerajaan dalam memastikan minyak sawit yang dihasilkan adalah secara mampan dengan mengambil kira keseluruhan kluasan kawasan bagi tanaman pertanian yang semakin terhad serta komitmen negara dalam memastikan sekurang-kurangnya 50% litusan kawasan hutan terpelihara.

**JAWAPAN (b):**

Tuan Yang Di-Pertua,

Mengambil kira tuduhan berterusan oleh negara luar yang mengaitkan industri sawit dengan penyahhutanan dan kemusnahan biodiversiti, tindakan Kerajaan menetapkan had kluasan tanaman sawit pada 6.5 juta hektar adalah bagi memastikan industri sawit tidak lagi dikaitkan isu penyahhutanan.

Tindakan menghadkan kluasan tersebut diyakini tidak akan menjaskan pendapatan pekebun kecil dan ekonomi negara kerana Kerajaan yakin dengan usaha penyelidikan dan pembangunan (R&D) yang sedang dijalankan oleh Lembaga Minyak Sawit Malaysia (MPOB), produktiviti pengeluaran hasil sawit dapat ditingkatkan melalui sumber sedia ada dengan menggunakan teknik dan mekanisme yang lebih baik. Aktiviti peluasan penanaman baru bukanlah langkah utama yang efektif dalam meningkatkan pengeluaran hasil sawit negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN HAJAH NATRAH BINTI ISMAIL  
[ SEKIJANG ]**

**TARIKH : 4 JULAI 2019 (KHAMIS)**

**SOALAN NO. 64**

Minta **MENTERI HAL EHWAL EKONOMI** menyatakan sama ada pihak Kerajaan bercadang untuk membuka semula fail permohonan tanah FELCRA bagi penduduk yang layak dan membenarkan pihak Pengurusan FELCRA untuk menilai semula pemilihan peserta sebelum ini yang mungkin tidak telus.

**JAWAPAN**

Tuan Yang di-Pertua,

1. Untuk makluman Ahli Yang Berhormat, dalam usaha melaksanakan penyatuan dan pemulihan tanah-tanah terbiar, FELCRA telah memajukan tanah-tanah milik Kerajaan Negeri dan juga individu. Bagi tanah Kerajaan Negeri, ianya dimajukan oleh FELCRA di bawah Akta GSA (*Group Settlement Area*) 1960.
2. Bagi tanah milik Kerajaan Negeri, FELCRA akan memajukan sesebuah projek (ladang) setelah mendapat kelulusan Majlis Mesyuarat Kerajaan Negeri (MMKN). Manakala, proses pengambilan peserta akan diuruskan setelah projek berhasil, iaitu bermula tahun keempat bagi tanaman kelapa sawit dan tahun ketujuh bagi tanaman getah. Proses pemilihan peserta adalah di bawah bidang kuasa Kerajaan Negeri.
3. Sekiranya terdapat kekosongan peserta bagi sesebuah projek di bawah tanah milik Kerajaan Negeri, FELCRA akan memaklumkan kepada Kerajaan Negeri bagi tujuan pengisian mengikut prosedur pengambilan peserta yang telah ditetapkan. Dimaklumkan bahawa peserta-peserta yang terpilih dikehendaki menandatangani perjanjian dengan FELCRA, bagi melindungi kedua-dua pihak terutama dari segi urusan hak milik, manfaat-manfaat yang patut diterima oleh peserta, status mutlak bahawa peserta berkenaan adalah peserta FELCRA dan sebagainya.
4. Kerajaan menyambut baik cadangan Ahli Yang Berhormat untuk membenarkan pihak Pengurusan FELCRA turut diberikan lebih peranan di dalam Jawatankuasa Pemilihan Peserta seperti turut berperanan dalam menilai semula proses pemilihan peserta, daripada hanya bertindak sebagai Urusetia sahaja.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KE-EMPAT BELAS**

---

**PERTANYAAN : LISAN**

**DARIPADA : TUAN TEH KOK LIM [ TAIPING ]**

**TARIKH : 4 JULAI 2019 (KHAMIS)**

**SOALAN NO. 65**

Minta **MENTERI PENGANGKUTAN** menyatakan rancangan untuk menambah baik dan menaik taraf perkhidmatan ETS khasnya bahagian utara dari Butterworth ke Kuala Lumpur dan tarikh perlaksanaan sekiranya ada.

**JAWAPAN**

Yang di-Pertua,

Untuk makluman Ahli Yang Berhormat, sebanyak 36 Perkhidmatan ETS sehari disediakan oleh KTMB di seluruh rangkaian landasan berkembar elektrik antara Gemas dan Butterworth/Padang Besar.

Bagi perjalanan dari/ke Stesen Butterworth, sepuluh (10) Perkhidmatan ETS disediakan sehari seperti jadual di bawah:

<b>Laluan</b>	<b>Bil. Perkhidmatan Sehari</b>
Kuala Lumpur – Butterworth – Kuala Lumpur	8
Gemas – Butterworth - Gemas	2

Buat masa ini, penambahan jumlah perkhidmatan ETS tidak dapat dilaksanakan kerana set-set tren ETS sedia ada sedang digunakan pada tahap maksimum untuk tujuan operasi.

Untuk makluman Yang Berhormat, pada masa ini KTMB memiliki 14 set ETS yang aktif untuk tujuan operasi. Jumlah set ini masih tidak mencukupi bagi memenuhi permintaan orang ramai yang ingin menggunakan perkhidmatan ETS di seluruh negara. Sehubungan itu, bagi menampung kekurangan set-set ETS sedia ada, Kerajaan telah meluluskan pembelian 19 ETS baru yang mana 9 set pertama dijangka tiba pada penghujung tahun 2019. Baki 10 set lagi sedang dalam peringkat persediaan bagi pelaksanaan proses perolehan.

Dengan pertambahan set-set ETS ini, KTMB akan menyemak semula kekerapan bilangan perkhidmatan tertakluk kepada permintaan dan keperluan kawasan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**  
**MESYUARAT KEDUA, PENGGAL KEDUA**  
**PARLIMEN KEEMPAT BELAS**

**PERTANYAAN : JAWAB LISAN**

**DARIPADA : YB TAN SRI DATUK SERI PANGLIMA  
HAJI ANNUAR BIN HAJI MUSA  
[KETEREH]**

**TARIKH : 4 JULAI 2019 (KHAMIS)**

**SOALAN NO. 66**

Minta **PERDANA MENTERI** menyatakan sejauh mana Kerajaan melihat keperluan penubuhan Jawatankuasa Pilihan Khas dalam pemilihan jawatan-jawatan penting di negara ini.

**JAWAPAN:**

Tuan Yang di-Pertua,

Untuk makluman Ahli Yang Berhormat, dalam usaha-usaha ke arah mengembalikan wibawa institusi Parlimen, sebanyak enam (6) Jawatankuasa Pilihan Khas (*Special Select Committee*) telah ditubuhkan termasuk Jawatankuasa Pilihan Khas Untuk Melantik Jawatan-Jawatan Utama Perkhidmatan Awam sebagai perintis berdasarkan kepentingan dan hala tuju negara yang telah diluluskan oleh Majlis Mesyuarat Dewan Rakyat pada Khamis, 16 Ogos 2018 semasa Mesyuarat Pertama, Penggal Pertama, Parlimen Keempat Belas.

Jawatankuasa Pilihan Khas Untuk Melantik Jawatan-Jawatan Utama Perkhidmatan Awam berfungsi untuk meneliti pelantikan jawatan-jawatan penting dalam negara seperti pelantikan ke Suruhanjaya Hak Asasi Manusia, Suruhanjaya Pilihan Raya Malaysia, Suruhanjaya Pencegahan Rasuah Malaysia dan Suruhanjaya Pelantikan Kehakiman Malaysia bagi memastikan ia dilantik berdasarkan merit.

Untuk makluman Ahli Yang Berhormat, Jawatankuasa Pilihan Khas ini telah bermesyuarat sebanyak enam (6) kali bagi menjalankan fungsi-fungsinya dan telah menetapkan rangka kerja sepanjang tahun berdasarkan terma rujukan yang telah ditetapkan. Walau bagaimanapun, Jawatankuasa ini mendapati bahawa proses pelantikan jawatan-jawatan utama dalam perkhidmatan awam ini adalah unik dan berbeza bagi setiap jawatan. Oleh yang demikian, Jawatankuasa ini sedang mengkaji mekanisme terbaik agar dapat menjalankan fungsi dan peranan yang lebih jelas dalam proses pelantikan jawatan-jawatan utama.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK DR. HASAN BIN BAHROM  
[ TAMPIN ]**

**TARIKH : 4 JULAI 2019 [ KHAMIS ]**

**SOALAN NO. 67**

Minta **MENTERI HAL EHWAL EKONOMI** menyatakan apakah Kementerian mempunyai hasrat untuk meminda Akta Tanah; Kawasan Penempatan Berkelompok (Akta GSA 1960) bagi memastikan perumahan generasi kedua FELDA dapat dibina di atas tapak perumahan yang sedia ada.

**JAWAPAN**

Tuan Yang di-Pertua,

1. Untuk makluman Ahli Yang Berhormat, FELDA telah memperkenalkan skim Insentif Kelulusan Membina Lebih Satu Rumah Di Dalam Satu Tapak pada tahun 2017. Skim ini bertujuan untuk membantu anak-anak peneroka membina rumah di atas tapak perumahan sedia ada. Pembinaan rumah tersebut hanya memerlukan kelulusan daripada pihak berkuasa negeri. Oleh yang demikian, tiada keperluan untuk membuat sebarang pindaan kepada Akta Tanah (Kawasan Penempatan Berkelompok) 1960 (Akta GSA) sedia ada bagi tujuan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN RUSNAH BINTI ALUAI (TANGGA BATU)**

**TARIKH : 4 JULAI 2019 (KHAMIS)**

**SOALAN :**

**Puan Rusnah binti Aluai [Tangga Batu]** minta **PERDANA MENTERI** menyatakan adakah pihak JAKIM berhasrat menyelaraskan bayaran faedah-faedah tertentu kepada Pegawai Kader Jabatan Kemajuan Islam Malaysia (JAKIM) sepetimana faedah-faedah ini dinikmati oleh Pembantu Guru Agama Pihak Jabatan Penjara Malaysia yang terdedah kepada ancaman keselamatan, penyakit berjangkit, dan masalah psikologi di kalangan banduan.

**JAWAPAN : (YB DATUK SERI DR. MUJAHID BIN YUSOF,  
MENTERI DI JABATAN PERDANA MENTERI)**

Tuan Yang Dipertua,

Untuk makluman ahli Yang Berhormat, Pegawai Hal Ehwal Islam (PHEI) Jabatan Kemajuan Islam Malaysia (JAKIM) yang ditempatkan di Jabatan Penjara Malaysia, Kementerian Dalam Negeri (KDN) adalah bagi mengisi jawatan PHEI yang diwujudkan oleh pihak Jabatan Penjara Malaysia, KDN. Pegawai Kader PHEI JAKIM yang berkhidmat di penjara seluruh Malaysia adalah seramai **159 orang** daripada keseluruhan **185 perjawatan** yang diluluskan.

Penempatan PHEI di penjara adalah bertujuan untuk membantu Jabatan Penjara Malaysia memperkasakan program pemulihan (keagamaan) kepada penghuni penjara bagi mengembalikan semula golongan yang tersasar ini ke jalan yang bertepatan dengan agama.

Jabatan Penjara Malaysia telah melaksanakan kajian penambahbaikan perjawatan dan penyelarasan faedah-faedah tertentu bukan kepada Kader PHEI sahaja malah semua kakitangan awam yang terlibat secara langsung dengan penghuni penjara, termasuklah kader-kader Kementerian Kesihatan Malaysia (KKM), Kementerian Pendidikan Malaysia (KPM), Kementerian Sumber Manusia (KSM), Jabatan Kebajikan Masyarakat (JKM) dan Pegawai Psikologi.

Pada 9 Oktober 2017, Jabatan Penjara Malaysia melalui KDN telah mengemukakan permohonan perluasan Bayaran Insentif Khas (BIK) Pegawai Penjara kepada semua pegawai awam yang bertugas secara langsung dengan banduan kepada Jabatan Perkhidmatan Awam (JPA). Pada 3 Oktober 2018, pihak JPA memaklumkan Kerajaan telah meluluskan kenaikan Bayaran Insentif Khas (BIK) kepada Pegawai Penjara sahaja, seperti berikut:

- a) Wadar Penjara Gred KA19 – BIK sebanyak RM60.00 sebulan;
- b) Koperal Penjara Gred KA20 – BIK sebanyak RM90.00 sebulan; dan
- c) Sarjan Penjara Gred KA22 – BIK sebanyak RM120.00 sebulan.

Walau bagaimanapun, BIK berkenaan **tidak diperluaskan** kepada semua kakitangan awam yang terlibat secara langsung dengan penghuni penjara, termasuklah kader-kader Kementerian dan Jabatan yang telah dinyatakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SHAHARIZUKIRNAIN BIN ABD. KADIR  
[ SETIU ]**

**TARIKH : 4 JULAI 2019 | KHAMIS**

**SOALAN**

Tuan Shaharizukirnain bin Abd. Kadir [ Setiu ] minta **PERDANA MENTERI** menyatakan bilangan pencarum baru Tabung Haji untuk tempoh Januari 2019 sehingga Mei 2019 dan berapa jumlah caruman mereka dalam tempoh tersebut.

**JAWAPAN : (MENTERI DI JABATAN PERDANA MENTERI )**

Tuan Yang Di-Pertua,

Untuk makluman Ahli Yang Berhormat, bilangan pendeposit baharu Lembaga Tabung Haji (**TH**) untuk tempoh Januari 2019 sehingga Mei 2019 adalah sebanyak 133 ribu orang dengan jumlah deposit sebanyak RM83 juta.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN NOOR AMIN BIN AHMAD [KANGAR]**

**TARIKH : 4 JULAI 2019 (KHAMIS)**

**SOALAN NO. 70**

Minta **MENTERI HAL EHWAL EKONOMI** menyatakan apakah rancangan Kerajaan untuk mencapai matlamat perkongsian kemakmuran seperti yang diumum sebelum ini.

**JAWAPAN**

Tuan Yang di-Pertua,

1. Untuk makluman Ahli Yang Berhormat, Kerajaan sentiasa memberikan perhatian kepada kemakmuran seluruh rakyat merangkumi jantina, kaum, status sosioekonomi dan kedudukan geografi. Kerajaan akan memastikan kesejahteraan rakyat terus menjadi keutamaan melalui Gagasan Kemakmuran Bersama iaitu berasaskan keperluan, ketelusan, menyokong pertumbuhan dan kemampanan bagi mendukung dasar pembangunan inklusif dan menghapuskan jurang ketidakseimbangan sosioekonomi antara etnik.
2. Kementerian Hal Ehwal Ekonomi (MEA) telah mengambil langkah-langkah segera bagi memastikan Gagasan Kemakmuran Bersama menjadi falsafah dan tulang belakang kepada Rancangan Malaysia Kedua Belas (RMKe-12). Gagasan ini bukan sekadar untuk meningkatkan KDNK negara tetapi mengutamakan kepentingan dan kesejahteraan rakyat.
3. Kemakmuran Bersama ini dibangunkan untuk mencapai 3 objektif utama :
  - (i) memastikan jurang pendapatan dankekayaan rakyat dapat ditangani supaya dapat merapatkan jurang kekayaan antara kelas, kaum, wilayah dan rantaian bekalan bagi membawa bersama rakyat yang ketinggalan terbela dan diperkasakan.
  - (ii) mewujudkan model pembangunan baharu untuk semua dengan mencipta ekonomi yang lebih terstruktur, progresif, berpaksikan ilmu dan bernilai tinggi dengan penyertaan masyarakat yang menyeluruh di semua peringkat.

(iii) untuk menjadikan Malaysia yang lebih cemerlang dan menjadi salah satu paksi ekonomi penting di Asia. Ia bermaksud menjadikan Malaysia sebuah negara yang bersatu, makmur dan bermaruah seterusnya muncul sebagai paksi ekonomi Asia.

4. YAB Perdana Menteri pada 9 Mei 2019 yang lalu telah menggariskan sekurang-kurangnya 7 teras strategik bagi mencapai matlamat Kemakmuran Bersama melalui perubahan utama antara lain:

- (i) Membantu transformasi ekosistem perniagaan dan industri termasuk PKS supaya mampu mengadaptasi kepada Revolusi Industri 4.0, ekonomi digital dan ekonomi intelek untuk menjadi industri bernilai tinggi dan mampu menjana lebih pendapatan kepada rakyat;
- (ii) mengadakan transformasi kepada sumber manusia negara bagi menghasilkan tenaga kerja yang efektif dan bernilai tinggi serta memastikan pusat-pusat pembangunan kemahiran dan TVET negara memenuhi kehendak industri;
- (iii) mengurangkan kebergantungan kepada pekerja asing dengan memastikan industri beralih kepada pekerjaan dan perkhidmatan bernilai tinggi yang menjanjikan pendapatan yang lebih tinggi kepada pekerja;
- (iv) mengenal pasti bidang-bidang keberhasilan utama baharu yang boleh menganjak ekonomi ke tahap yang lebih tinggi;
- (v) mengadakan rasionalisasi kepada dasar dan strategi kebajikan rakyat (*needs-based approach*) dengan menekankan program graduasi golongan rentan ekonomi dan B40 untuk keluar daripada kemiskinan relatif;
- (vi) mewujudkan pusat ekonomi tempatan di luar Lembah Klang bagi memastikan pertumbuhan ekonomi dapat diagihkan dengan lebih meluas; dan

(vii) mewujudkan masyarakat yang matang, berilmu, bekerja keras dan mementingkan perpaduan di kalangan kita. Peningkatan modal sosial dan struktur sokongan sosial yang utuh untuk memastikan negara dapat pesat membangun. Jati diri dan patriotisme golongan muda dipertingkatkan bagi memastikan masa depan negara yang cemerlang.

5. Dalam definisi yang ringkas, Gagasan Kemakmuran Bersama adalah usaha untuk menjadikan Malaysia sebagai sebuah negara yang terus menerus membangun secara mampan seiring dengan pengagihan ekonomi yang adil dan inklusif (*equitable growth*) di setiap peringkat rantaian nilai, kelas, kaum dan geografi sehingga mewujudkan rasa keharmonian dan kestabilan di kalangan rakyat menjelang tahun 2030. Matlamat Kemakmuran Bersama adalah untuk menyediakan taraf hidup yang wajar (*decent standard of living*) kepada semua rakyat Malaysia.
6. Kemakmuran Bersama akan memastikan jurang ekonomi, pendapatan dan penyertaan dalam rantaian bekalan dapat diminimumkan terutama dalam kalangan masyarakat Melayu, Orang Asli, Bumiputera Sabah dan Sarawak serta golongan relatif miskin supaya kekayaan negara dapat benar-benar dirasai bersama.
7. Gagasan ini adalah untuk rakyat. Ianya adalah yang lebih menyeluruh dan bukan hanya datang daripada Kerajaan kepada rakyat semata-mata (*top-down approach*) namun turut mengambil pandangan serta maklum balas daripada rakyat, pemain industri dan masyarakat sivil (*bottom-up approach*) supaya ia mampu menjawab dan menyelesaikan kehendak serta keperluan rakyat.
8. Justeru, MEA akan mengambil tanggungjawab untuk mengadakan konsultasi dan mendapatkan maklum balas daripada semua pemegang taruh termasuk kumpulan pekerja, peniaga dan pemain industri untuk memastikan gagasan ini akan menjadi milik rakyat secara bersama.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**  
**MESYUARAT KEDUA, PENGGAL KEDUA**  
**PARLIMEN KEEMPAT BELAS**

**PERTANYAAN : LISAN**

**DARIPADA : YB DATIN MASTURA BINTI MOHD YAZID**  
[ Kuala Kangsar ]

**TARIKH : 4 JULAI 2019 (KHAMIS)**

**SOALAN NO. 71**

Minta **PERDANA MENTERI** menyatakan apakah Jawatankuasa Khas lain yang akan ditubuhkan bagi memperkasakan institusi Parlimen Malaysia.

**JAWAPAN:**

Tuan Yang di-Pertua,

Untuk makluman Ahli Yang Berhormat, dalam usaha-usaha ke arah mengembalikan wibawa institusi Parlimen, sebanyak enam (6) Jawatankuasa Pilihan Khas (*Special Select Committee*) telah ditubuhkan sebagai perintis berdasarkan kepentingan dan hala tuju negara yang telah diluluskan oleh Majlis Mesyuarat Dewan Rakyat pada Khamis, 16 Ogos 2018 semasa Mesyuarat Pertama, Penggal Pertama, Parlimen Keempat Belas.

Penubuhan Jawatankuasa-jawatankuasa Pilihan Khas ini adalah supaya wujudnya satu sistem mekanisme semak dan imbang serta pengawasan (*oversight*) yang lebih menyeluruh, di samping memupuk nilai akauntabiliti dalam ketiga-tiga cabang Kerajaan: Eksekutif, Perundangan dan Kehakiman di bawah satu badan yang bebas dan bipartisan yang diletakkan di bawah kawal selia Parlimen Malaysia. Penubuhan Jawatankuasa-jawatankuasa Pilihan Khas ini juga adalah selari dengan amalan Parlimen di negara-negara luar dan sejajar dengan *Recommended Benchmarks for Democratic Legislators, Commonwealth Parliamentary Association (CPA)*.

Terdapat cadangan untuk menubuhkan beberapa Jawatankuasa Pilihan Khas yang akan dibawa ke Jawatankuasa Dewan, Majlis Dewan Rakyat Parlimen Keempat Belas bagi membincangkannya seterusnya mempertimbangkannya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI DR. SANTHARA [SEGAMAT]**

**TARIKH : 4 JULAI 2019**

**SOALAN : 72**

**Dato' Sri Dr. Santhara [Segamat]** minta **PERDANA MENTERI** menyatakan apakah status pelaksanaan janji yang telah ditaburkan dalam manifesto Pakatan Harapan (PH) untuk masyarakat minoriti dan golongan tertentu khususnya masyarakat India.

**JAWAPAN:** **YB DATUK WIRA DR. MD FARID BIN MD RAFIK**  
**TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, Kerajaan komited untuk menunaikan 60 janji dan 47 Iltizam Khusus serta 464 inisiatif yang merupakan dasar dan tindakan-tindakan khusus yang dinyatakan dalam setiap janji yang terkandung dalam Buku Harapan.

Sehingga 31 Mei 2019, pencapaian keseluruhan Janji Kerajaan adalah sebanyak 49.3%. Di mana 67 inisiatif (14.4%) telah ditunaikan sepenuhnya dan 162 inisiatif (34.9%) masih dalam peringkat pelaksanaan. Manakala, 235 inisiatif (50.7%) masih di peringkat dalam perancangan atau belum mula.

Untuk makluman Ahli Yang Berhormat juga, Janji Kerajaan ini telah mengambil kira keperluan dan kepentingan masyarakat minoriti dan

## **SOALAN NO. 72**

golongan khusus termasuk masyarakat India. Di bawah Iltizam Khusus untuk masyarakat India telah mencapai 40.0% di mana dua inisiatif (8.0%) telah ditunaikan dan lapan inisiatif (32.0%) masih dalam pelaksanaan. Manakala, 15 inisiatif (60.0%) masih di peringkat perancangan atau belum mula.

Kerajaan akan terus komited melaksanakan janji yang terkandung dalam Buku Harapan. Dalam pada masa yang sama, Kerajaan Pakatan Harapan akur bahawa dalam memastikan janji-janji yang dibuat dapat dilaksanakan secara teratur dan mengikut undang-undang, kajian serta perancangan yang teliti perlu dibuat sekali gus memerlukan tempoh masa yang bersesuaian untuk mencapai objektifnya.

Sekian, terima kasih.

**PEMBERITAHUAN PERTANYAAN DEWAN RAKYAT**  
**MESYUARAT KEDUA, PENGGAL KEDUA,**  
**PARLIMEN KEEMPAT BELAS,**

**PERTANYAAN** : LISAN

**DARIPADA** : YB Dato' Seri Haji Abdul Hadi bin Awang  
[ Marang ]

**TARIKH** : 1 JULAI 2019

**MENJAWAB**

**SOALAN NO. 73**

Minta **PERDANA MENTERI** menyatakan sejauh mana tindakan Peguam Negara selari dengan undang-undang dalam Inkues Kematian Muhammad Adib Mohd Kassim dan apakah jaminan Kementerian Perumahan dan Kerajaan Tempatan dan Jabatan Bomba tidak melepaskan tanggungjawabnya terhadap pegawai yang meninggal semasa bertugas.

**JAWAPAN:**

Yang Di-Pertua,

1. Jabatan Peguam Negara telah bertindak mengikut undang-undang apabila tidak membenarkan peguam terdahulu untuk meneruskan mewakili Kementerian Perumahan dan Kerajaan Tempatan serta Jabatan Bomba dan Penyelamat Malaysia. Keputusan Jabatan Peguam Negara juga mengambil kira kepentingan semua pihak yang terlibat dalam inkues dan juga kepentingan orang ramai.
2. Pada peringkat permulaan pelantikan peguam yang mewakili Kementerian Perumahan dan Kerajaan Tempatan dan Jabatan Bomba dan Penyelamat Malaysia dikira sebagai dibuat secara *bona fide* untuk membantu prosiding mahkamah.
3. Walau bagaimanapun, dalam prosiding inkues tersebut, peguam tersebut telah antara lain-lain bertindak dengan cara yang tidak wajar dan tidak sesuai sebagai seorang peguam yang mewakili Kementerian dan Jabatan Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN OSCAR LING CHAI YEW [ SIBU ]**

**TARIKH : 4 JULAI 2019**

**SOALAN : 74**

**Tuan Oscar Ling Chai Yew [ Sibu ]** minta **PERDANA MENTERI** menyatakan senarai perinci jumlah pelajar dan perbelanjaan terlibat yang ditaja oleh JPA atau biasiswa Kerajaan lain untuk melanjut pelajaran di institusi pengajian tinggi di Negara China, Jepun, Korea, Perancis, UK, US, Australia dan sebagainya dari tahun 2000 hingga 2019.

**JAWAPAN:** **YB DATUK WIRA DR. MD FARID BIN MD RAFIK**  
**TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, bagi menyokong hasrat Kerajaan untuk memartabatkan Institusi Pengajian Tinggi Tempatan serta usaha menjadikan Malaysia sebagai Hab Pendidikan, penghantaran pelajar ke luar negara hanya terhad kepada universiti terkemuka serta bidang-bidang keperluan negara sahaja.

## **SOALAN NO. 74**

Statistik penajaan Jabatan Perkhidmatan Awam (JPA) adalah seperti berikut:

<b>TAHUN</b>	<b>JUMLAH KESELURUHAN</b>
2013	<b>350</b>
2014	<b>350</b>
2015	<b>339</b>
2016	<b>220</b>
2017	<b>220</b>
2018	<b>220</b>
<b>JUMLAH KESELURUHAN</b>	<b>1,699</b>

*Nota: Negara-negara pengajian yang masih di bawah penajaan semasa ialah Jepun, Korea, Perancis, Jerman, United Kingdom dan Amerika Syarikat.*

Kos perbelanjaan Kerajaan untuk seorang pelajar yang ditaja oleh JPA untuk setiap tahun adalah berbeza mengikut negara, bidang serta tempoh pengajian yang diikuti pelajar. Anggaran perbelanjaan seorang pelajar di luar negara adalah di antara RM300,000 sehingga RM1.2 juta bagi tempoh pengajian selama 4 hingga 6 tahun.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DR. NIK MUHAMMAD ZAWAWI BIN HAJI  
SALLEH [PASIR PUTEH]**

**TARIKH : 4 JULAI 2019 (KHAMIS)**

**SOALAN : 75**

**Dr. Nik Muhammad Zawawi bin Haji Salleh [Pasir Puteh] minta  
PERDANA MENTERI menyatakan:**

- (a) apakah mekanisme dan formula yang digunakan oleh Unit Penyelarasian Pelaksanaan (ICU), Jabatan Perdana Menteri dalam membuat pengagihan terhadap peruntukan penyelenggaraan jalan serta jambatan sempit di jalan-jalan raya utama dan jalan Persekutuan antara Pantai Barat dan Pantai Timur; dan
- (b) berapakah projek penyelenggaraan jalan dan jambatan yang telah diluluskan bagi negeri Kelantan dan Terengganu dalam tempoh setahun pentadbiran Kerajaan Pakatan Harapan.

**JAWAPAN: YB DATUK WIRA DR. MD FARID BIN MD RAFIK  
TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman, Ahli Yang Berhormat penyelenggaraan jalan secara umumnya terbahagi kepada dua kategori iaitu penyelenggaraan jalan negeri dan penyelenggaraan jalan persekutuan. Bagi penyelenggaraan jalan-jalan negeri ianya tertakluk kepada pendaftaran dalam senarai MARRIS (Sistem Rekod-rekod Jalan Raya Malaysia) yang dilaksanakan oleh Jabatan Kerja Raya Negeri.

Peruntukan MARRIS diagihkan kepada negeri-negeri berdasarkan Jadual Kesepuluh Perlembagaan Persekutuan dan undang-undang lain yang berkuat kuasa. Bagi penyelenggaraan jalan-jalan Persekutuan ia adalah di bawah tanggungjawab Kementerian Kerja Raya dan peruntukan disediakan di dalam bajet tahunan Kementerian. ICU JPM tidak mempunyai peruntukan khusus bagi tujuan penyelenggaraan jalan dan jambatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**  
**MESYUARAT KEDUA PENGGAL KEDUA,**  
**PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATO' SRI DR. SANTHARA  
[ SEGAMAT ]**

**TARIKH : 04 JULAI 2019 (KHAMIS)**

**SOALAN NO. 77**

Minta **MENTERI SUMBER MANUSIA** menyatakan apakah perancangan Kementerian untuk membina Pusat Rehabilitasi Physio yang kedua di bawah penyeliaan PERKESO seperti yang telah dibina di Melaka dan bilakah Pusat Rehabilitasi Physio akan dibina di Sabah atau Sarawak.

**JAWAPAN**

Tuan Yang di-Pertua,

1. Untuk makluman Dewan Yang Mulia ini, pada masa ini PERKESO mempunyai sebuah pusat rehabilitasi dikenali sebagai Pusat Rehabilitasi PERKESO Tun Abdul Razak (PRPTAR) yang terletak di Bandar Hijau, Hang Tuah Jaya, Melaka. PRPTAR ini mula beroperasi pada 1 Oktober 2014 bertujuan untuk membantu pencarum PERKESO untuk dipulihkan secara fizikal dan vokasional menerusi program pemulihan yang komprehensif dengan menyediakan kemudahan yang lengkap dan akhirnya dapat kembali ke alam pekerjaan.

## **SOALAN NO: 77**

2. Berkenaan dengan perancangan untuk menubuhkan sebuah lagi pusat rehabilitasi, Kementerian Sumber Manusia sebenarnya bersedia untuk mempertimbangkan sebarang cadangan bagi membuka pusat rehabilitasi di mana-mana lokasi yang bersesuaian termasuklah di Sabah dan Sarawak untuk kemudahan kepada Orang Berinsurans mendapatkan rawatan pemulihan.
3. Walau bagaimanapun, pemilihan akhir lokasi cadangan untuk membuka pusat rehabilitasi baharu memerlukan kajian terperinci dan perlu mengambil kira pelbagai faktor serta perspektif secara menyeluruh dari segi impak sosioekonomi dan kemampunan dana organisasi selain faktor geografi, keperluan dan keutamaan kepentingan (*urgency*).

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS (2019)**

---

**PERTANYAAN : LISAN**

**TARIKH : 4 JULAI 2019 (KHAMIS)**

**DARIPADA : TUAN SU KEONG SIONG  
[ Kampar ]**

**SOALAN NO. 74**

Minta **PERDANA MENTERI** menyatakan langkah-langkah yang telah diambil dan/atau dicadangkan untuk memperkasakan dan meletakkan SPRM, SPR dan SUHAKAM di bawah Parlimen dalam usaha menyeluruh penstrukturkan semula Jabatan Perdana Menteri.

**JAWAPAN:**

Yang di-Pertua,

1. Antara usaha Kerajaan bagi memperkasakan SPRM, SPR dan SUHAKAM adalah berkaitan pelantikan jawatan-jawatan utama yang mestilah disahkan oleh jawatankuasa yang bersesuaian di Parlimen dalam usaha mengembalikan kewibawaan institusi tersebut. Perkara ini juga selaras dengan salah satu cadangan penambahbaikan oleh *Institutional Reforms Committee* (IRC) iaitu dicadangkan supaya *Public Appointment Bill* digubal untuk urusan pelantikan dilaksanakan melalui prinsip akauntabiliti dan transparensi.
2. Pihak SPRM telah membentangkan inisiatif memperkasa SPRM semasa Mesyuarat JKKMAR Siri 3 Bilangan 3 Tahun 2018 yang telah diadakan pada 13 Ogos 2018 termasuklah supaya pelantikan Ketua Pesuruhjaya SPRM hendaklah atas pertimbangan *Parliamentary Select Committee* (PSC). Mesyuarat bersetuju supaya Jabatan Perkhidmatan Awam (JPA), SPRM dan Kementerian Kewangan menyusul semua syor serta pandangan ahli mesyuarat bagi mengkaji implikasinya sebelum diluluskan.
3. Pihak Parlimen juga dalam Mesyuarat JKKMAR Siri 3 Bilangan 3 Tahun 2018 yang sama telah membentangkan perkara berkaitan Manifesto Kerajaan iaitu Janji 16: Mengembalikan Wibawa Institusi Parlimen. Antara perkara yang dibangkitkan adalah bahawa cadangan membentuk jawatankuasa di peringkat Parlimen untuk mengesahkan pelantikan jawatan-jawatan utama dalam perkhidmatan awam atau negara memerlukan pindaan Perlembagaan Persekutuan (PP). Sebagai contoh, Perkara 144 (1) PP memperuntukkan SPR hendaklah

dilantik oleh SPB Yang di-Pertuan Agong selepas berunding dengan Majlis Raja-Raja.

4. Oleh yang demikian, mesyuarat bersetuju supaya kajian lanjut perlu dibuat oleh Parlimen secara terperinci bersama Jabatan Peguam Negara terhadap semua cadangan Janji 16 tersebut termasuklah yang berkaitan pelantikan jawatan-jawatan utama perkhidmatan awam ini.
5. Sehingga kini, terdapat 6 Jawatankuasa Pilihan Khas yang telah diluluskan Majlis Mesyuarat Dewan Rakyat pada 16 Ogos 2018 dan ditubuhkan di Parlimen seperti berikut:
  - a) JPK Hubungan Antara Negeri-negeri dan Persekutuan
  - b) JPK Untuk Melantik Jawatan-jawatan Utama Perkhidmatan Awam
  - c) JPK Menimbang Rang Undang-undang
  - d) JPK Bajet
  - e) JPK Pertahanan dan Hal Ehwal Dalam Negeri
  - f) JPK Hak Asasi dan Kesaksamaan Gender

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB PUAN HAJAH SITI ZAILAH BINTI MOHD  
YUSOFF [RANTAU PANJANG]**

**TARIKH : 4 JULAI 2019 (KHAMIS)**

**SOALAN :**

**Puan Hajah Siti Zailah binti Mohd Yusoff [Rantau Panjang]** minta **PERDANA MENTERI** menyatakan apakah usaha Kerajaan dalam menangani ancaman sebaran ideologi sesat yang bercanggah dengan Islam seperti Liberalisme dan Pluralisme.

**JAWAPAN: (YB DATUK SERI DR. MUJAHID BIN YUSOF, MENTERI  
DI JABATAN PERDANA MENTERI)**

Tuan Yang di-Pertua,

Untuk makluman ahli Yang Berhormat, kerajaan memandang serius mengenai penularan ideologi dan aliran pemikiran yang bercanggah dengan ajaran Islam seperti liberalisme dan pluralisme. Antara langkah yang dilaksanakan oleh Kerajaan bagi membendung perkara ini dari tersebar luas di kalangan masyarakat adalah seperti berikut:

1. Fatwa dan Perundangan:

- i. Muzakarah Khas Jawatankuasa Fatwa Majlis Kebangsaan Bagi Hal Ehwal Ugama Islam Malaysia (MKI) yang bersidang pada 5 Mei 1996, antara lain telah menetapkan bahawa umat Islam di Malaysia hendaklah hanya mengikut ajaran Islam yang berasaskan pegangan Ahli Sunnah wal-Jamaah

dari segi akidah, syariah dan akhlak. Selain itu, menetapkan bahawa ajaran Islam selain daripada pegangan Ahli Sunnah wal-Jamaah adalah dilarang.

- ii. Muzakarah Jawatankuasa Fatwa Majlis Kebangsaan Bagi Hal Ehwal Ugama Islam Malaysia Kali Ke-74 yang bersidang pada 25-27 Julai 2006 telah membincangkan Aliran Pemikiran Liberal: Hukum dan Implikasinya Kepada Islam Di Malaysia. Muzakarah telah memutuskan bahawa Aliran Pemikiran Liberal adalah ajaran sesat dan menyeleweng daripada Syariat Islam.
  - iii. Enam buah negeri telah mengeluarkan keputusan fatwa mengenai pemikiran liberalisme iaitu Wilayah Persekutuan, Selangor, Melaka, Negeri Sembilan, Sarawak dan Sabah. Dua negeri iaitu Selangor dan Sabah telah mewartakan keputusan fatwa mengenai liberalisme tersebut.
2. Program penjelasan dan penerangan kepada masyarakat:
- i. Melalui siri penjelasan dalam seminar dan forum berkaitan akidah yang dilaksanakan oleh JAKIM dengan kerjasama Jabatan Mufti Negeri dan Jabatan Agama Islam Negeri.
  - ii. Pendedahan bahaya fahaman liberalisme melalui media baharu dan penyiaran seperti siaran khutbah serta rancangan-rancangan agama seperti rancangan Forum Perdana Ehwal Islam dan Anda Musykil? yang disiar melalui TV serta rancangan lain yang turut diterbit dan disiar melalui radio stesen-stesen nasional Kerajaan serta boleh diakses melalui media baharu.
  - iii. Melaksanakan muzakarah pakar, sidang meja bulat dan bengkel bersama agensi peringkat Persekutuan dan Negeri bagi berkongsi input dan mencari solusi untuk menangani masalah kecelaruan pemikiran yang dibawa oleh golongan berfikiran liberal.

- iv. Program pemantapan kefahaman Ahli Sunnah wal-Jamaah dengan agensi yang menyelaras program kepada penjawat awam dan institusi pengajian tinggi khususnya kepada pelajar yang akan ke luar negara. Slot-slot penerangan mengenai akidah diberi kepada mereka dan dimasukkan dalam modul-modul yang berkaitan.
  - v. Penerbitan bahan bacaan dan buku yang berkaitan isu liberalisme dan pluralisme dengan kerjasama Institusi Pengajian Tinggi dan Jabatan Mufti/Jabatan Agama Islam/Majlis Agama Islam Negeri bagi memberi pendedahan dan rujukan kepada masyarakat berhubung perkara ini.
3. Pendidikan peringkat rendah/ Kelas Agama dan Fardhu Ain (KAFA):

Penekanan terhadap pendidikan akidah yang benar melalui penggubalan kurikulum agama yang berkaitan akidah bagi pendidikan agama khususnya di peringkat sekolah rendah melalui Kelas Agama dan Fardhu Ain (KAFA).

Sekian, terima kasih.

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA, PENGGAL KEDUA**  
**PARLIMEN KEEMPAT BELAS**

**PERTANYAAN : LISAN**

**DARIPADA : TUAN MOHD SHAHAR BIN ABDULLAH  
[PAYA BESAR]**

**TARIKH : 4 JULAI 2019 (KHAMIS)**

**SOALAN :**

**Tuan Mohd Shahar bin Abdullah [Paya Besar] minta **MENTERI INDUSTRI UTAMA** menyatakan :-**

- (a) berapakah kos yang telah dan akan dibelanjakan bagi Kempen Sayangi Sawitku dan sejauh manakah kejayaan dalam konteks membantu meningkatkan eksport sawit serta pertambahan hasil pendapatan peneroka dan pekebun kecil; dan
- (b) berapakah jumlah rundingan pasaran dalam dan luar negara yang telah dan akan diterokai sejak Jun 2018 hingga Jun 2019 yang memberi keuntungan dan mampu membela nasib peneroka dan pekebun kecil.

**JAWAPAN :**

Tuan Yang Di-Pertua,

Sepertimana Yang Berhormat sedia maklum, Kementerian telah melancarkan kempen Sayangi Sawitku yang telah dirasmikan oleh YAB Perdana Menteri pada 24 Mac 2019 yang lalu. Kempen Sayangi Sawitku ini yang akan diadakan sepanjang tahun 2019 adalah bertujuan untuk memberi kesedaran kepada rakyat Malaysia mengenai kebaikan dan khasiat minyak sawit dan juga cabaran yang dihadapi oleh komoditi sawit. Disamping itu, kempen ini juga adalah untuk menggalakkan rakyat Malaysia mempertahankan komoditi sawit dan menjadi jurucakap sawit melalui pendekatan dengan izin '*From Malaysia, we speak to the world*'.

Pelbagai aktiviti dan program di peringkat domestik dan antarabangsa telah dijalankan seperti publisiti video dan poster Kempen Sayangi Sawitku di KLIA, publisiti melalui *in-flight magazine* oleh MAS, Air Asia dan Malindo, program tanam semula pokok hutan dan konservasi Orang Utan dan Gajah Pygmy di Sabah, sesi taklimat dan pameran produk sawit di Parlimen, *Student Ambassador Programme*, pertandingan memasak menggunakan minyak sawit, sesi kunjungan dan penerangan kepada Menteri Kabinet dan Ketua Menteri yang berkaitan, pertandingan atas talian dan lain-lain. Bagi melaksanakan aktiviti-aktiviti Kempen Sayangi Sawitku yang telah dirangka, Kementerian telah memperuntukkan sebanyak RM6 juta pada tahun ini.

Tuan Yang Dipertua,

Sebenarnya, masih terlalu awal untuk mengukur prestasi perlaksanaan kempen ini memandangkan ianya masih berjalan sehingga ke akhir tahun ini. Walau bagaimanapun, Kementerian sedang menjalankan pemerhatian dan bincangan bagi mengukur keberkesanan kempen ini dalam membantu meningkatkan industri sawit negara. Didapati pada masa ini, lebih ramai rakyat Malaysia daripada pelbagai lapisan masyarakat telah tampil untuk menyuarakan sokongan terhadap industri sawit negara termasuk pemimpin utama negara, tokoh korporat, personaliti media, ketua masyarakat, pelajar dan lain-lain. Manakala industri lain seperti penerbangan, pelancongan dan hiburan juga turut

bekerjasama menjayakan kempen ini melalui penajaan dan publisiti.

Selain itu, data eksport minyak sawit dan produk berasaskan sawit ke negara-negara luar telah menunjukkan peningkatan sebanyak 5.9% daripada 6.36 juta tan (Januari – Mac 2018) kepada 6.74 juta tan (Januari - Mac 2019). Dari segi harga pula, harga purata minyak sawit mentah bagi bulan Mac 2019 iaitu bulan pelancaran kempen adalah RM1,903.50 telah meningkat kepada RM1,946.50 pada bulan Mei 2019. Ini secara tidak langsung disebabkan peningkatan penerimaan dan kesedaran mengenai minyak sawit hasil daripada kempen yang dijalankan.

Untuk makluman Ahli Yang Berhormat, rundingan pasaran dalam dan luar negara yang telah diterokai sejak Jun 2018 hingga Jun 2019 adalah melalui *Regional Comprehensive Economic Partnership* (RCEP). Dalam tempoh tersebut, tujuh rundingan telah diadakan yang melibatkan Kementerian serta agensi-agensi berkaitan. Antara rundingan lain ialah satu rundingan ASEAN-China Review yang diadakan pada Mei 2018. Rundingan ini adalah bagi meningkatkan akses pasaran yang lebih baik bagi membolehkan produk barang sawit Malaysia dieksport ke pasaran yang lebih luas. Melalui kerjasama ini, produk minyak sawit Malaysia mendapat akses pasaran yang lebih baik melalui penghapusan atau penurunan duti import oleh negara rakan dagang terbabit berbanding negara yang tidak mempunyai kerjasama *Free Trade Agreement* (FTA).

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**TARIKH : 4 JULAI 2019 (KHAMIS)**

**DARIPADA : DATO' DR. SHAMSUL ANUAR BIN HAJI  
NASARAH  
[ Lenggong ]**

**SOALAN : 81**

Minta **Perdana Menteri** menyatakan:-

- a) apakah perkembangan kajian untuk merangka Undang-Undang Dana Politik oleh Pusat Governans, Integriti dan Anti-Rasuah Nasional (GIACC) serta bilakah ianya akan dibentangkan di Parlimen; dan
  
- b) sejauh manakah pelantikan Ketua Pesuruhjaya SPRM yang baharu ini menampakkan tahap integriti yang tinggi serta bebas daripada pengaruh politik sedia ada terutamanya di pihak Kerajaan. Mengapa ia tidak diperhalusi oleh Jawatankuasa Pilihan Khas Integriti dan Pencegahan Rasuah.

**JAWAPAN:**

Yang di-Pertua,

1. Untuk makluman Yang Berhormat, Pasukan Petugas Khas telah ditubuhkan pada 26 Julai 2018 yang dianggotai oleh pegawai GIACC, Penasihat Undang-undang Jabatan Perdana Menteri dan Jabatan Peguam Negara.
2. Selaras dengan keputusan Jemaah Menteri bertarikh 10 Oktober 2018, kajian telah dilaksanakan mengenai amalan terbaik yang dilaksanakan oleh negara luar berhubung sumbangan politik. Antara aspek yang perlu dikaji meliputi sumber pembiayaan, penetapan jumlah sumbangan minimum atau maksimum serta tindakan yang perlu diambil sekiranya berlaku pelanggaran.
3. Perbandingan antara negara berhubung skop undang-undang pengawalseliaan sumbangan politik adalah seperti berikut:
- 4.

<b>Perkara</b>	<b>Singapura</b>	<b>Korea Selatan</b>	<b>Indonesia</b>	<b>Canada</b>
Sumbangan asing dibenarkan	Tidak	Tidak	Ya	Tidak
Sumbangan politik dilaporkan	Ya	Ya	Ya	Ya
Denda dikenakan terhadap pelanggaran	Denda dan penjara	Denda, penjara, harta dirampas dan dilucuthak, hilang kelayakan bertanding	Denda dan penjara	Denda, penjara, pembatalan pendaftaran parti

**NO. SOALAN: 81**

Laporan sumbangan dipaparkan secara umum	Ya	Ya	Ya	Ya
--	----	----	----	----

5. Sehubungan itu, rang undang-undang ini akan diperkenalkan oleh Kerajaan setelah kajian teliti dasar yang dicadangkan dimuktamadkan bagi memastikan prinsip ketelusan dan mekanisme pelaksanaan yang berkesan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN AHMAD FAHMI BIN MOHAMED FADZIL  
[ LEMBAH PANTAI ]**

**TARIKH : 4 JULAI 2019 (KHAMIS)**

**SOALAN NO. 82**

Minta **MENTERI HAL EHWAL EKONOMI** menyatakan langkah-langkah yang akan diambil Kerajaan untuk meningkatkan peratus gaji yang diterima pekerja berbanding pemodal untuk mencapai sasaran seperti yang dinyatakan dalam Kajian Separuh Penggal Rancangan Malaysia Ke-11 (RMK11).

**JAWAPAN**

Tuan Yang di-Pertua,

1. Sepertimana Ahli Yang Berhormat sedia maklum, Kajian Separuh Penggal Rancangan Malaysia Ke-11 telah mensasarkan Pampasan Pekerja kepada KDNK sebanyak 38% menjelang 2020 iaitu peningkatan sebanyak 2.8% berbanding 35.2% pada 2017. Antara faktor yang dijangka akan menyumbang kepada peningkatan ini adalah :

**i. Menarik Pelaburan Berkualiti**

Pelaburan berkualiti tinggi akan diberi keutamaan sepanjang RMK-11 bagi mewujudkan lebih banyak pekerjaan berkemahiran tinggi. Dalam hal ini, Kerajaan akan mengkaji semula Akta Penggalakan Pelaburan 1986 bagi menarik lebih banyak pelaburan berkualiti tinggi. Pelaburan berkualiti tinggi akan mengalihkan industri

tempatan ke rantaian yang lebih tinggi yang memberi keutamaan lebih kepada automasi berbanding intensif buruh. Peralihan ini dijangka akan mengurangkan kebergantungan industri tempatan terhadap pekerja asing. Industri di rantaian yang tinggi akan menggajikan pekerja berkemahiran dengan upah yang tinggi. Peningkatan upah ini seterusnya dijangka akan merapatkan jurang antara peratus gaji yang diterima pekerja berbanding pemodal.

**ii. Mengkaji Semula Dasar Gaji Minimum**

Selaras dengan Perintah Gaji Minimum 2018, Kerajaan telah menaikkan gaji minimum bulanan kepada RM1,100 mulai 1 Januari 2019. Kerajaan juga akan terus mengkaji semula dasar gaji minimum setiap dua tahun sekali seperti yang ditetapkan oleh Akta Majlis Perundingan Gaji Negara (MPGN) 2011. Bagi memastikan pekerja berkenaan mendapat manfaat dari pelaksanaan tersebut, penguatkuasaan akan dipertingkat bagi memastikan pematuhan kepada perintah ini.

**iii. Membangunkan Indeks Gaji Kebangsaan**

Bagi memastikan pekerja mendapat gaji yang setimpal dengan tahap kelulusan, Kerajaan telah melancarkan Indeks Gaji Kebangsaan (*National Wage Index; NWI*) pada 19 Februari 2019. NWI akan menjadi panduan dan penanda aras kepada majikan dalam menentukan tahap gaji yang sesuai, selaras dengan tahap kelayakan dan kemahiran pekerja. NWI dibangun dengan menggabungkan data upah dari pelbagai sumber bagi memberi gambaran yang lebih baik berkenaan gaji. Dengan adanya NWI sebagai panduan gaji yang sepatutnya diterima, pekerja dapat memanfaatkannya untuk berunding dengan pihak majikan lantas mewujudkan kuasa tawar-menawar (*bargaining power*). Ianya juga bertindak sebagai penanda aras pasaran yang secara tidak langsung akan “memaksa” majikan untuk meningkatkan gaji mengikut kadar semasa untuk mengelak pekerjanya bertukar ke majikan yang lain.

**iv. Memperluas Sistem Upah yang Dikaitkan dengan Produktiviti (PLWS)**

Kerajaan sedang berusaha bagi meningkatkan bilangan majikan yang menerima pakai Sistem Upah yang Dikaitkan dengan Produktiviti (*Productivity Linked Wage System; PLWS*). Sehingga kini, lebih kurang 85,000 buah syarikat telah menerima pakai PLWS yang memberi manfaat kepada hampir 4.2 juta orang pekerja. Pelaksanaan PLWS akan memastikan pekerja dibayar setimpal dengan produktiviti yang dihasilkan. Di samping itu, peningkatan kemahiran dan latihan kemahiran semula akan dipergiat untuk meningkatkan produktiviti buruh ke arah meningkatkan gaji dan upah mereka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**  
**MESYUARAT KEDUA, PENGGAL KEDUA**  
**PARLIMEN KEEMPAT BELAS**

**PERTANYAAN : LISAN**

**DARIPADA : DATO' SRI ISMAIL SABRI BIN YAAKOB**

**TARIKH : 4 JULAI 2019**

**SOALAN NO. 83**

Minta **PERDANA MENTERI** menyatakan sejauh manakah kejayaan desentralisasi kuasa kepada Sabah dan Sarawak dan jelaskan secara terperinci kuasa-kuasa tersebut.

**JAWAPAN:**

Yang di-Pertua,

Semenjak daripada 17 Disember 2018 sehingga sekarang, Jawatankuasa Khas Kabinet Untuk Menyemak Pelaksanaan Perjanjian Malaysia 1963 telah bersidang beberapa kali. Untuk makluman Dewan yang mulia ini, Jawatankuasa-Jawatankuasa Kerja yang ditubuhkan telah menjalankan perbincangan masing-masing bagi meneliti senarai isu-isu yang dikemukakan oleh Kerajaan Negeri Sabah dan Sarawak termasuk yang menyentuh desentralisasi kuasa Kerajaan Persekutuan selaras dengan rangka tuntutan di bawah Perjanjian Malaysia 1963.

Jawatankuasa ini telah membincangkan isu-isu yang dikemukakan dan mempertimbangkan cadangan-cadangan yang dikemukakan hasil dari rundingan semua pihak berkepentingan. Satu Laporan terperinci akan disediakan berhubung dengan hasil semakan yang telah dibuat beserta dengan cadangan hala tuju untuk diangkat kepada Jemaah Menteri untuk pertimbangan selanjutnya. Ini dijangka akan berlaku dalam masa terdekat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : YB PUAN ALICE LAU KIONG YIENG  
[LANANG]**

**TARIKH : 4 JULAI 2019 (KHAMIS)**

**MENJAWAB**

**SOALAN No. 84**

Minta **PERDANA MENTERI** menyatakan apakah pandangan Kerajaan terhadap gerakan Sarawak keluar dari Malaysia yang diusahakan oleh beberapa golongan di Sarawak dan adakah negeri Sarawak dibenarkan keluar dari Malaysia di bawah Perlembagaan Persekutuan dan Perjanjian Malaysia 1963 serta apakah tindakan yang boleh diambil kepada mereka yang terlibat dalam usaha memisahkan Sarawak dari Malaysia.

**JAWAPAN:**

1. Tiada apa-apa peruntukan dalam Perlembagaan Persekutuan, Akta Malaysia 1963, Perjanjian Malaysia 1963 mahupun *Inter-Governmental Committee Report (IGC Report)* yang menyatakan berkenaan dengan mana-mana hak bagi Negeri Sabah dan Sarawak untuk keluar dari Malaysia. Hak untuk keluar dari Malaysia sememangnya tidak dicadangkan sebagai terma penubuhan Malaysia. Hal ini dapat dilihat dalam Laporan Suruhanjaya Cobbold seperti yang berikut:

***“Right to Secede***

*A number of witnesses suggested that there should be a trial period with a right to secede from the Federation after a stated number of years. We believe that inclusion of a secession clause would mean a continuation throughout the trial period of political and perhaps racial divisions. We feel that if it is decided to create a Federation, decision should be made wholeheartedly and without reservations. We do not recommend inclusion of a secession clause.”*

2. Antara tindakan yang boleh diambil terhadap orang yang terlibat dalam usaha memisahkan Sarawak dari Malaysia adalah seperti yang berikut:

(a) Akta Hasutan 1948 [Akta 15]

***“Kesalahan***

4. (1) *Mana-mana orang yang—*

- (a) melakukan atau cuba melakukan, atau membuat apa-apa persediaan untuk melakukan, atau berkomplot dengan mana-mana orang untuk melakukan, apa-apa perbuatan yang mempunyai kecenderungan menghasut, atau, jika dilakukan, akan mempunyai kecenderungan menghasut;
- (b) menyebut apa-apa perkataan menghasut;
- (c) mencetak, menerbitkan, menjual, menawarkan untuk dijual, mengedarkan atau mengeluarkan semula apa-apa penerbitan menghasut; atau
- (d) mengimport apa-apa penerbitan menghasut,

*melakukan suatu kesalahan dan, apabila disabitkan, boleh bagi kesalahan kali pertama didenda tidak melebihi lima ribu ringgit atau dipenjarakan selama tempoh tidak melebihi tiga tahun atau kedua-duanya dan, bagi kesalahan yang kemudian, boleh dipenjarakan selama tempoh tidak melebihi lima tahun; dan apa-apa penerbitan menghasut yang didapati dalam milik orang itu atau yang digunakan sebagai keterangan dalam perbicaraannya hendaklah dilucutahkan dan boleh dimusnahkan atau dilupuskan dengan apa-apa cara lain sebagaimana yang diarahkan oleh mahkamah.*

*(2) Mana-mana orang yang ada dalam miliknya tanpa sebab yang sah apa-apa penerbitan menghasut melakukan suatu kesalahan dan, apabila disabitkan, boleh bagi kesalahan kali pertama didenda tidak melebihi dua ribu ringgit atau dipenjarakan*

*selama tempoh tidak melebihi lapan belas bulan atau kedua-duanya, dan, bagi kesalahan yang kemudian, boleh dipenjarakan selama tempoh tidak melebihi tiga tahun, dan penerbitan itu hendaklah dilucutahkan dan boleh dimusnahkan atau dilupuskan dengan apa-apa cara lain sebagaimana yang diarahkan oleh mahkamah.”.*

Tafsiran “menghasut” dan “kecenderungan menghasut” masing-masing diperuntukkan di bawah seksyen 2 dan 3 Akta 15 seperti yang berikut:

**“Tafsiran**

**2. Dalam Akta ini—**

*“menghasut” apabila dipakai bagi atau digunakan berkenaan dengan apa-apa perbuatan, ucapan, perkataan, penerbitan atau apa-apa benda lain menjadikan perbuatan, ucapan, perkataan, penerbitan atau benda lain itu sebagai yang mempunyai kecenderungan menghasut;*

**Kecenderungan menghasut**

**3. (1) Sesuatu “kecenderungan menghasut” ialah kecenderungan—**

- (a) *bagi mendatangkan kebencian atau penghinaan atau bagi membangkitkan perasaan tidak setia terhadap mana-mana Raja atau Kerajaan;*

- (b) bagi membangkitkan rakyat mana-mana Raja atau penduduk mana-mana wilayah yang diperintah oleh mana-mana Kerajaan supaya cuba mendapatkan perubahan, dengan apa-apa cara selain cara yang sah, apa-apa juga yang wujud menurut undang-undang di dalam wilayah Raja itu atau wilayah yang diperintah oleh Kerajaan itu;
- (c) bagi mendatangkan kebencian atau penghinaan atau bagi membangkitkan perasaan tidak setia terhadap pentadbiran keadilan di Malaysia atau di mana-mana Negeri;
- (d) bagi menimbulkan perasaan tidak puas hati atau tidak setia di kalangan rakyat Yang di-Pertuan Agong atau rakyat Raja mana-mana Negeri atau di kalangan penduduk Malaysia atau penduduk mana-mana Negeri;
- (e) bagi mengembangkan perasaan niat jahat dan permusuhan antara kaum atau golongan penduduk yang berlainan di Malaysia; atau
- (f) bagi mempersoalkan apa-apa perkara, hak, taraf, kedudukan, keistimewaan, kedaulatan atau prerogatif yang ditetapkan atau dilindungi oleh peruntukan Bahagian III Perlembagaan Persekutuan atau Perkara 152, 153 atau 181 Perlembagaan Persekutuan.”.

Bagaimanapun, seiring dengan dasar kerajaan yang menggalakkan kebebasan bersuara seperti termaktub di bawah Fasal (1) Perkara 10 Perlembagaan Persekutuan, pemakaian peruntukan di bawah Akta Hasutan ini hanya diguna pakai dalam keadaan yang perbuatan menghasut tersebut menimbulkan suasana yang tidak terkawal sehingga menjelaskan kepentingan keselamatan dan ketenteraman awam.

(b) Kanun Keseksaan [Akta 574]

***“Waging or attempting to wage war or abetting the waging of war against the Yang di-Pertuan Agong, a Ruler or Yang di-Pertua Negeri***

***121. Whoever wages war against the Yang di-Pertuan Agong or against any of the Rulers or Yang di-Pertua Negeri, or attempts to wage such war, or abets the waging of such war, shall be punished with death or imprisonment for life, and if not sentenced to death shall also be liable to fine.***

***Offences against the authority of the Yang di-Pertuan Agong, Ruler or Yang di-Pertua Negeri***

***121B. Whoever compasses, imagines, invents or intends the deposition or deprivation of the Yang di-Pertuan Agong from the sovereignty of Malaysia or the deprivation or deposition of the Ruler, his heirs or successors, or of the Yang di-Pertua Negeri from the rule of a State, or the overawing by means of criminal force or the show***

*of criminal force the Government of Malaysia or of any State, shall be punished with imprisonment for life and shall also be liable to fine.*

***Abetting offences under section 121A or 121B***

***121C.*** *Whoever abets the commission of any of the offences punishable by section 121A or 121B shall be punished with the punishment provided for the said offences.”.*

Kesalahan di bawah seksyen 121, 121B dan 121C hanya terpakai sekiranya melibatkan tindakan yang serius seperti perbuatan atau persediaan melakukan perbuatan dengan jalan kekerasan jenayah atau dengan menunjukkan kekerasan jenayah yang melibatkan tindakan seperti membuat persediaan penggunaan senjata atau penggunaan senjata.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN :** **LISAN**

**DARIPADA :** **YB DATIN MASTURA BINTI MOHD YAZID  
[KUALA KANGSAR]**

**TARIKH :** **4 JULAI 2019**

**SOALAN :**

Datin Mastura binti Mohd Yazid [Kuala Kangsar] minta **PERDANA MENTERI** menyatakan apakah pecahan atau peratusan mengikut kegunaan wang yang terkumpul di dalam Baitulmal.

**JAWAPAN: (YB DATUK SERI DR. MUJAHID BIN YUSOF, MENTERI DI JABATAN PERDANA MENTERI)**

Tuan Yang Di Pertua,

Sebagaimana Ahli Yang Berhormat sedia maklum, di bawah Butiran 1, Senarai 2, Jadual Kesembilan, Perlembagaan Persekutuan, hal-ehwal Agama Islam termasuklah urusan Baitulmal adalah terletak di bawah bidang kuasa Kerajaan Negeri menerusi Majlis Agama Islam Negeri-negeri.

Di Wilayah Persekutuan, Majlis Agama Islam Wilayah Persekutuan (MAIWP) adalah Badan Berkanun Persekutuan yang diletakkan di bawah Jabatan Perdana Menteri dan bernaung di bawah Seri Paduka Baginda Yang di-Pertuan Agong. Antara tanggungjawab MAIWP adalah menguruskan dana yang biasa disebut dengan isitilah dana Baitulmal.

MAIWP akan mengagihkan peruntukan dana Baitulmal ini kepada semua asnaf yang berhak berdasarkan kutipan zakat tahun semasa menerusi agihan secara langsung dan tidak langsung. Sekiranya kutipan zakat tersebut tidak dapat diagihkan pada tahun semasa, ia akan dibawa ke tahun berikutnya untuk diagihkan.

Pembahagian agihan dana Baitulmal yang diagihkan di antara asnaf ini dibentangkan dalam Mesyuarat Jawatankuasa Perundingan Hukum Syarak sebelum dibelanjakan.

Agihan secara langsung merujuk kepada agihan secara khusus kepada asnaf menerusi 28 skim bantuan zakat dan menampung kos aktiviti dan operasi institusi-institusi di bawah MAIWP seperti institusi pendidikan, perlindungan dan kebajikan.

Pengagihan Secara Tidak Langsung pula merujuk kepada pembangunan prasarana yang menjadi keperluan umat Islam seperti tadika, sekolah, institusi pendidikan lain dan institusi kebajikan yang lain bersesuaian dengan pendekatan Islam Rahmatan Lila'lamin.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN ALICE LAU KIONG YIENG [ LANANG ]**

**TARIKH : 4 JULAI 2019 (KHAMIS)**

**SOALAN NO. 86**

**Puan Alice Lau Kiong Yieng [ Lanang ]** minta **MENTERI AIR, TANAH DAN SUMBER ASLI** menyatakan:

- a) kemaskini program mitigasi banjir di Sibu, khususnya peringkat pelaksanaan/penyiapan dan jumlah peruntukan yang terlibat dari tarikh pelaksanaan hingga bulan Jun 2019; dan
  
- b) rancangan/langkah untuk mengelakkan banjir terutama di kawasan Sentosa, Stabau, Sengan, Bukit Assek, Hua Kiew, Tiong Hua, Tun Ahmad Zaidi Adruce, Pulau Dudong dan kawasan-kawasan yang sering dilanda banjir terutama di kawasan P211 Lanang.

**JAWAPAN**

Tuan Yang di-Pertua,

Projek tebatan banjir utama yang telah dilaksanakan di Sibu adalah sebagaimana berikut:

- 1) Rancangan tebatan banjir (RTB) Banjir Sibu Fasa 1 dimana projek ini siap dilaksanakan di dalam RMKe-9 dengan kos pelaksanaan projek RM137 juta; dan
- 2) Rancangan tebatan banjir (RTB) Banjir Sibu Fasa 2 dimana projek ini siap dilaksanakan di dalam RMKe-10 dengan kos pelaksanaan projek RM78 juta.

Rancangan Tebatan Banjir Sibu (Fasa 3), Lembangan Batang Rajang, Sarawak telah diluluskan dengan siling kos projek sebanyak RM100 juta dalam RMKe-11. Projek ini dilaksanakan secara reka dan bina telah bermula pada 7 Mei 2019 dan dijangka siap pada 6 Mac 2022. Pelaksanaan kerja-kerja fizikal di tapak adalah sebanyak 10% di mana kerja-kerja awalan sedang dilaksanakan.

Kawasan Sentosa, Stabau, Sengan, Bukit Assek, Hua Kiew, Tiong Hua, Tun Ahmad Zaidi Adruce, Pulau Dudong serta kawasan sekitarnya terletak di dalam Lembangan Sungai Batang Rajang yang terlibat dengan RTB Sibu. Banjir yang berlaku adalah disebabkan oleh saliran bandar yang tidak dapat keluar ketika aras air Batang Rajang tinggi. Dengan pelaksanaan RTB Sibu yang antaranya melibatkan pembinaan pam, secara tidak langsung kejadian banjir yang berlaku di kawasan-kawasan yang berkenaan dapat dikurangkan.

Sekian, terima kasih

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN WILLIAM LEONG JEE  
KEEN [SELAYANG]**

**TARIKH JAWAPAN : 4 JULAI 2019**

**SOALAN NO. 87**

**TUAN WILLIAM LEONG JEE KEEN [SELAYANG]** minta **MENTERI AIR, TANAH DAN SUMBER ASLI** menyatakan perkembangan penstrukturran semula tarif air di setiap negeri dan langkah Kerajaan bagi memastikan infruktur dan kemudahan air dijaga dengan baik supaya tidak lagi berlaku gangguan bekalan air.

**JAWAPAN**

Tuan Yang di-Pertua,

1. Cadangan pelaksanaan Mekanisme Penetapan Tarif Air (*Tariff Setting Mechanism*) atau ringkasnya TSM adalah bertujuan untuk mewujudkan mekanisme penetapan tarif air yang sistematik, telus serta adil bagi manfaat kita semua. TSM mempunyai dua ciri penting. Ciri pertama ialah penyeragaman struktur tarif sedia ada, dan ciri kedua ialah pelarasan kadar tarif sedia.
2. Purata kadar tarif air yang rendah pada masa ini iaitu RM1.38 bagi setiap 1,000 liter tidak melambangkan kos sebenar penyediaan perkhidmatan bekalan air RM2.31 bagi setiap 1,000 liter. Keadaan ini jika dibiarkan berlarutan akan meletakkan operator air dalam kedudukan kewangan yang lemah. Kesannya, perkhidmatan bekalan air yang berkualiti kepada pengguna tidak dapat diberikan.
3. Dari segi perkembangan ke arah melaksanakan TSM, saya ingin memaklumkan bahawa sesi konsultasi dengan operator air, kerajaan-kerajaan negeri serta wakil pengguna telah dilaksanakan melalui Suruhanjaya Perkhidmatan Air Negara (SPAN). Berikutnya, cadangan pelaksanaan TSM akan dikemukakan untuk pertimbangan Jemaah Menteri dalam masa terdekat.

4. Kementerian sentiasa komited dalam memastikan pengguna dapat menikmati perkhidmatan air yang selamat secara berterusan. infrastruktur dan kemudahan air dijaga dengan baik supaya tidak lagi berlaku gangguan bekalan air.
5. Oleh yang demikian, pelaksanaan TSM adalah merupakan suatu strategi penting bagi meningkatkan keupayaan kewangan operator air untuk melaksanakan projek-projek menambah baik infrastruktur sistem bekalan air seperti pembinaan loji rawatan air baharu, menaik taraf loji rawatan sedia ada, menggantikan paip uzur dan kerja-kerja penyelenggaraan peralatan.
6. Perkara ini seterusnya akan dapat mempertingkatkan kualiti perkhidmatan sedia ada oleh operator seperti mengurangkan kekerapan gangguan bekalan air, menghasilkan air terawat berkualiti yang mencapai piawaian yang ditetapkan oleh KKM, tekanan air yang lebih baik dan perkhidmatan pelanggan yang lebih memuaskan.
7. Di samping itu, SPAN melalui mekanisme kawal selia di bawah Akta Industri Perkhidmatan Air 2006 (Akta 655) juga sentiasa menjalankan pemantauan yang rapi ke atas operasi dan pencapaian operator melalui mesyuarat kawal selia secara berkala, audit serta pengenaan petunjuk prestasi utama yang ketat bagi memastikan kualiti perkhidmatannya yang terjamin demi manfaat dan kepentingan rakyat dalam jangka masa panjang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' JOHARI BIN ABDUL [ SUNGAI PETANI ]**

**TARIKH : 4 JULAI 2019 | KHAMIS**

**SOALAN :**

**Dato' Johari bin Abdul [ Sungai Petani ]** minta **PERDANA MENTERI** menyatakan :-

- (a) Apakah hasil pencapaian proses pemulihan dan penstrukturran semula Lembaga Tabung Haji dan apakah tindakan yang telah diambil terhadap amalan memberikan hibah kepada pendeposit Tabung Haji yang melanggar Akta Lembaga Tabung Haji 1995; dan
- (b) Sudahkah mereka yang terlibat dalam melanggar Akta ini dibawa ke mahkamah dan apakah keputusan penghakiman telah dibuat.

**JAWAPAN : (MENTERI DI JABATAN PERDANA MENTERI )**

Tuan Yang Di-Pertua,

Untuk makluman Ahli Yang Berhormat, Lembaga Tabung Haji telah berjaya melaksanakan penstrukturran semula kedudukan kewangannya dan mencatatkan lebihan aset sebanyak RM1.0 bilion bagi tahun kewangan berakhir 31 Disember 2018. Ini menunjukkan kedudukan kewangan yang kembali pulih jika dibandingkan dengan keadaan defisit aset RM4.1 bilion yang dialaminya berdasarkan laporan kewangan yang diaudit bagi tahun 2017.

## NO. SOALAN: 88

Setelah Pelan Penstruktur dan Pemulihan dimuktamatkhan pada 28 Disember 2018, **TH** merekodkan aset keseluruhan berjumlah RM76.5 bilion yang lebih tinggi berbanding liabilitinya berjumlah RM75.5 bilion. Pendapatan bagi tahun 2018 adalah RM4.2 bilion manakala keuntungan boleh agih sebanyak RM2.0 bilion. Berdasarkan prestasi ini, **TH** telah berjaya memenuhi dua syarat yang membolehkan pengisytiharkan hibah dibuat, iaitu (i) mempunyai keuntungan boleh agih dan (ii) aset melebihi liabiliti, yang mematuhi Akta Tabung Haji 1995 (Akta **TH**).

Pelan Penstruktur dan Pemulihan yang telah dilaksanakan membuktikan keprihatinan Kerajaan bagi menyelamatkan **TH** demi kepentingan 9.3 juta pendeposit. **TH** juga telah mencatatkan prestasi yang memuaskan pada suku pertama berakhir 31 Mac 2019, dengan jumlah pendapatan bersih yang belum diaudit sebanyak RM623 juta manakala keuntungan bersih adalah RM440 juta.

Untuk makluman Ahli Yang Berhormat, Laporan Polis DiRaja Malaysia (PDRM) berkaitan manipulasi perakaunan ini telah dibuat pada 16 Januari 2019. Kes-kes yang telah dilaporkan kepada PDRM masih dalam siasatan dan menunggu tindakan pihak berkuasa seterusnya tindakan yang sewajarnya mengikut lunas undang-undang akan diambil terhadap mereka yang didapati bersalah setelah hasil siasatan diperoleh kelak.

Sekian. Terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEDUA  
PARLIMEN KE-EMPAT BELAS**

---

**PERTANYAAN : LISAN**  
**DARIPADA : TUAN STEVEN CHOONG SHIAU YOON**  
**[TEBRAU]**  
**TARIKH : 4 JULAI 2019 (KHAMIS)**

**SOALAN NO. 89**

Minta **MENTERI PENGANGKUTAN** menyatakan sama ada Kerajaan akan menghalang motosikal berkapasiti kurang daripada 250cc menggunakan lebuh raya atau ada pelan tindakan yang lain untuk memastikan keselamatan mereka dan juga pemandu-pemandu kereta.

**JAWAPAN**

Yang di-Pertua,

1. Berdasarkan Akta Pengangkutan Jalan 1987, tiada halangan untuk menggunakan apa-apa jenis kenderaan di atas jalan raya di Malaysia, tetapi peruntukan Seksyen 70 APJ 1987, ada menyatakan kuasa menyekat penggunaan kenderaan-kenderaan pada jalan-jalan tertentu yang sekiranya didapati tidak selamat atau akan menimbulkan bahaya kepada pengguna jalan raya.
2. Kerajaan sentiasa menjalankan kempen dan advokasi melalui pelbagai medium bagi meningkatkan kesedaran masyarakat akan pentingnya mengamalkan penunggangan selamat. Peraturan jalan raya yang ditetapkan seperti pemakaian topi keledar yang mengikut piawaian SIRIM, adalah bagi mengurangkan risiko berlaku kemalangan akibat kecuaian manusia. Kajian yang dijalankan oleh Institut Penyelidikan Keselamatan Jalan Raya (MIROS) mendapati faktor kemalangan yang berlaku di negara ini adalah disebabkan oleh 80.5% faktor manusia, 13.2% disebabkan faktor kejuruteraan dan 6.22% disebabkan faktor persekitaran.
3. Kerajaan melalui pelbagai Agensi Penguatkuasaan seperti Polis Diraja Malaysia dan Jabatan Pengangkutan Jalan sering kali mengadakan program-program bersepadu dalam meningkatkan penguatkuasaan dan tahap kesedaran pengguna jalan raya di Malaysia. Selain itu, peranan pelaksanaan penguatkuasaan peraturan jalan raya oleh agensi penguatkuasaan amatlah penting bagi memastikan keberkesanan peraturan jalan raya yang ditetapkan dalam membentuk sikap pengguna jalan raya yang lebih berhemah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' HAJI MOHD FASIAH BIN HAJI MOHD FAKEH ( SABAK BERNAM )**

**TARIKH : 4 JULAI 2019 (KHAMIS)**

**SOALAN NO. 90**

Minta **MENTERI HAL EHWAL EKONOMI** menyatakan mengapakah dividen 2018 peserta FELCRA menurun kepada RM112 juta sahaja berbanding dividen 2017 RM307 juta.

**JAWAPAN**

Tuan Yang di-Pertua,

1. Untuk makluman Ahli Yang Berhormat, jumlah bayaran lebihan keuntungan (yang lebih dikenali sebagai dividen dalam konteks FELCRA), bagi tahun 2018 adalah RM112.53 juta dan bagi tahun 2017 pula adalah RM340.98 juta, iaitu pengurangan sebanyak RM228.45 juta atau 67%.
2. Pengagihan lebihan keuntungan (juga disebut sebagai dividen dalam konteks FELCRA) adalah dilaksanakan kepada projek-projek yang berhasil dan mempunyai lebihan keuntungan. Lebihan keuntungan ini merupakan lebihan pendapatan bersih yang diperolehi oleh sesebuah projek (ladang) setelah pendapatan kasar projek ditolak kos operasi.
3. Faktor utama yang banyak mempengaruhi penurunan jumlah lebihan keuntungan ini adalah disebabkan oleh kejatuhan ketara purata harga komoditi kelapa sawit, iaitu daripada RM549 per metrik tan pada tahun 2017 kepada RM399 per metrik tan pada tahun 2018, penurunan sebanyak RM150 per metrik tan atau 27%.
4. Begitu juga dengan purata harga minyak sawit mentah (CPO) di pasaran dunia yang turut memperlihatkan kejatuhan daripada RM2,800 per metrik tan pada tahun 2017 kepada hanya RM2,237 per metrik tan pada tahun 2018, iaitu penurunan sebanyak RM563 per metrik tan atau sebanyak 20%.
5. Faktor lain yang turut menyumbang kepada penurunan jumlah lebihan keuntungan ini adalah program tanam semula. Apabila berlaku program tanam semula, sesebuah projek itu akan kehilangan keseluruhan hasilnya sehingga tahun keempat. Projek akan mengeluarkan hasil bermula tahun kelima.

6. Justeru itu, untuk melihat kesan tanam semula ke atas pengurangan pendapatan ladang bagi tahun 2018, maka perlulah dilihat rekod tanam semula yang bermula pada tahun 2014 hingga 2017. Pada tahun 2014, seluas 16,735 hektar sawit telah ditanam semula, 2015 seluas 12,372 hektar, 2016 seluas 8,270 hektar, 2017 seluas 5,803 hektar yang menjadikan jumlah keseluruhan seluas 43,180 hektar.
7. Selain itu, usia pokok juga boleh dikaitkan sebagai faktor penyumbang kepada penurunan jumlah lebihan keuntungan. Secara agronomiknya, pokok kelapa sawit mengalami produktiviti yang rendah iaitu sekitar 12 hingga 13 metrik tan per hektar, pada usia kurang dari 6 tahun iaitu masih di dalam tempoh pra-hasil dan juga apabila usianya melebihi 25 tahun, berbanding 19 hingga 25 metrik tan per hektar bagi usia puncak di antara 7 hingga 15 tahun.
8. Bagi tahun 2017, seluas 30,385 hektar dari ladang-ladang FELCRA termasuk dalam kategori umur pokok sawit yang kurang produktif dengan purata produktiviti 13.5 metrik tan per hektar, manakala bagi tahun 2018 seluas 33,462 hektar dengan purata produktiviti hanya 12.08 metrik tan per hektar.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEDUA  
PARLIMEN KE-EMPAT BELAS**

---

**PERTANYAAN : LISAN**

**DARIPADA : TUAN PRABAKARAN A/L M  
PARAMESWARAN [BATU]**

**TARIKH : 4 JULAI 2019 (KHAMIS)**

**SOALAN NO. 91**

Minta **MENTERI PENGANGKUTAN** menyatakan apakah rancangan bagi penguatkuasaan daripada pihak Kementerian terhadap kenderaan modifikasi yang tidak mengikut piawaian dan yang tidak mempunyai dokumen yang sah ketika pengubahsuaian enjin kenderaan.

**JAWAPAN**

Yang di-Pertua,

1. Untuk makluman Ahli Yang Berhormat, Kementerian Pengangkutan melalui Jabatan Pengangkutan Jalan telah melaksanakan pelbagai bentuk operasi untuk memastikan pengguna jalan raya, kenderaan yang digunakan, dan persekitaran jalan raya sentiasa selamat untuk digunakan. Merujuk kepada statistik penguatkuasaan yang telah dilaksanakan, data menunjukkan jumlah kenderaan yang disita oleh JPJ atas kesalahan mengubah modifikasi asal kenderaan dan tidak mengikut spesifikasi keselamatan yang sebenar adalah sebanyak 14,836 kes pada tahun 2018 manakala sehingga 31 Mei 2019 adalah sebanyak 11,632 kes telah direkodkan. Ianya melibatkan notis PG1 Seksyen 59 APJ 1987 dan notis 64(1) Seksyen 64 APJ 1987.

**NO. SOALAN: 91**

2. Pihak Kementerian akan terus menjalankan aktiviti penguatkuasaan secara operasi dan rondaan bagi memastikan kenderaan yang digunakan mengikut spesifikasi yang dibenarkan dan selamat untuk pemanduan dan pengguna jalan raya yang lain.
3. Selain itu, sebarang pengubahsuaian atau modifikasi kenderaan yang tidak mengikut peraturan akan memberi kesan negatif kepada pemilik kenderaan itu sendiri di mana perlu kenderaan perlu diubah semula kepada spesifikasi asal kenderaan apabila ingin membuat proses jual/ beli kenderaan kerana tidak mematuhi syarat pemeriksaan berkomputer oleh PUSPAKOM.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN NOORITA BINTI SUAL [ TENOM ]**

**TARIKH : 4 JULAI 2019 (KHAMIS)**

**SOALAN NO. 92**

Puan Noorita binti Sual [ Tenom ] minta **MENTERI AIR, TANAH DAN SUMBER ASLI** menyatakan apakah tindakan pihak Kementerian dalam menangani hakisan tebing sungai yang berlaku berdekatan Kg. Amboi di laluan utama jalan raya penduduk dari Kemabong ke Pekan Tenom dan hakisan tebing Sungai Pegalan di Pusat Kebudayaan Murut Sabah di kawasan Parlimen Tenom.

**JAWAPAN**

Tuan Yang di-Pertua,

Untuk makluman, kerja-kerja penyelenggaraan sungai adalah di bawah tanggungjawab Kerajaan Negeri. Walau bagaimanapun, di bawah **Program Pemuliharaan Sungai Untuk Mengurangkan Risiko Banjir Pelbagai Negeri**, Kementerian Air, Tanah Dan Sumber Asli (KATS) membantu Kerajaan Negeri dengan menyalurkan peruntukan melalui Jabatan Pengairan Dan Saliran (JPS) Negeri bagi melaksanakan kerja-kerja yang berkaitan dengan isu hakisan tebing sungai, pembersihan serta mendalamkan saliran/ sungai.

Bagi tahun 2018, peruntukan sebanyak RM20.6juta telah diagihkan ke seluruh Negeri Sabah melalui JPS Negeri Sabah. Bagi tahun 2019 pula, sebanyak RM6juta telah disalurkan kepada Negeri Sabah.

Skop kerja yang terlibat di bawah program tersebut adalah kerja pengorekan sungai, muara sungai, pembinaan struktur hakisan tebing sungai, mambuang kelodak, sampah, sisa pepejal, pemotongan rumput, menaik taraf dan menyelenggara aset/ struktur kawalan banjir yang bertujuan mengurangkan risiko banjir.

Sekian, terima kasih

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' MANSOR OTHMAN  
[ NIBONG TEBAL ]**

**TARIKH : 04.07.2019 ( KHAMIS )**

**SOALAN NO 93**

Minta **PERDANA MENTERI** menyatakan jumlah kes rasuah yang disabitkan kesalahan semenjak Kerajaan PH memerintah dan berapakah jumlah kertas siasatan yang dikemukakan kepada Jabatan Peguam Negara tetapi belum diangkat ke mahkamah untuk pendakwaan.

**JAWAPAN:**

Yang Di-Pertua,

Untuk makluman Yang Berhormat Nibong Tebal, sejumlah 163 kes rasuah telah disabitkan kesalahannya semenjak PRU ke-14 sehingga bulan Mei 2019. Dalam tempoh yang sama, sejumlah 43 kertas siasatan telah dikemukakan kepada Jabatan PEGUAM NEGARA (JPN) untuk pertimbangan dan keputusan. Sebanyak 29 kertas siasatan telah dituduh di mahkamah, 2 kertas siasatan telah dikeluarkan Laporan SPRM (LSPRM) untuk diperakukan tindakan tatatertib kepada Ketua Jabatan masing-masing, manakala 11 kertas siasatan dalam tindakan lanjut SPRM dan baki 1 kertas siasatan lagi telah di Kemas Untuk Simpan (KUS).

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SANISVARA NETHAJI RAYER A/L  
RAJAJI**

**KAWASAN : [ JELUTONG ]**

**TARIKH : 4 JULAI 2019 (KHAMIS)**

**SOALAN**

Minta **PERDANA MENTERI** menyatakan apakah tindakan yang akan diambil oleh Kerajaan sekarang terhadap pihak-pihak dan / ataupun individu-individu yang telah menyelewengkan dana yang telah disalurkan kepada (SEDIC) Socioeconomic Development of the Indian Community oleh Kerajaan Barisan Nasional dahulu.

**JAWAPAN**

Tuan Yang di-Pertua,

Pengauditan pertama ke atas SEDIC telah dijalankan pada 26 September 2018 oleh Jabatan Audit Negara. Sebarang penyalahgunaan di bawah pemerintahan Kerajaan lama (sekiranya ada) hanya dapat dikenal pasti selepas laporan akhir pengauditan dikeluarkan oleh Jabatan Audit Negara.

Walau bagaimanapun, MITRA tidak mempunyai bidang kuasa untuk menjalankan penyiasatan atau pendakwaan ke atas individu-individu yang didapati melakukan penyelewengan atau penyalahgunaan kuasa. Dalam hal ini, MITRA yakin konsep “*Rule Of Law*” akan dipraktikkan dan segala kesalahan akan disiasat dengan sewajarnya oleh pihak berkenaan iaitu SPRM / PDRM. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN LARRY SOON @ LARRY SNG WEI  
[ JULAU ]**

**TARIKH : 4 JULAI 2019**

**SOALAN : 95**

**Tuan Larry Soon @ Larry Sng Wei [ Julau ]** minta **PERDANA MENTERI** menyatakan jumlah terkini penjawat awam Kerajaan Pusat menurut pecahan etnik dan bilangan penjawat awam daripada kalangan rakyat berasal dari Sabah dan Sarawak.

**JAWAPAN: YB DATUK WIRA DR. MD FARID BIN MD RAFIK  
TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, jumlah penjawat awam di Kerajaan Pusat mengikut pecahan etnik dan jawatan di kalangan rakyat berasal dari Sabah dan Sarawak adalah seperti berikut:

Bumiputera Sabah	Bumiputera Sarawak
89,925	57,624

Sekian, terima kasih.

**PEMBERITAHUAN PERTANYAAN LISAN DEWAN RAKYAT**  
**MESYUARAT KEDUA PENGGAL KEDUA,**  
**PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN NOOR AMIN BIN AHMAD  
[ KANGAR ]**

**TARIKH : 04 JULAI 2019 (KHAMIS)**

**SOALAN NO. 96**

Minta **MENTERI SUMBER MANUSIA** menyatakan sama ada Kementerian mempunyai program khusus untuk membantu banduan-banduan mendapat latihan kemahiran dan memasuki semula pasaran kerja selepas dibebaskan.

**JAWAPAN**

Tuan Yang di-Pertua,

1. Kementerian Sumber Manusia (KSM) melalui Jabatan Pembangunan Kemahiran (JPK) telah bekerjasama dengan Jabatan Penjara Malaysia (JPM) untuk menyediakan khidmat latihan TVET dengan pelaksanaan Sistem Latihan Dual Nasional (SLDN) di 37 buah penjara yang telah diluluskan oleh JPK sebagai penyedia latihan SLDN di seluruh Malaysia termasuk Sabah dan Sarawak.

## **SOALAN NO: 96**

2. Sehingga April 2019, seramai tiga belas ribu, tujuh ratus tujuh puluh sembilan (13,779) perantis terdiri daripada banduan dan tahanan telah berjaya didaftarkan di dalam pelbagai program meliputi empat puluh tujuh(47) kod bidang, berpandukan Standard Kemahiran Pekerjaan Kebangsaan (NOSS). Banduan dilatih supaya memiliki kemahiran yang menjadi nilai tambah untuk diterima dalam pasaran pekerjaan. Mereka juga mendapat persijilan kemahiran Malaysia yang diiktiraf Kerajaan dan industri.
3. Program SLDN ini menjadi platform menyediakan peluang pekerjaan kepada bekas banduan yang mengikuti program ini supaya dapat menyara kehidupan selepas dibebaskan. Ia sekali gus menjadi kaedah pemulihan yang efektif dengan penumpuan diberi kepada meningkatkan taraf ekonomi mereka.
4. Kesimpulannya, kejayaan program SLDN di JPM ini menggalakkan Kerajaan untuk meneruskan program tersebut dengan agensi-agensi lain yang mahu bekerjasama dengan KSM bagi membantu memulihkan dan mengembalikan banduan untuk hidup dalam kalangan masyarakat dengan lebih baik.

**SOALAN TAMBAHAN 1**

**Apakah antara bidang yang dipilih oleh Jabatan Penjara Malaysia (JPM) bagi dilaksanakan latihan secara SLDN?**

**JAWAPAN**

Tuan Yang di-Pertua,

1. Jabatan Penjara Malaysia (JPM) bekerjasama dengan JPK dan beberapa agensi lain untuk melaksanakan persijilan secara SLDN bagi bidang ‘Pemanduan Kenderaan Perdagangan’.
2. Objektif program adalah untuk melatih bekas banduan dan tahanan sebagai perantis bagi mempelajari dan meneruskan kemahiran yang diperolehi di JPM untuk dipraktik di alam kerja sebenar. Mereka turut ditawarkan kerjaya sebagai pemandu profesional dan terlatih bagi kenderaan perdagangan. Malah, peningkatan kerjaya juga terbuka luas dalam bidang ini di mana perantis yang berjaya boleh mencapai tahap yang lebih tinggi pada masa hadapan sebagai Penyelia Eksekutif, Penolong Pengurus dan Pengurus Pengangkutan. Setiap perantis layak dipersijilkan dengan Sijil Kemahiran Malaysia (SKM) sehingga ke tahap 2 bagi bidang NOSS :TP-320-2:2012- *Light, Public Service & Goods Vehicle Driving.*

**SOALAN TAMBAHAN 2:**

**Berapa ramai banduan yang telah dipersijilkan untuk program dalam bidang ‘Pemanduan Kenderaan Perdagangan’?**

**JAWAPAN**

Tuan Yang Di Pertua,

Sehingga Mac 2018, seramai 153 orang perantis telah berjaya dipersijilkan dengan SKM tahap 2 dan mendapat pekerjaan di pelbagai syarikat pengangkutan seperti Syarikat Konsortium Transnasional Berhad, Pengangkutan Maju Berhad dan Metrobus sebaik sahaja selesai tamat latihan dengan pendapatan bulanan RM2000 hingga RM2500.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK HAJI HASANUDDIN BIN MOHD.  
YUNUS [HULU LANGAT]**

**TARIKH : 4 JULAI 2019**

**SOALAN : 97**

**Datuk Haji Hasanuddin bin Mohd. Yunus [Hulu Langat]** minta **PERDANA MENTERI** menyatakan adakah kerajaan mempunyai perancangan **penambahan anggota tetap** Angkatan Pertahanan Awam (APM) dan **menaik taraf skim KP** yang dilihat masih terkebelakang berbanding bomba memandangkan pegawai APM di daerah-daerah masih lagi dalam kalangan kumpulan sokongan berbanding tugas dan risiko yang dipikul mereka apabila bencana berlaku.

**JAWAPAN: YAB DATO' SERI DR. WAN AZIZAH DR. WAN ISMAIL**  
**TIMBALAN PERDANA MENTERI**

Tuan Yang di-Pertua,

1. Angkatan Pertahanan Awam Malaysia (APM) memainkan peranan yang besar di bawah peruntukan kuasa di bawah Akta Angkatan Pertahanan Awam Malaysia 1951 atau Akta 221 yang meliputi persediaan dan latihan anggota Angkatan sebelum berlaku bencana; memainkan peranan sebagai pasukan penyelamat utama di lapangan semasa bencana; dan melaksanakan khidmat kemanusiaan serta pemulihian situasi selepas bencana. APM juga diberikan mandat sebagai Sekretariat kepada Jawatankuasa Pengurusan Bencana di peringkat Negeri dan Daerah serta bertanggungjawab menerajui aspek kesiapsiagaan awam dengan melatih seramai mungkin rakyat atau komuniti untuk bertindak balas apabila berlaku kecemasan dan bencana.
2. Pada ketika ini, APM kini diterajui oleh seramai 1,265 orang pegawai tetap dan sehingga Mei 2019, sebanyak 1,188 atau 94% jawatan telah diisi. Daripada jumlah tersebut, sebanyak 580 perjawatan adalah pegawai tetap beruniform dari Skim Keselamatan dan Pertahanan Awam atau Skim KP dan baki 608 perjawatan lagi adalah penjawat dari Skim Perkhidmatan Guna Sama. Berdasarkan kepada kedudukan perjawatan dinyatakan, beberapa langkah telah diambil untuk mengoptimumkan penggunaan sumber manusia di APM bagi memastikan pengoperasian APM terus dilaksanakan di setiap peringkat khususnya di pejabat Pertahanan Awam Negeri dan Daerah yang melaksanakan fungsi penting sebagai Sekretariat kepada Jawatankuasa Pengurusan Bencana Negeri dan Daerah.
3. Antara langkah yang diambil untuk memperkasakan APM adalah membuat penyusunan semula organisasi mengikut keperluan semasa dan bermula pada tahun 2019 ini, APM telah melaksanakan audit perjawatan sedia ada sebelum mengemukakan sebarang permohonan pertambahan perjawatan atau penyusunan semula

## **SOALAN NO : 97**

organisasi kepada pihak Jabatan Perkhidmatan Awam atau JPA. Sebarang pertambahan dan penyusunan semula perjawatan di APM juga mengambil kira kaedah *trade-off* dan *redeployment* selaras dengan pelaksanaan dasar sedia ada mengenai kawalan saiz perkhidmatan awam serta penggunaan sumber manusia secara optimum.

4. Pertambahan jawatan ini adalah berdasarkan peranan dan tanggungjawab APM di dalam memberi perkhidmatan kecemasan melalui *Malaysia Emergency Response Services 999* atau MERS 999, serta selaku Sekretariat kepada Jawatankuasa Pengurusan Bencana di peringkat Negeri dan Daerah. Dengan cadangan pertambahan perjawatan ini, APM mampu melaksanakan peranan dan tanggungjawabnya dengan lebih efisyen dan berkesan. Pertambahan jawatan ini akan menjadi pemangkin semangat kepada anggota Angkatan dan memantapkan lagi pengurusan sedia ada agar dapat terus memberikan perkhidmatan terbaik dan berkesan kepada seluruh rakyat Malaysia.

5. Pada ketika ini juga, bagi menampung keperluan perjawatan berbanding beban tugas dan risiko sedia ada khususnya di peringkat negeri dan daerah, pegawai tetap Skim KP APM telah ditugaskan untuk memantau serta melaksanakan tugas mengikut zon yang melibatkan pengagihan beberapa daerah di setiap negeri. Ini bertujuan untuk menampung bilangan perjawatan yang kecil di hampir semua Pejabat Daerah Pertahanan Awam seluruh negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**  
**MESYUARAT KEDUA, PENGGAL KEDUA**  
**PARLIMEN KEEMPAT BELAS**

**PERTANYAAN : LISAN**

**DARIPADA : YB TUAN NOOR AMIN BIN AHMAD  
[KANGAR]**

**TARIKH : 4 JULAI 2019 (KHAMIS)**

**SOALAN NO. 98**

Minta **PERDANA MENTERI** menyatakan apakah langkah-langkah yang akan diambil bagi membolehkan Jawatankuasa Pilihan Parlimen (PSC) berfungsi secara lebih berkesan untuk mencapai objektif reformasi institusi yang diumumkan.

**JAWAPAN:**

Yang di-Pertua,

Untuk makluman Ahli Yang Berhormat, dalam usaha-usaha ke arah mengembalikan wibawa institusi Parlimen, sebanyak enam (6) Jawatankuasa Pilihan Khas (*Special Select Committee*) telah ditubuhkan termasuk Jawatankuasa Pilihan Khas Untuk Melantik Jawatan-Jawatan Utama Perkhidmatan Awam sebagai perintis berdasarkan kepentingan dan hala tuju negara yang telah diluluskan oleh Majlis Mesyuarat Dewan Rakyat pada Khamis, 16 Ogos 2018 semasa Mesyuarat Pertama, Penggal Pertama, Parlimen Keempat Belas.

Penubuhan Jawatankuasa-jawatankuasa Pilihan Khas ini adalah bagi mewujudkan satu sistem mekanisme semak dan imbang serta pengawasan (*oversight*) yang lebih menyeluruh, di samping memupuk nilai akauntabiliti dalam ketiga-tiga cabang Kerajaan: Eksekutif, Perundangan dan Kehakiman di bawah satu badan yang bebas dan bipartisan yang diletakkan di bawah kawal selia Parlimen Malaysia. Penubuhan Jawatankuasa-jawatankuasa Pilihan Khas ini juga adalah selari dengan amalan Parlimen di negara-negara luar dan sejajar dengan *Recommended Benchmarks for Democratic Legislators, Commonwealth Parliamentary Association* (CPA). Ia juga selaras dengan aspirasi Kerajaan melalui Janji 16: Mengembalikan Wibawa Institusi Parlimen.

Jawatankuasa-jawatankuasa Pilihan Khas ini menjalankan fungsinya berdasarkan kepada terma rujukan masing-masing yang telah ditetapkan dan secara dasarnya merangkumi tiga aktiviti utama iaitu:

## **SOALAN NO. 98**

- (i) mengkaji atau mengawasi rang undang-undang (*legislative oversight*);
- (ii) pertanyaan (*inquiry*) tentang apa-apa perkara yang bersabit dengan Jawatankuasa itu; dan
- (iii) mengawasi perbelanjaan (*oversight over the finance*).

Sejak penubuhannya, Jawatankuasa-jawatankuasa Pilihan Khas ini kecuali Jawatankuasa Pilihan Khas Menimbang Rang Undang-Undang telah bermesyuarat lebih daripada dua kali bagi menjalankan fungsi-fungsinya tersendiri dan telah menetapkan rangka kerja sepanjang tahun berdasarkan terma rujukan yang telah ditetapkan. Sekian, terima kasih

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SERI DR SHAHIDAN KASSIM [ ARAU ]**

**TARIKH : 4 JULAI 2019 [SELASA]**

**SOALAN :**

**Dato' Seri Dr. Shahidan bin Kassim [ Arau ]** minta PERDANA MENTERI menyatakan adakah pihak Kerajaan turut mempertimbangkan hak dan pengiktirafan kepada sesetengah pemimpin Kerajaan Pakatan Harapan yang bukan Islam dalam isu pemberian wang zakat kepada orang Islam kerana ia boleh menimbulkan kekeliruan serta boleh menimbulkan prasangka buruk oleh orang Islam yang mana tanggungjawab tersebut sepatutnya digalas orang Islam.

**JAWAPAN: (YB DATUK SERI DR. MUJAHID BIN YUSOF,  
MENTERI DI JABATAN PERDANA MENTERI)**

Tuan Yang di-Pertua,

Sebagaimana Ahli Yang Berhormat sedia maklum, pelaksanaan aktiviti agihan zakat adalah berbeza bagi setiap negeri mengikut dasar dan pertimbangan pihak berkuasa agama Islam negeri masing-masing dan Kerajaan Persekutuan tidak boleh mencampuri urusannya dalam perkara berkenaan.

Untuk makluman Ahli Yang Berhormat juga, perkara berkaitan penyerahan bantuan zakat oleh individu bukan Islam kepada asnaf yang dibuat oleh

pemimpin politik bukan beragama Islam sepetimana yang berlaku di Pulau Pinang tempoh hari, penyerahan bantuan oleh wakil rakyat bukan Islam dilihat hanya sebagai pengantara dalam kapasiti sebagai pemimpin masyarakat semasa penyampaian bantuan tersebut, namun apa yang lebih penting adalah zakat tersebut diserahkan kepada golongan yang layak menerima zakat sebagaimana yang dinyatakan di dalam Al-Quran, dalam surah At-Taubah Ayat 60 telah menjelaskan bahawa zakat hanyalah layak diberi kepada lapan golongan asnaf iaitu fakir, miskin, amil, muallaf, fisabilillah, ibnu sabil, al-gharimin dan ar-riqab.

Oleh itu, saya percaya kerajaan negeri telah, sedang dan akan mengambil tindakan terbaik dari semasa ke semasa mengikut kemampuan masing-masing bagi mengendalikan dan meningkatkan perkhidmatan pengurusan zakat.

Sekian, terima kasih

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SERI DR. SHAHIDAN BIN KASSIM  
[ARAU]**

**TARIKH : 4 JULAI 2019 (KHAMIS)**

**SOALAN NO. 100**

**Dato' Seri Dr. Shahidan bin Kassim [Arau]** minta **MENTERI AIR, TANAH DAN SUMBER ASLI** menyatakan untuk mendapatkan maklumat tentang penerokaan hutan yang berlaku secara sah dan tidak sah seperti yang berlaku di Gua Musang (Kelantan), Cameron Highlands, Lipis, Jerantut dan Bentong (Pahang) serta di negeri-negeri lain seperti di Kedah, Perlis, Pulau Pinang, Perak, Selangor, Negeri Sembilan, Melaka, dan Johor. Apakah kerajaan bercadang untuk melibatkan kerajaan negeri lain kerana telah melanggar syarat terutama gagal mengikuti arahan Jabatan Alam Sekitar?.

**JAWAPAN**

Tuan Yang di-Pertua,

- i) Secara umumnya terdapat dua (2) kategori lesen pembalakan di negara ini iaitu:
  - 1) pembalakan dalam kawasan Hutan Simpanan Kekal (HSK); dan
  - 2) pembalakan di luar HSK iaitu di dalam Tanah Kerajaan dan Tanah Berimilik.
- ii) Pembalakan dalam HSK hanya dilaksanakan dalam kawasan yang telah dikelaskan sebagai Hutan Pengeluaran dan tebangan dilakukan secara terkawal melalui amalan Sistem Pengurusan Memilih (*Selective Management System – SMS*).
- iii) Bagi Tanah Kerajaan dan Tanah Berimilik, pembalakan dikeluarkan untuk tujuan pembangunan tanah.

Untuk makluman Ahli-ahli Yang Berhormat juga,

- iv) Jabatan Perhutanan Negeri telah melesenkan kawasan HSK seluas 36,572 hektar bagi tahun 2016, 35,264 hektar bagi tahun 2017 dan 34,833 hektar pada tahun 2018 untuk tujuan pembalakan.

- v) Bagi kawasan luar HSK iaitu di dalam Tanah Kerajaan dan Tanah Berimilik, Jabatan Perhutanan Negeri telah melesenkan kawasan seluas 10,627 hektar pada tahun 2017 dan 36,720 hektar kawasan bagi tahun 2018 untuk tujuan yang sama.
- vi) Kawasan hutan yang ditebang tanpa lesen atau kebenaran oleh Pihak berkuasa Negeri dikategorikan sebagai pembalakan haram. Kawasan yang telah dikesan terbabit dengan pembalakan haram pada tahun 2017 dan 2018 masing-masing adalah seluas 269 hektar dan 110 hektar. Jumlah kawasan yang terbabit dengan pembalakan haram ini mewakili kurang 1% daripada jumlah keluasan Hutan Simpanan Kekal di Semenanjung Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : YB DATO' SERI DR. AHMAD ZAHID BIN HAMIDI**

**[BAGAN DATUK]**

**TARIKH : 4 JULAI 2019**

**MENJAWAB**

**SOALAN NO. 101**

Minta **PERDANA MENTERI** menyatakan sehingga kini adakah masih terdapat sebarang perjanjian antarabangsa yang sedang dalam kajian atau perbincangan untuk ditandatangani oleh Malaysia, yang perlu diketahui oleh rakyat.

**JAWAPAN**

Yang Di-Pertua

1. Perjanjian antarabangsa yang sedang dalam kajian atau perbincangan untuk ditandatangani oleh Malaysia tidak dapat dinyatakan secara spesifik buat masa ini memandangkan pertimbangan sedemikian merupakan perkara dasar yang perlu dibuat oleh pihak Kementerian yang terbabit. Pihak Kementerian yang berkenaan juga akan mengadakan rundingan terlebih dahulu dengan pihak berkepentingan yang terbabit jika diperlukan.
2. Dalam hal ini juga, sebelum mana-mana perjanjian antarabangsa ditandatangani dan diratifikasi, Kerajaan Malaysia hendaklah memastikan terlebih dahulu bahawa perundangan domestik sedia ada adalah selaras atau sekiranya tidak selaras, pindaan kepada undang-undang sedia ada perlulah dibuat bagi memenuhi tanggungjawab dan obligasi dalam perjanjian antarabangsa tersebut.
3. Sekiranya tiada perundangan domestik sedia ada, undang-undang baharu perlu digubal bagi membolehkan tanggungjawab dan obligasi yang terkandung dalam perjanjian antarabangsa tersebut dapat dilaksanakan sepenuhnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SYED ABU HUSSIN BIN HAFIZ  
SYED ABDUL FASAL [BUKIT GANTANG]**

**TARIKH : 4 JULAI 2019**

**SOALAN : 102**

**Dato' Syed Abu Hussin bin Hafiz Syed Abdul Fasal [Bukit Gantang]** minta **PERDANA MENTERI** menyatakan apakah perbezaan yang akan dimainkan oleh Industri Kereta Nasional Ketiga menjelang tahun 2020 berbanding Industri Kereta Nasional pertama (PROTON) dan Industri Kereta Nasional Kedua (PERODUA) dalam memberi manfaat pekerjaan kepada rakyat khususnya Bumiputera. Adakah sasaran jualan Industri Kereta Nasional Ketiga di peringkat antarabangsa lebih baik berbanding industri kereta nasional sebelum ini.

**JAWAPAN: YB DATUK WIRA DR. MD FARID BIN MD RAFIK  
TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman, Ahli Yang Berhormat projek kereta nasional baharu mempunyai pendekatan yang agak berbeza dengan pengeluar kereta nasional sedia ada kerana bakal menggabungkan beberapa buah syarikat teknologi dan pembekal tempatan bagi menghasilkan sebuah kenderaan.

Ucapan YAB Perdana Menteri semasa mengumumkan mengenai projek kereta nasional baharu dalam Bahasa Inggeris dengan izin, “*The idea about*

## **SOALAN NO. 102**

*investing in national car is not just about building a national car, it's about becoming a catalyst for growing the Malaysian engineering capability”.*

Ianya juga adalah selaras dengan hasrat kerajaan untuk menjadikan Malaysia sebagai negara pengeluar dan bukan lagi sebagai negara pengguna akan dapat dicapai dan dimanifestasikan sejajar dengan Malaysia baru yang fokus dengan pembangunan sains dan teknologi.

Ianya secara tidak langsung dapat mewujudkan peluang-peluang pekerjaan terutamanya kepada belia-belia tempatan dalam bidang kejuruteraan dimana iannya adalah salah satu kunci penting kepada Malaysia untuk menjadi negara pengeluar.

Bagi mencapai objektif tersebut, Projek kereta Nasional Baharu perlu mensasarkan pasaran serantau ASEAN dan juga di peringkat global dan tidak hanya tertumpu kepada pasaran domestik. Dengan seramai lebih daripada 640 juta orang penduduk, ASEAN memang menjadi satu pasaran yang kuat di dalam dunia dan ini sudah lama disedari oleh syarikat-syarikat automotif yang telah bertapak di rantau ini sejak dari dahulu lagi.

Untuk terus bersaing diperingkat serantau dan global, kerajaan juga akan meneliti dari semua sudut dalam membawa industri automotif ke tahap seterusnya. Kereta nasional baharu sudah tentu akan berpaksikan pengalaman dan kepakaran yang telah dibina oleh ekosistem automotif sehingga kini, bersesuaian dengan trend pasaran dunia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK ZAKARIA BIN MOHD. EDRIS @ TUBAU**

**TARIKH : 4 JULAI 2019 (KHAMIS)**

**SOALAN NO. 103**

Datuk Zakaria bin Mohd. Edris @ Tubau [ Libaran ] minta **MENTERI AIR,TANAH DAN SUMBER ASLI** menyatakan menaik taraf Sungai Memanjang dan Sungai Gum-gum serta tindakan yang wajar dalam mencegah banjir berlaku memandangkan Kampung Sungai Memanjang dan Kampung Gum-gum sering dilanda banjir apabila hujan.

**JAWAPAN**

Tuan Yang di-Pertua,

**Program Pemuliharaan Sungai Untuk Mengurangkan Risiko Banjir Pelbagai Negeri**, Kementerian Air, Tanah Dan Sumber Asli (KATS) memberi perhatian secara khusus mengenai isu hakisan tebing sungai, pembersihan serta mendalamkan saliran/sungai. Di bawah program ini, KATS membantu Kerajaan Negeri dengan menyalurkan peruntukan di seluruh Negara termasuklah di Sabah. Bagi tahun 2018, peruntukan sebanyak RM20.6 juta telah diagihkan ke seluruh Negeri Sabah melalui JPS Negeri Sabah. Bagi tahun 2019 pula, sebanyak RM6 juta telah disalurkan kepada Negeri Sabah.

Skop kerja yang terlibat di bawah program tersebut adalah kerja pengorekan sungai, muara sungai, pembinaan struktur hakisan tebing sungai, membuang kelodak, sampah, sisa pepejal, pemotongan rumput, menaik taraf dan menyelenggara aset/ struktur kawalan banjir yang bertujuan mengurangkan risiko banjir.

Walaubagaimanapun, buat masa ini, tiada projek yang diluluskan bagi cadangan menaik taraf Sungai Memanjang dan Sungai Gum-gum memandangkan projek mengurangkan risiko banjir akan dilaksanakan mengikut keutamaan namun cadangan menaik taraf Sungai Memanjang dan Sungai Gum-gum ini akan dipertimbangkan pada masa akan datang.

Sekian, terima kasih

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEDUA  
PARLIMEN KE-EMPAT BELAS**

---

**PERTANYAAN : LISAN**

**DARIPADA : DATUK DR. JEFFREY GAPARI KITINGAN  
[ KENINGAU]**

**TARIKH : 4 JULAI 2019 (KHAMIS)**

**SOALAN NO. 104**

Minta **MENTERI PENGANGKUTAN** menyatakan adakah Kerajaan bercadang untuk mengembangkan pembinaan LRT dan MRT kepada Bandaraya Kota Kinabalu, Sabah.

**JAWAPAN**

Yang di-Pertua,

1. Berdasarkan **Senarai IIA – Tambahan kepada Senarai Negeri bagi Negeri Sabah dan Sarawak** di dalam **Jadual Kesembilan Perlembagaan Persekutuan**, ianya telah menetapkan bahawa perkara-perkara berkaitan Keretapi Negeri Sabah adalah terletak di bawah bidang kuasa Kerajaan Negeri Sabah. Maka sebarang perancangan berkaitan pembangunan rangkaian landasan keretapi termasuk LRT dan MRT adalah dibawah bidang kuasa Kerajaan Negeri Sabah.

2. Untuk makluman Yang Berhormat, sehingga kini pihak Kementerian Pengangkutan masih belum menerima sebarang cadangan dan permohonan daripada Kerajaan Negeri Sabah bagi pembangunan LRT dan MRT di Kota Kinabalu, Sabah.

Tuan yang Dipertua & Ahli Dewan yang mulia,

3. Sebagaimana yang dimaklumi, pembangunan infrastruktur pengangkutan berdasarkan rel akan melibatkan peruntukan kewangan yang besar. Justeru sebarang pembangunan baru infrastruktur ini perlulah disokong dengan kajian yang menyeluruh agar pembangunan tersebut memberikan pulangan yang optimum dan tidak akan membebankan Kerajaan kelak.
4. Walau bagaimanapun, Kerajaan Persekutuan sentiasa prihatin dengan pembangunan pengangkutan awam di Negeri Sabah dan masih terbuka bagi menerima apa-apa cadangan daripada pihak swasta (melalui Kerajaan Negeri Sabah) sekira terdapat pihak yang berminat untuk mencadangkan pembinaan perkhidmatan LRT atau MRT ke Bandaraya Kota Kinabalu, Sabah. Kerajaan Persekutuan juga bersedia untuk menilai dan mempertimbangkan sekiranya terdapat cadangan yang bersesuaian dari segi model pembiayaan (*Financial Model*) dan model perniagaan (*Business Model*) sama ada secara Inisiatif Kewangan Swasta (PFI) atau Kerjasama Awam-Swasta (PPP). Dengan cara ini Kerajaan percaya ianya akan mampu mengurangkan bebanan kewangan sedia ada kepada Kerajaan Persekutuan.

Sekian, terima kasih.

**NO. SOALAN : 105**

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WONG HON WAI [ BUKIT BENDERA ]**

**TARIKH : 4 JULAI 2019**

**SOALAN NO. 105**

**Tuan Wong Hon Wai [ Bukit Bendera ]** minta **MENTERI AIR, TANAH DAN SUMBER ASLI** menyatakan apakah usaha yang dibuat untuk pembaharuan undang-undang terhadap Akta Hakmilik Strata atau Kanun Tanah Negara supaya pembaharuan bandar (*Urban Renewal*) boleh dibuat ke atas flat-flat yang sudah usang yang melebihi 40 tahun.

**JAWAPAN**

Tuan Yang di-Pertua,

- i) Kementerian ini melalui Jabatan Ketua Pengarah Tanah dan Galian Persekutuan telah melaksanakan kajian untuk meminda Akta Hakmilik Strata 1985 (AHS). Kajian ini bertujuan untuk mengenal pasti kaedah terbaik dalam melaksanakan pembangunan semula skim strata melalui ketetapan majoriti pemilik-pemilik petak berdasarkan peratusan yang ditetapkan setelah mengambil kira faktor usia dan keadaan bangunan.
- ii) Kajian ini merupakan salah satu inisiatif bagi menyokong pembangunan semula bandar secara amnya memandangkan tiada peruntukan berkaitan pembangunan semula ditetapkan di dalam perundangan strata sedia ada.
- iii) Susulan itu, Jemaah Menteri pada 12 Jun 2019 telah bersetuju secara dasar supaya AHS dipinda bagi memudah cara pelaksanaan pembangunan semula skim strata. Cadangan ini seterusnya akan diangkat kepada Majlis Tanah Negara (MTN) untuk mendapatkan persetujuan dasar MTN bagi membolehkan pindaan tersebut dilaksanakan.
- iv) Kementerian ini seterusnya akan merangka draf Rang Undang-Undang pindaan AHS setelah kelulusan dasar MTN diterima.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATO' SRI MUSTAPA BIN MOHAMED**

**TARIKH : 4 JULAI 2019**

**SOALAN : 107**

**Dato' Sri Mustapa bin Mohamed [ Jeli ]** minta **PERDANA MENTERI** menyatakan jumlah kakitangan Axiata di Malaysia dan seluruh dunia ketika ini dan apakah Kerajaan yakin dengan jaminan yang diberikan oleh Pengerusi Axiata bahawa tidak ada pekerja yang akan terpaksa diberhentikan susulan penggabungan antara Axiata dan Telenor.

**JAWAPAN:** **YB DATUK WIRA DR. MD FARID BIN MD RAFIK**  
**TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman, Ahli Yang Berhormat pada masa ini, Axiata Group Berhad (Axiata) mempunyai 311 kakitangan di Malaysia. Jumlah ini tidak termasuk 2,661 orang kakitangan yang bertugas di anak syarikatnya, Celcom Axiata Berhad (Celcom) serta 223 orang kakitangan di bawah sayap digital Axiata di Malaysia. Secara keseluruhannya, Kumpulan Axiata mempunyai 10,878 orang kakitangan yang bertugas di anak-anak syarikatnya yang beroperasi di beberapa negara ASEAN dan Asia Selatan.

Ketika mengumumkan cadangan penggabungan Axiata dan Telenor ASA (Telenor) bagi mewujudkan syarikat telekomunikasi terbesar di rantau Asia Tenggara dan Asia Selatan pada 6 Mei 2019, Ketua Pegawai Eksekutif

## **SOALAN NO. 107**

Axiata telah memaklumkan bahawa penggabungan yang dirancang antara dua syarikat telekomunikasi tersebut adalah sebuah penggabungan setaraf atau merger of equals. Dan salah satu syarat yang telah ditetapkan oleh pihak Axiata kepada Telenor dan tidak boleh dirunding (non-negotiable) adalah jaminan pekerjaan iaitu jaminan bahawa tiada kakitangan akan yang akan diberhentikan secara paksa akibat daripada penggabungan ini. Syarat ini telah dipersetujui oleh pihak Telenor. Kedua-dua pihak kini sedang meneliti cadangan penggabungan ini dengan lebih terperinci dan akan memuktamadkannya pada suku ketiga tahun ini.

Sungguhpun penggabungan ini akan memberi banyak manfaat kepada syarikat dan juga negara, Axiata tidak akan meneruskan perbincangan selanjutnya sekiranya terdapat isu-isu yang akan menjelaskan kebijakan pekerjanya. Namun begitu, sekiranya ada keperluan untuk mengurangkan tenaga pekerja, ia hanya akan dilaksanakan melalui proses penawaran Skim Pemisahan Sukarela atau VSS. Di bawah skim ini, kakitangan tidak akan dipaksa untuk berhenti kerja tetapi boleh memilih untuk meninggalkan Axiata atau Celcom selepas penggabungan dimuktamadkan kelak.

Hasil penggabungan ini sebaliknya dijangka akan menghasilkan lebih banyak pekerjaan di Malaysia dalam sektor digital dan telekomunikasi, peluang menjana kemahiran dalam sektor digital serta peluang pekerjaan di anak-anak syarikat di negara serantau. Pekerjaan baharu juga akan diwujudkan hasil daripada syarikat gabungan baharu ini meneroka bidang baharu seperti internet broadband untuk kediaman, enterprise, serta pembinaan Pusat Inovasi Serantau.

Sekian, terima kasih.

**PEMBERITAHUAN PERTANYAAN DEWAN RAKYAT**  
**MESYUARAT KEDUA, PENGGAL KEDUA,**  
**PARLIMEN KEEMPAT BELAS,**

**PERTANYAAN : LISAN**

**DARIPADA : YB TUAN NIK MOHAMAD ABDUH BIN  
ABDUL AZIZ**

**[BACHOK]**

**TARIKH : 4 JULAI 2019**

**MENJAWAB**

**SOALAN NO. 108**

Minta **PERDANA MENTERI** menyatakan pendirian terkini Kerajaan terhadap Akta Anti Berita Tidak Benar.

**JAWAPAN:**

Yang Di-Pertua,

1. Fasal (2) Perkara 68 Perlembagaan Persekutuan memperuntukkan seperti yang berikut:

“(2) Jika—

- (a) sesuatu Rang Undang-Undang yang bukan suatu Rang Undang-Undang wang diluluskan oleh Dewan Rakyat dan, setelah dihantar kepada Dewan Negara sekurang-kurangnya sebulan sebelum akhir penggal itu, Rang Undang-Undang itu tidak diluluskan oleh Dewan Negara atau diluluskan oleh Dewan Negara dengan pindaan yang tidak dipersetujui oleh Dewan Rakyat; dan
- (b) dalam penggal yang berikutnya (sama ada di dalam Parlimen yang sama atau tidak) tetapi tidak lebih awal daripada setahun selepas Rang Undang-Undang itu mula-mula diluluskan oleh Dewan Rakyat, Rang Undang-Undang yang sama, tanpa apa-apa perubahan lain selain yang disebut dalam Fasal (3), diluluskan sekali lagi oleh Dewan Rakyat dan dihantar kepada Dewan Negara sekurang-kurangnya sebulan sebelum akhir penggal itu dan tidak diluluskan oleh Dewan Negara atau diluluskan oleh Dewan Negara dengan pindaan yang tidak dipersetujui oleh Dewan Rakyat,

maka Rang Undang-Undang itu hendaklah, melainkan jika diarahkan selainnya oleh Dewan Rakyat, dikemukakan kepada Yang di-Pertuan Agong untuk diperkenankan olehnya dengan apa-apa pindaan, jika ada, sebagaimana yang telah dipersetujui oleh kedua-dua Majlis Parlimen.”.

2. Dalam hal penolakan Rang Undang-Undang Antiberita Tidak Benar (Pemansuhan) 2018 di Dewan Negara, Fasal (2) Perkara 68 Perlembagaan Persekutuan memperuntukkan Rang Undang-Undang

Antiberita Tidak Benar (Pemansuhan) 2018 tersebut perlu dibentangkan semula di Dewan Rakyat dan diluluskan sekali lagi oleh Dewan Rakyat. Selanjutnya, Rang Undang-Undang Antiberita Tidak Benar (Pemansuhan) 2018 perlu dihantar ke Dewan Negara. Proses ini tidak boleh dimulakan lebih awal dan hanya boleh dimulakan setahun selepas Rang Undang-Undang Antiberita Tidak Benar (Pemansuhan) 2018 mula-mula diluluskan oleh Dewan Rakyat. Rang Undang-Undang Antiberita Tidak Benar (Pemansuhan) 2018 telah diluluskan di Dewan Rakyat pada 16 Ogos 2018. Oleh itu, proses ini hanya boleh dimulakan selepas 16 Ogos 2019 dan pembentangan Rang Undang-Undang Antiberita Tidak Benar (Pemansuhan) 2018 boleh dibuat pada Mesyuarat Ketiga Penggal Kedua Parlimen Keempat Belas.

3. Selepas Rang Undang-Undang Antiberita Tidak Benar (Pemansuhan) 2018 dibentangkan semula di Dewan Negara, sama ada Rang Undang-Undang Antiberita Tidak Benar (Pemansuhan) 2018 diluluskan ataupun tidak, Rang Undang-Undang Antiberita Tidak Benar (Pemansuhan) 2018 hendaklah dikemukakan kepada Yang di-Pertuan Agong untuk diperkenankan olehnya untuk menjadi suatu undang-undang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SERI AHMAD FAIZAL BIN  
AZUMU [TAMBUN]**

**TARIKH : 4 JULAI 2019**

**SOALAN : 109**

**Dato' Seri Ahmad Faizal bin Azumu [Tambun]** minta **PERDANA MENTERI** mengulas perkembangan terkini projek kereta nasional ketiga dan komitmen Kerajaan Persekutuan untuk projek ini dilaksanakan di Tanjung Malim demi pemerkasaan kawasan ini sebagai hab automotif nasional.

**JAWAPAN: YB DATUK WIRA DR. MD FARID BIN MD RAFIK  
TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman, Ahli Yang Berhormat projek kereta nasional baharu adalah inisiatif dan akan dibiayai sepenuhnya oleh pihak swasta. Projek kereta nasional baru bukan hanya mewujudkan sebuah kereta tetapi mengambil kesempatan daripada bakat dan sumber yang ada untuk mewujudkan pemangkin bagi pembangunan ekosistem di mana usahawan, perniagaan dan industri dapat berkembang.

Ianya secara tidak langsung dapat mewujudkan peluang-peluang pekerjaan terutamanya kepada belia-belia tempatan dalam bidang kejuruteraan dimana iannya adalah salah satu kunci penting kepada Malaysia untuk menjadi negara pengeluar.

Kecemerlangan dalam sektor automotif akan menjadi batu loncatan kepada sektor pembuatan dan kejuruteraan peringkat tinggi seperti industri aeroangkasa yang pada masa ini telah menjana pendapatan kepada negara lebih daripada RM14 billion dan telah mewujudkan 24,500 pekerja mahir pada tahun 2018.

Memandangkan inisiatif Projek Kereta Nasional Baharu adalah daripada pihak swasta, lokasi bagi projek ini juga akan ditentukan oleh pelabur dan rakan strategik dari pihak industri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB PUAN MARIA CHIN BINTI  
ABDULLAH [ PETALING JAYA ]**

**TARIKH : 4 JULAI 2019 (KHAMIS)**

**SOALAN NO. 110**

Minta **PERDANA MENTERI** menyatakan pindaan undang-undang domestik untuk membenarkan pelarian-pelarian etnik Rohingya, warga Palestin, Syria dan juga Muslim Sri Lanka untuk mendapat pekerjaan yang sah dan selamat, pendidikan dan juga khidmat hospital awam.

**JAWAPAN:** **YAB DATO' SERI DR. WAN AZIZAH DR. WAN ISMAIL**  
**TIMBALAN PERDANA MENTERI MALAYSIA**

Tuan Yang Di-Pertua,

1. Berhubung isu berkaitan kebenaran bekerja kepada pelarian, dasar sedia ada Kerajaan adalah tidak membenarkan pemegang kad UNHCR untuk bekerja secara sah di Malaysia. Mereka juga tidak boleh terlibat dalam sebarang bentuk pekerjaan berbayar, atau dalam sebarang perniagaan atau pekerjaan profesional. Namun atas dasar kemanusiaan, mereka dibenarkan bekerja di dalam sektor-sektor tidak formal untuk tujuan sara hidup.

2. Perkara ini dinyatakan dalam Arahan Majlis Keselamatan Negara No. 23: Mekanisme Pengurusan Pendatang Asing Tanpa Izin Yang Memegang Kad UNHCR (2009). Arahan ini merupakan satu-satunya mekanisme pengurusan pelarian di negara ini. Setakat ini Kerajaan belum lagi menggubal suatu undang-undang khusus untuk mengurus golongan pelarian di negara ini.

3. Walau bagaimanapun, dasar sedia ada yang tidak membenarkan pelarian bekerja di negara ini sedang dikaji dan diperhalusi oleh Kerajaan bagi mengenalpasti samada ia perlu dikekalkan atau dipinda. Kajian ini perlu dibuat dengan teliti bagi memastikan kepentingan rakyat dan negara dapat dipelihara sewajarnya.
4. Oleh yang demikian, buat masa ini, majikan tidak dibenarkan menggaji pelarian kecuali etnik Rohingya di bawah Projek Perintis Kebenaran Bekerja dalam sektor perladangan (Sime Darby Plantation Berhad) dan perkilangan (Gardenia Bakeries) sebagaimana keputusan Jemaah Menteri bertarikh 2 Mac 2016.
5. Dari segi kesihatan, pelarian di negara ini diberi kemudahan untuk mendapatkan rawatan di hospital/klinik Kerajaan dengan diskaun sebanyak 50% daripada kadar yang dikenakan ke atas golongan ekspatriat. Bagi tempoh antara 2013 sehingga Sept 2018, sejumlah 43,516 orang pelarian telah direkodkan mendapat perkhidmatan perubatan di hospital – hospital awam milik kerajaan. Bagi tempoh antara Januari sehingga September 2018 sahaja, daripada 4,628 orang pelarian yang menerima perkhidmatan kesihatan di hospital awam milik kerajaan, 1,068 orang daripadanya tidak menjelaskan bil rawatan hospital mereka dan kerajaan terpaksa menanggung tunggakan bil berjumlah RM 1.249 juta; dan
6. Akhir sekali, dari segi pendidikan, pelarian dibenarkan mendapat akses kepada kemudahan pendidikan di sekolah swasta atau Pusat Pendidikan Alternatif (*Alternative Learning Centre – ALC*) yang dikendalikan oleh pihak NGO, komuniti pelarian dan UNHCR sendiri. Sehingga kini terdapat sejumlah 65 buah Pusat Pendidikan Alternatif telah wujud di Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB PUAN NOORITA BINTI SUAL [ TENOM ]**

**TARIKH : 4 JULAI 2019 (KHAMIS)**

**SOALAN NO. 111**

Minta **PERDANA MENTERI** menyatakan langkah-langkah yang diambil oleh Kerajaan dalam menangani masalah kebanjiran pendatang tanpa izin di Sabah yang agak membimbangkan sejak kebelakangan ini terutamanya kes-kes berkaitan jenayah yang kebanyakannya melibatkan mereka di Sabah.

**JAWAPAN**

Tuan Yang di-Pertua,

1. Kerajaan memandang serius isu berkenaan Pendatang Asing Tanpa Izin (PATI) yang berlaku di negeri Sabah. Isu ini sememangnya telah berlarutan sejak beberapa lama, namun kerajaan tidak pernah jemu dalam meneruskan tindakan-tindakan yang telah dan sedang diambil seperti:

- a. Menjaga Kedaulatan Persempadanan Negara

Tugas ini dipikul oleh agensi seperti Angkatan Tentera Malaysia (ATM), Polis DiRaja Malaysia (PDRM), Agensi Pengawatkuasaan Maritim Malaysia (APMM) dan *Eastern Sabah Security Command* (ESSCOM) merangkumi kawalan persempadanan di darat, laut dan udara.

**b. Menggiatkan Operasi Bersepadu**

Operasi bersepadu pelbagai agensi di negeri Sabah pada tahun ini telah mencatatkan jumlah tangkapan PATI seramai 2,686 orang (sehingga 1 Julai 2019). Tahanan ditempatkan di pusat tahanan sementara bagi proses pengusiran ke negara asal. Pada tahun ini juga sehingga 1 Julai 2019, seramai 6,188 orang PATI telah diusir dari negeri Sabah.

**c. Penguatkuasaan Undang-Undang**

Perundangan sedia ada (Akta Imigresen) berkaitan dengan PATI membolehkan pendakwaan dan hukuman dikenakan kepada mereka yang melindungi atau menggaji PATI atau membenarkan PATI dalam premis. Hukuman denda tidak melebih RM50,000 atau penjara tidak melebih 12 bulan atau kedua-duanya sekali boleh dikenakan kepada pesalah. Selain daripada itu, pihak PDRM negeri Sabah telah mempertingkatkan usaha membendung isu jenayah diseluruh daerah dengan melaksanakan operasi cegah jenayah dikawasan tumpuan yang melibatkan kehadiran PATI.

**d. Penyenaraian Hitam (*Blacklist*)**

Bagi memastikan PATI yang telah diusir tidak kembali ke Malaysia, Jabatan Imigresen Malaysia mengenakan tindakan senarai hitam bagi tempoh 1 hingga 5 tahun ataupun seumur hidup mengikut kategori kesalahan yang dilakukan. Penyenaraian hitam ini dilakukan Jabatan Imigresen melalui kaedah maklumat biodata pendatang dan kaedah biometrik cap jari. Kaedah rekod biometrik ini membolehkan Jabatan Imigresen mengesan PATI yang telah disenarai hitam, yang cuba memasuki Malaysia menggunakan identiti palsu. Kerajaan juga pada masa sekarang sedang menambahbaik sistem biometrik sedia ada bagi meningkatkan lagi keberkesanan sistem tersebut.

## **SOALAN NO : 111**

2. Di samping tindakan-tindakan di atas, kerajaan juga berusaha memfokuskan ke arah mengurangkan faktor penolak atau *push factor* yang membuatkan ramai PATI membanjiri negeri ini, iaitu kadar kemiskinan yang tinggi di Selatan Filipina dan Indonesia. Kerajaan berpegang kepada prinsip memakmurkan jiran atau “Prosper Thy Neighbor”, iaitu memberi sokongan terhadap usaha memajukan ekonomi dan usaha damai di Filipina terutamanya di bahagian Selatan dan juga Indonesia. Komitmen memberi sokongan ini telah diutarakan sendiri oleh YAB Perdana Menteri kepada Mr. Rodrigo Duterte, Presiden Filipina semasa lawatan beliau ke Manila pada 7 Mac 2019. Kemajuan ekonomi di tempat-tempat berkenaan akan mewujudkan lebih banyak peluang pekerjaan dan seterusnya memperbaiki taraf hidup penduduk di sana, dan diharapkan kadar migrasi PATI ke negeri Sabah juga berkurangan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN CHAN FOONG HIN  
[ KOTA KINABALU ]**

**TARIKH : 4 JULAI 2019 (KHAMIS)**

**SOALAN NO. 112**

Minta **PERDANA MENTERI** menyatakan sama ada dengan adanya Kerajaan Bangsamoro yang baru dan keadaan yang makin stabil di Filipina Selatan, apakah rancangan Kerajaan Malaysia untuk membantu migran Filipina di Sabah kembali ke sana secara sukarela.

**JAWAPAN**

Tuan Yang di-Pertua,

1. Kerajaan tidak pernah menghalang malahan sangat menggalakkan golongan ini untuk pulang ke negara asal mereka. Perkembangan terkini di Selatan Filipina menyaksikan proses ke arah pembentukan Wilayah Autonomi Islam Mindanao Bangsamoro yang lebih berkesan atau *Bangsamoro Autonomous Region in Muslim Mindanao* (BARMM). Di samping itu, pelantikan Datuk Ibrahim Abdullah, bekas Duta Malaysia ke Perancis sebagai Utusan Khas Pertubuhan Kerjasama Islam (OIC) ke Selatan Filipina bagi tujuan proses damai juga sedikit sebanyak akan mempercepatkan usaha berkenaan dan seterusnya akan membawa kemajuan ekonomi dan politik di wilayah berkenaan. Adalah diharapkan bahawa keadaan ini akan menarik minat migran Filipina untuk kembali ke tempat asal mereka.

2. Kerajaan juga sentiasa bersedia untuk memberikan kerjasama terhadap usaha-usaha sama ada oleh Badan Bukan Kerajaan (NGO) atau Kerajaan Filipina dalam membawa pulang rakyat mereka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN JONATHAN YASIN  
[ RANAU ]**

**TARIKH : 4 JULAI 2019 (KHAMIS)**

**SOALAN NO. 113**

Minta **PERDANA MENTERI** menyatakan apakah langkah-langkah jangka pendek dan jangka panjang Kerajaan yang telah dan sedang diambil untuk mengusir keluar semua penduduk tanpa izin di negeri Sabah.

**JAWAPAN**

Tuan Yang Di-Pertua,

1. Kerajaan melalui pelbagai agensi yang berkaitan telah mempergiatkan usaha menangani permasalahan Pendatang Asing Tanpa Izin (PATI) di seluruh negara. Dalam urusan pengusiran PATI di negeri Sabah, statistik operasi pengusiran PATI sehingga 1 Julai 2019 mencatatkan seramai 584,213 orang PATI telah diusir sejak tahun 1990.
2. Selain daripada itu, penguatkuasaan undang-undang serta operasi pembenterasan PATI giat dilaksanakan. Sehingga 1 Julai 2019, operasi bersepadu yang telah dijalankan di negeri Sabah sepanjang 2019 telah mencatatkan bilangan operasi sebanyak 4,650 kali dengan pemeriksaan terhadap 14,288 orang dan penahanan PATI seramai 2,686 orang.
3. Selain daripada operasi-operasi yang dilaksanakan oleh agensi-agensi kerajaan, kaedah penyenaraian hitam (*blacklist*) oleh Jabatan Imigresen Malaysia kepada PATI yang telah diusir adalah salah satu langkah pembendungan kemasukan mereka semula ke Malaysia. Selain

daripada itu, kawalan persempadanan di bahagian pantai timur negeri Sabah telah dipertingkatkan dengan pewujudan *Eastern Sabah Security Command* (ESSCOM). Langkah ESSCOM melaksanakan perintah berkurung di kawasan Zon Selamat Timur Sabah (ESSZONE) telah membantu mengurangkan kes-kes penyeludupan termasuklah penyeludupan manusia.

4. Di samping tindakan-tindakan di atas, kerajaan juga berusaha memfokuskan ke arah mengurangkan faktor penolak atau *push factor* yang membuatkan ramai PATI membanjiri negeri ini, iaitu kadar kemiskinan yang tinggi di Selatan Filipina dan Indonesia. Kerajaan berpegang kepada prinsip memakmurkan jiran atau “Prosper Thy Neighbor”, iaitu memberi sokongan terhadap usaha memajukan ekonomi dan usaha damai di Filipina terutamanya di bahagian Selatan dan juga Indonesia. Komitmen memberi sokongan ini telah diutarakan sendiri oleh YAB Perdana Menteri kepada Mr. Rodrigo Duterte, Presiden Filipina semasa lawatan beliau ke Manila pada 7 Mac 2019. Kemajuan ekonomi di tempat-tempat berkenaan akan mewujudkan lebih banyak peluang pekerjaan dan seterusnya memperbaiki taraf hidup penduduk di sana, dan diharapkan kadar migrasi PATI ke negeri Sabah juga berkurangan.
5. Kerajaan memberikan jaminan usaha yang dijalankan pada masa kini akan diteruskan bagi memastikan permasalahan berkaitan PATI di negeri Sabah mampu dibendung dengan lebih efektif dan sistematik.

Sekian, terima kasih.